



Title :	Katha Sarit Sagar
Author :	Somdev Pandit
English Translation :	C.H.Tawney
Kashmiri Nastaliq Translation :	Dr. Amar Malmohi
Devanagari-Kashmiri Version :	M.K.Raina, Mumbai

May 2020



## कैह कथा सरित सागरस मुतलिक

म.क.रैना, मुम्बई

संस्कृतस मंज लेखनु आमुच किताब कथा सरित सागर छे दुनियिहुक्यन अवलीन किताबन मंज गंजरनु यिवान। कथा सरित सागर छु कथन हुंद अख समंदर। अम्युक लेखन वोल ओस अँकिस काँशिरिस ब्रह्मन रामु सुंद नेचुव तु नाव ओसुस सोमदेव पँडित।

सोमदेवस मुतलिक छनु ज़्यादु कैह पताह। तसुंजि जिंदुगी मुतलिक न छु तँम्य पानु कैह खास ल्यूखमुत तु न बेय काँसि। सोमदेवन छि पानु अख नजम लीछिमुच यथ मंज तँम्य पानस मुतलिक कम वँलीलाह वोनमुत छु। वननु छु यिवान जि तँम्य छु पनुन यि शाहकार सूर्यवती हुंद दिल रंजुनावनु खॉतरु ल्यूखमुत खसु वँशीरि हुँदिस राजस अनंतु सुंज आशेन्य आँस। सोमदेव ओस राजु अनंतु सुंद दरबॉय शॉयिर।

कथा सरित सागर किताबि छि १२४ बाब यिमन सोमदेव तरंगु वनान छु। ब्रोकासन कँर यि १८हन सुर्गन मंज तकसीम तु तँम्यसुंदुय टेक्स्ट कोर टावनी साँबन इस्तेमाल। कथा सरित सागरस छि २२००० श्लोक तु अमि सुत्य छु अंदाजु लगान जि यि किताब काँचाह बँड आसिहे। सोमदेव छु वनान जि कथा सरित सागर छेनु तसुंज पनुन्य तख्लीख बँल्यकि छु तँम्य सु मवाद अमि खोतु बजि अकि किताबि यथ बृहत कथा नाव ओस, मंजु न्युमुत। बृहत कथा आँस गुनाड्य सुंज तख्लीक तु यि आँस प्राकृत भाषायि मंज लेखनु आमुच।

सोमदेव छु वनान जि बृहत कथायि हुंजु दँलीलु आसु बेयि ति कैहव लूकव ब्रौह पकुनाविमचु यिमन मंज शिव, पुष्पदंत, कानभूती, गुनाड्य तु सतवाहन शॉमिल आँस्य। दपान येलि सतवाहनन बृहत कथायि मंज ज़्यादु कैह दिलचस्पी हाँव नु, गुनाड्यस गव नु यि बरदाश तु तँम्य हेच यि किताब वरकु वरकु ज़ालुन्य। यिथु पाँठ्य गँयि बृहत कथायि हुंघु शे लछ श्लोक खत्म। अख लछ श्लोक बचाँव्य सतवाहनन तु तँम्य रलाँव तथ सुत्य ब्याख किताब यथ लम्बक नाव ओस तु यथ मंज तँम्य अमि कथायि हुंद येतिहास ल्यूखमुत ओस।

बृहत कथायि हुंद मसवदु आव नु पतु कुनि अथि । सोमदेवस ब्रौह आँस क्षेमेंद्रन ति बृहत कथायि मंजु कँडिथ बृहत कथा मंजरी लीछिमुच मगर यि आँस सोमदेवुनि कथा सरित सागुरस मुकाबलु स्यठाह ल्वकुट । बृहत कथा मंजरी छे कथा सरित सागुरुक महज त्रेयिम हिस् । अकि अंदाजु मुताँबिक छे सोम देवन कथा सरित सागर १०७० ई यस मंजु लीछमुच ।

कथा सरित सागुरस मंजु लेखनु आमचु दँलीलु छे अँकिस आम परन वॉलिस ल्वकुचारु प्यठु वेजु बासान । परन वॉलिस बासन अथ मंजु पंच तंत्रुचि दँलीलु ति तु महाबारतुचि दँलीलु ति । अथ मंजु मेलन ऋगवेदुक्य हॉरान करन वॉल्य देवमालायी अन्सर, वेताल पच्चीसी हिव्य दँलीलु सिलसिलु तु द्यवन द्रेठाकन हुंजु दँलीलु ति । यि कथ छि येत्यथ वनुन्य लायक जि 'बेताल-पच्चीसी' छु कथा सरित सागुरुक महज अख हिस्सु यथ मंजु २५ कहानीयि छि । अमि सुत्य ति छु अमि किताबि हुंदि बाडुवुक अंदाजु सपदान ।

कथा सरित सागुरुक तर्जमु छु सी.एच.टावनीयन अंग्रीजियस मंजु कोरमुत । अमि पतु पकुनॉव अमिच कॉम एन.एम.प्यंजुरन ब्रौह कुन येलि तँम्य टावनी सुंदिस तर्जमस पनुन मवाद रलॉविथ बँरचर कोर । प्यंजुरु सुंजि किताबि छि दँह जिल्द (खंड), १२४ अध्याय तु तकरीबन ३८०० सफु ।

टावनी सुंदिस अंग्रीज्य अनुवादुक्यन ग्वडनिक्यन च्वदुहन अध्यायन छु डाक्टर अमर मालमोहीयन नस्तालीक कॉशिरिस मंजु तर्जमु कोरमुत । यि किताब छे जे एन्ड के अकादमी आफ आर्ट, कल्चर एन्ड लेन्वावेजुजन १९९६स मंजु शायह वँरमुच ।

- म.क.रैना, मुम्बई

15 December 2019



## कथा सरित सागर

### Book : 1



### ग्वडुत : शिवु संजु जाय :

अँकिस मशहूर कोहस प्यठ यथ हिमावत नाव छु, छि गंधर्व विद्याधर तु कन्नर रोजान। यि कोह छु सारिनय कोहन हुंद राजु। अथ छु त्यूत बज्यर तु थज़र जि भवौनी बनेयि अथ कूर, ख्वसु त्रेन भवनन हुंज़ मॉज छे। अमि कोहुक शुमौली थौंग छु कैलास, युस कैह सास योजनु थोद छु, तु पनुन्यव शीनु ज़ुचव सुत्य छु थ्यकान। येलि मंदुरा थौंग, सोदुर मंदनु विज़ि दोन बन्योव, सु गव नु त्यूत सफेद यूत बु कुनि मेहनतु वरौय सफा छुस। अति छु पार्वती हुंद टोट महेश्वर रोजान युस सारिनय जुवन तु बे-जुवन मंज़ सरस छु। यस गन, विद्याधर तु सिध खँदमथगार छि। सु तीज़वान जटादार, येम्य संज़न जटन मंज़ ज्यवुन चँद्रम पूर क्यन संग्रन छुवान छु, यिम संध्या नेह गाशु मँज़्य ज़र्द बासान छि। येलि तँम्य शिवन पनुन त्रुशूल असुर राजु इन्दाकहस लोय, अमि सुत्य लोग त्रेन ब्ववनन ज़ख्म। यि ज़ख्म ओस तँम्यसुंदिस ख्वर न्यठु नमस ह्यू, तु यि लोग चँद्रमु सुंद्य पॉठ्य ज़ोतुनि। बासान ओस जि तँम्य द्युत, दिवतुहन तु असुरन यनामु।

अकि दूह वँर पार्वती तस सख व्वपासुना। सु गोव ख्वश तु स्व पनुनि क्वछि मंज़ रँटिथ प्रुछुनस, 'वन क्या गछी?' हिमालु प्वत्री वोनस, 'सौमी, अगर तोह्य मे प्यठ

ख्वश छिवु, तेलि बोजुनॉव्यतव मे कांह मॉर्यमंज सरताजु दॅलील।' शिवन वोनस,  
'म्यॉन्य टॉदय, यथ सम्सारस मंज क्याह छु, क्याह ओस तु क्याह आसि, यि  
चु ज्ञानख नु।' मगर तॅम्य सुंजि टाछि, कोर तस इसरार, तिक्याजि शिव ओस  
प्रसन्न तु अमि सुत्य ऑस स्व आनंद महसूस करान।

### **ब्रह्मा तु नारायण :**

पार्वती ख्वश करन मूजुब, वॅन्य तस शिवन अख ल्वकट कथ, यथ मंज पार्वती हुंद  
दैवी बज्यर ओस। दोपुनस :

'अकि दूह सपुज दॅलील जि नारायण तु ब्रह्मा ऑस्य मे लबनु खॉतरु,  
सॉरिसुय जगुतस वॅन्य दिवान। फेरान फेरान वॉत्य तिम हेमावतस नखु। तति वुछ  
तिमव, पानस ब्रॉह कनि अख बोड बारु अगनु लिंग। अम्युक वॉत तु अंद ज्ञाननु  
मूजुब चाव अख अथ लिंगस अकि अंदु तु ब्याख बेयि अंदु, मगर अंदर वॉतिथ लोब  
नु दूयव मंजु काँसि ति ब्याख अंद। न्यराश सपदिथ लॅग्य तिम दूशुवय म्यॉन्य त्वता  
करनि। बु गोस तिमन निश नमूदार तु वोनमख कॅह मंगनु खॉतरु। ब्रह्माहन वोन जि  
बु गछु तस नेचुव बननु। यि ऑस तस गलती तिक्याजि यि ऑस इन्तिहॉयी  
गरजमंद मंग। अमि गलती किन्य, आयि नु अमि पतु ब्रह्माहस ज़ांह ति पूजा करनु।  
नारायणन मॉग मे अख वरदान, जि सु गछि सिर्फ म्योन सीवक आसुन। बु गोस  
तॅम्य सुंदि वननु ख्वश तु नारायणन ह्योत ज़नम। ही पार्वती, सु बन्यव चोन ज़न्म  
ह्यथ म्योन। चु छख नारायण, म्यॉन्य शक्ती, तॅम्य सुंद बल युस सारिवुय खोतु  
बलवान छु।'

### **पार्वती हुंघ बुंहिम ज़न्म :**

चु ऑसुख प्राणि ज़न्मु ति म्यॉन्य रॅन्य।' शिवन वोनस। पार्वती गॅयि यि बूजिथ  
हॉरान तु प्रुछुनस, 'बु कर ऑसुस बेयि तुहँज रॅन्य?' शिवन द्यतुस जवाब,  
'वारुयाह समय गव। राजु प्रजापत दक्षस आसु वारियाह कोरि तु तिमनुय मंज  
ऑसुख चु ति। मॉल्य कौरुय च़े मे सुत्य खांदर तु बाक्य कोर्यन कौरुन धर्म  
राजस तु बाक्य दिवतुहन सुत्य। अकि फिरि कोर राजु प्रजापतियन हवन तु  
सारिनुय ज़ामतुर्यन कौरुन साल। मगर मे प्रुछुन नु कॅह। येलि च़े यि बूजुथ, च़े गोय  
मॉल्य सुंदिस वॅतीरस प्यठ यिथय ह्यु। च़े प्रुछुथ तस जि चॉनिस बर्थाहस क्याजि  
प्रुछु नु तॅम्य। तॅम्य यि तोरु वोनुय, तमि सुत्य बास्यव च़े कनन ज़न तु ज़हर शुरनि  
कूरान। तॅम्य वोनुय, 'चोन बरथा छु कलु मालु लागान। तस किथु कॅन्य यीहे

हवनस प्यठ प्रुछनु ?' च़े गोय स्यठाह महसूस तु च़े वोनुथ खश्मु सान, 'म्योन मोल छु बदखाह तु ज़ॅलील। अँम्य सुंद द्युतमुत शरीर कथ लागि मे ?' यि वँनिथ त्रुवुथ च़े सु मोर। म्यॉन्य टॉक्य, मे येलि यि बूज़, मे खोत त्यूत खश्मु जि राज़ु दक्षुन सोरुय हवन कोर मे डुबु डॉस्य।' पतु ज़ायख च़ु राज़ु हिमालस, तु शीनु मंज़ु खँचुख तिथु पॉक्य ग्रायि मारान यिथु पॉक्य सौदुरस मंज़ु ज़ून आसान छे। याद छुयि, बु किथु पॉक्य आस राज़ु हिमालस निश तपस्या करनि तु चॉन्य मॉल्य वोनुय च़े म्यॉन्य सीवा करनु खॉतरु, तिव्याज़ि बु ओसुस तुहुंद पोछ। अँथ्य मंज़ु सूज़ दिवताहव मे च़े प्यठ मूहित करनु खॉतरु कामु दीव। मगर येलि सु म्यानि तपस्यायि मंज़ु खँचल करनि लोग, मे ज़ोल सु नज़रि सुत्य। दिवता ऑस्य म्योन अख नेचुव यछान युस तारक दुतस मारिहे। मगर चॉन्य लोलन करनुवुख च़ु अघोर तप तु ऑखुर ह्योतुस बु चॉन्य लोलन मँल्य। यिथु पॉक्य तोगुय च़े बोज़ुन च़ु कर ऑसुख म्यॉन्य रँन्य।'

'बेयि क्याह वनय ?' शिवन प्रुछ तस। पार्वती खँच च़ख तु वोनुनस, 'च़ु छुख मे चालु करान। मे छु मोलूम, जि म्यानि व्यनुती बावजूद बोज़ुनावख नु च़ु मे कांह दिलचस्प दँलील तिव्याज़ि मे छु मोलूम जि च़ु छुख संध्यायि पूजान तु गंगा छय कलस प्यठ। यि बूज़िथ द्युत तस शंकरन तसली तु अख पुर-इसरार दँलील बोज़ुनावनुक कोरुनस वादु। पार्वती द्युत होकुम जि तोत गछि नु कुहन्य ति अचुन। नंदु किशोरन कोर बर बंद तु शंकरन वँर दँलील शुरू।

### **बृहत कथा बोज़ुनावनुय तु यि पुष्पदंतनुय बोज़ुन्यः**

'दिवता छि हमेशु स्वखी तु मनुश्य दुखी। तु तिम, यिमन मंज़ु मनुश्यन तु दिवतहन हुंघु ग्वन आसन, छि असान तु गिंदान। बोज़ु, व्वन्य बोज़ुनावथ विद्याधरन हुंज़ु दँलील।' शंकरन लॉज पार्वती दँलील वनुन्य। नंदु किशोर ओस बरस प्यठ पँहुरु दिवान। अँथ्य मंज़ु आव ओरु शिवु सुंद परमु भक्त पुष्पदंत, यस सारिनुय गनन मंज़ु अख खास दर्जु ओस। नंदुकिशोरन द्युत नु तस अंदर अचनु। पुष्पदंत गव हॉरान। सु लोग सॉचनि जि यीच़ क्या सना राज़दोरी ऑस जि तस ति ओस नु ओर अचनुक इजाज़थ। तस ओस पनुनि तपु सुत्य यि बल जि सु येलि येछिहे, तस वुछिहे नु कुहन्य। अँथ्य बलस कॉम ह्यथ च़ाव सु अंदर। अँदरु बूज़ुन सतन विद्याधरन हुंघन कारुनामस हुंज़ु सॉरुय दँलील, य्वसु त्रुशूलधोरी पार्वती बोज़ुनावान ओस। यि बूज़िथ द्राव सु तु सॉरुय दँलील बोज़ुनॉवन पनुनि आशानि

यस जयि नाव ओस। मगर यि दॅलील बूज़िथ, गॅयि जयि तीच व्यसमुर जि सेरुनि लेजि गोस मनुट। स्व गॅयि तु बोजुनॉवन यि दॅलील पार्वती तिक्याज़ि ज़नानु कॅम्य हेछिनाँव अज़ ताम ज़ांह काँसि छ्वपु करुन्य। जयस निशि यि दॅलील बूज़िथ खोत पार्वती सख कूद तु तमि वोन पनुनिस बाँचस 'चे बोजुनॉवुथस नु बु कांह सरताज़ु दॅलील तिक्याज़ि जयस ति छे यि दॅलील मोलूम। उमायि हुंदिस साँमियस तोग यि सोरुय बोजुन तु वोनुनस 'पुष्पदंतन बूज़ पनुनि भक्ति बलु किन्य यि दॅलील। तॅम्य बोजुनॉव पनुन्य आशेन्य जयि। बाक्य छेनु काँसि यि दॅलील बूज़मुच।

यि बूज़िथ खोत पार्वती शरारथ तु तमि अननोव पुष्पदंत, यस साँरिसुय थरु थरु आँस। पार्वती द्युतुस शाफ। 'चु बन मनुश्य।' तमि द्युत माँल्यवानस ति शाफ येम्य पुष्पदंतुन बचाव करनुच कूशिश वॅर। पतु पेयि तिम दूशुवय जयस सान पार्वती ख्वरनतल तु कोरुहस ज़ारु पारु तु पुछुहँस तिमन कर म्वकलि शाफ ? पार्वती आव आर। तमि वोनुख 'अख यक्ष छु, यस सुपरातिक नाव छु। सु छु कुबेरु सुंदि शापु किन्य पिशाच बन्योमुत। सु छु विंघावनस मंज़ रोज़ान तु तस छु कानुभूती नाव। ऐ पुष्पदंत, येलि चु कानुभूती वुछुहन, चे पेयी पनुन्य असलियथ याद। येलि चु सु यि दॅलील बोजुनावुहन, चे म्वकुली शाफ। तु ऐ माँल्यवान, येलि चु कानुभूतीयस निश यि दॅलील बोज़ख तु पतु बाक्य बोजुनावुहख, तेलि म्वकुली चे ति शाफ।' यि वॅनिथ द्रायि पार्वती, तु पुष्पदंत तु माँल्यवान गॅयि वुज़मलि हुंघ पाँठ्य गाँब।

वख गव चलान, तु अकि दूह प्यव गौरी ओर कुन च्यथ। तमि पुछु शिवस 'साँमी, म्याँन्य तिम रुत्य सीवक, यिमन मे शाफ द्युत, कथ जायि छि बुतराँच प्यठ ? चंद्रशेखरन (यस कलस प्यठ चंद्र आसि, याने पानु भगवान शिवन) वोनुस 'म्याँन्य टाँठ्य, पुष्पदंतन ह्योत ज़न्म तु बन्याव वरारुची कौसम्बी शहरस मंज़। माँल्यवानन ति ह्योत सुप्रतिष्ठा किस शानदार शहरस मंज़ ज़न्म तु नाव छुस गुनाड्य। यि वॅनिथ गव शंकरस पनुन्यन भक्त्यन हुंद तकलीफ मोहसूस। अमि पतु रुद सु पनुनि शक्ती सुत्य कैलास पर्वतस प्यठ तथ आनंदस व्यूर तुलान युस कल्पवृक्षचव लंजव सुत्य बन्योमुत ओस।

### पुष्पदन्त छु कानुभूतीयस समखान :

मनुष्य बॅनिथ रुद पुष्पदन्त वारयाहस कालस बुतराँच प्यठ फेरान। तस ओस व्वन्य वरारुची तु कात्यान नाव। तस ओस ज्ञानुक तु विज्ञानुक स्पटाह अनुभव सपुदमुत तु राजु नंदस ओस वॅज़ीर ति रुदमुत। अकि दूह थोक सु फेरान फेरान

तु चाव अँकिस दुर्गा मंदरस मंज। दीवी गँयि तँम्यसंजि तपस्यायि सुत्य ख्वश तु सोपुनस मंज वोनुनस कानुभूती छांडुनि विंद्यावनस मंज गछनु खॉतर। वरारुची वोत अथ त्रेशि रँस्तिस अघोर वनस मंज येति सुह तु वांदर रोजान ऑस्य। फेरान फेरान वुछ तँम्य अति अख न्यागरोध कुल तु अँथ्य तल वुछ तँम्य हतु बँद्य पिशाच ह्यथ कानुभूती बिहिथ युस अँकिस साल कुलिस यूत ज्यूठ ओस। येलि कानुभूतीयन वरारुची वुछ, सु वोथ थोद तु प्यव तस ख्वरन तल। कात्यान (वरारुची) ब्यूठ तु प्रुछुनस 'चे छुय रुत स्वबाव, च्चु किथु पॉट्य बन्योख पिशाच ?' यि बूजिथ द्युतुनस कानुभूतीयन जवाब 'मे छुनु पानस मुतलिक कँह पय, मगर यि कँछा मे शिवस निश उजैनी हंडिस शुमशानस प्यठ बूज, ति वनय बु च्चे।'

दुर्गायि प्रुछ शंकरस 'म्यानि बगवानु, च्चे क्याजि शुमशान तु खापरि मालु ख्वश करान?' तँम्य द्युतुस तोरु यि जवाब 'वारयाह काल गव, कल्प म्वकुलिथ येलि सोरुय कँह नहवुनावनु आव। तमि पतु ओस सॉरिसुय सृष्टि मंज पोनी पोन्थ। मे त्रोव पनुनि रानि त्रुक दिथ अख खून कतरु पॉनिस मंज। अथ बन्योव अख ठूल। अमि मंजु द्राव पोरुश, याने सोरुय करन वोल। तस निशि द्रायि पृकत य्वसु मे ब्रौह कुन तखलीकी अमल जॉरी थवनु मूजुब बारसस अँन्य। अमि पतु बनेयि प्रजापती तु बाक्य दिवता, तु यिमव वँर्य बाक्य मखलूक तु खलुक। अवय छु आत्महस पनुनिस असली हालतस मंज मूल प्वरुश ति वननु यिवान। अमि आयि ज़ोल तु अज़ोल आलम तखलीक वँरिथ गव मूल प्वरुशस किबुर, तु अवु किन्थ च़ोट मे तस कलु। मगर यि वँरिथ फ्यूरुम, अवय छिम शुमशान तु कलु ख्वपरि ख्वश करान। यथ आलुमस छे कलु ख्वपरि हंज शक्ल तु यि छु म्यॉनिस अथस मंज। अमिक्य ज़ हिस् छि आकाश तु बुतराथ।'

येलि शिवन यि वोन, मे गन्योव ज़्यादय शोक तु बु लोगुस कन दॉरिथ बोज़ुनि। अमि पतु प्रुछ पार्वती बेयि तस 'मे वनतु पुष्पदंत कर यी असि निश वापस। यि बूजिथ कोर महीश्वरन मे कुन इशारु तु वोनुनस 'हु पिशाच युस च्चु वुछान छिहन, ओस यक्ष तु कुबेरु सुंद सीवक। अँमिस ऑस अँकिस राक्षसस सुत्य दूस्ती यस स्तूलशिरस नाव ओस। येलि क्वबेरन यि च्यून ज़ि अँमिस छे खराब सोहबत, तँम्य छुन यि विंद्यावनस मंज वँडिथ। मगर अँम्यसुद्य बाँय यस दीरघुजंघ नाव ओस, कोरुस ज़ारु पारु तु प्रुछुनस ज़ि शाफ कर म्वकुल्यस ? क्वबेरन वोनुस 'येलि चोन बोय पुष्पदंतस निश बृहतकथा बोज़ि, युस अकि शापु किन्थ ज़नुमस आमुत छु, तु पतु येलि चोन बोय मॉल्यवानस बोज़ुनावि युस शापु किन्थ मनुश्य बन्योमुत छु,



तेलि म्वकलन यिम त्रेनुवय। चे आसी याद जि चे ति छी मॉल्यवानस तु पुष्पदंतस  
यिहोय शाफ द्युतमुत।' येलि मे शिवु संजु यिम कथु बोजु, बु आस योर तु  
यि जॉनिथ छुस ख्वश जि जांह वाति पुष्पदंत योर तु मे म्वकलि शाफ।'

येलि कानुभूतीयन पनुन्य दॅलील वॅन्य, अमी विजि प्यव वरारुचियस पनुन सोरुय  
गुदर्योमुत याद, तु ज़न तु मचि नॅदरि मंजु बेदार सपदिथ वोनुन 'बु छुस सुय  
पुष्पदंत। चु बोजु स्व दॅलील मे निशि।' यि वॅनिथ बोजुनोव तॅम्य कानुभूती स्व  
दॅलील यथ सथ लंजि आसु तु य्वसु सतन लछन शोलूकन प्यठ मुशतमिल ऑस।  
यि दॅलील बूजिथ वोनुस कानुभूतीयन 'साँमी, चु छुख मे शिवु सुंद अवतार बासान,  
नतु कस छे यि दॅलील मोलूम। चानि बरकतु म्वकल्यव मे शाफ, मगर व्वन्य छम  
चाँन्य जॉती दॅलील बोजुनुक शोक। अगर चु मे अथ काँबिल ज्ञानान छुख, तेलि  
वनतु मे पनुनि येमि जन्मुच दॅलील, युथ मे पाप वारु म्वकलन।' कानुभूती ख्वश  
करनु खॉतर, युस तस ख्वरन थफ वॅरिथ ओस, वॅर वरारुचीयन पनुनि ज्यनु  
प्यठुच दॅलील शुरू।

### **वरारुची, गुरु वर्ष तु ग्वरुबायन व्यादी तु यँदुदतुन्य दास्तान :**

कोसम्बी शहरस मंज ओस अख ब्रह्मन रोज़ान यस सोम दत्त नाव ओस। अँमिस  
ऑस्य अग्निशिक्षा ति वनान। तॅम्यसंजि गर वाजनि ओस वासूदत्ता नाव। स्व ऑस  
चकि अँकिस रेश्य संजु आशेन्य तु अकि शापु किन्य ऑस यथ दुनियाहस मंज तु  
यथ जायि जन्मस आमच। बु आस यिमनुय दून बाँचन हुंदि मरि। वुनि ओसुस बु  
शुरय जि म्योन मोल गव स्वर्गवास। माजि रोछुस बु मेहनत मोजूर्य वॅरिथ। अकि  
दूह आयि जु वतुगथ ब्रह्मन तु चायि सोन रातस। तिम ऑस्य थँक्यमुत्य। कमुय  
काँल्य गँयि नेबुर्य डोल वज़नुच आवाज़। यि बूजिथ प्यव म्यानि माजि म्योन मोल  
याद तु तमि वोन मे व्वश त्राँविथ 'गोबुरा, यि छु भावनंद, यस पाँथुर करुन  
आसि।' मे वोनस जि बु गछु तु वुछि यि पाँथुर। तोरु यिथ बोजुनावथ बु चु यि  
पाँथुर पानु रछि रछि सोरुय। म्यॉन्य यि कथ बूजिथ गँयि ब्रह्मन हाँरान मगर म्यानि  
माजि वोन तिमन 'गोबुरव, यि छु पोज़ वनान। अँमिस शुरिस छु ति लफ़ुज़ लफ़ुज़  
याद रोज़ान यि केंछा यि अकि लटि बोज़ि।' मे इम्तिहान ह्यनु खॉतर वॅन्य तिमव  
प्रातिशाक्षा। यि बूजिथ बोजुनाँव मे तिमन यि लफ़ुज़ लफ़ुज़ वॅल्य वॅल्य वापस। पतु  
द्रास बु तिमन ब्रह्मनन स्रुत्य तु गोस पाँथुर वुछनि। तोरु यिथ ग्युंद मे यि पाँथुर  
तिथय पाँठ्य गरि माजि ब्रॉहकनि, यिथु पाँठ्य मे यि वुछमुत ओस। तिमव ब्रह्मनव

मंजु ओस अँकिस व्यादी नाव तु म्योन यादु वोतुर वुछिथ वँन्य तँम्य म्यानि माजि अख दँलील ।

### जु ब्रह्मन बाँय :

माँजी, वतस नाँव्य मुल्कस मंजु आँस्य जु बाँय बारुन्य रोजान । अँकिस ओस नाव देवस्वामिन तु बेयिस करमुबक । यिमन ओस अख अँक्यसुंद सख लोल तु माय । युस मे सुत्य छु, अँमिस छु यँद्रदत नाव तु यि छु तिमव मंजु अँक्यसुंद नेचुव । मे छु व्यादी नाव । मे मूद मोल । बाँय सुंद मरुन न जँरिथ द्राव यँद्रदतुन मोल गरि हमेशि खॉतरु । अमि दूखु गँयि सानि माजि ति मँरिथ । असि ओस ज्ञान प्रावनुक शोक तु गरि नीरिथ लँग्य महागणीशु संजु तपस्या करनि । अमि पतु आव असि महागणपथ सोपनस मंजु तु वोनुन 'राजु नंदुन्य राजुदॉन्य छे पाटलीपुत्र । तति छु अख ब्रह्मन रोजान यस वर्ष नाव छु । तस निशि प्राँविव तोह्य सौरुय ज्ञान ।' अँस्य गँयि पाटलीपुत्र तु तति कोर मोलूम अँमिस ब्रह्मनस मुतलिक । लुकव वोन जि तति ओस वर्ष नावुक अख चोर तु बिचोर ब्रह्मन । अँस्य गँयि हॉरान । असि वुछ वर्ष ब्रह्मनु सुंद मकानु, स्यठाह खस्तु हाल । अति आसु सिर्फ गगर वाजि । लबु आसु आवसेमचु । कुनि आँस नु आरॉयिश तु सजावठ अख रछु ति । बासान ओस जि शिकस छु अँत्य जामुत । वरुश वुछ असि द्यानस मंजु तु अँस्य गँयि तँम्य संजि आशेनि निश । तमि वँर जान पाँदय आजरथ माजरथ । तँम्य सुंद शरीर ओस अँड्यजि खंगुर तु कमजोर । पलव छेन्यमुत्य, तु मॉलु । बासान ओस जि स्व आँस पानय गँरीबी हुंद अवतार य्वसु आम पाँदय ब्रह्मनन बागि आसान छे । अँस्य पैयि तस ख्वरन तल तु वँनिस पनुन्य हालात । यि ति वोनुस जि असि बूज शहरस मंजु तँम्यसुंद बाँचु छु सख मुडु । तमि वोन तोरु हना जोर दिथ 'गोबुरव, त्वहि पोज वनुनस मंदुछनु बु कैह । बूजिव, बु वनु त्वहि सॉरुय दँलील ।

### वरुश तु उपावरुश :

शहरस मंजु ओस अख रुत ब्रह्मन रोजान, यस शंकर स्वरमन नाव ओस । तस आँस्य जु नेचिव्य । अख म्योन बरथा वरुश तु ब्याख उपावरुश । म्योन बाँचु ओस बेवकूफ तु गँरीब । तँम्यसुंद बोय ओस आँकुल तु अँमीर । उपावरुशन थाँव पनुन्य जनानु जिठिस बाँय सुंद गरु संबालनु खॉतरु । कैह दूह गँछिथ वाँचु वँहराथ । अमि वख्तु छि गरस मंजु याजि बनावान तु यिमु काँसि ति चॉरिस ब्रह्मनस ख्यावान । अमि सुत्य छे नु जनानन र्यतुकाँलिस तु वंदस थकावट बासान । मगर

ब्रह्मन छिनु अअम पॉट्य यि याजि दान रटान तिक्व्याज़ि अथ मंज़ छे बे-यज़ती।  
म्यानि दुरकाकनि दिचु याजि म्याँनिस खानुदारस दक्षनायि सान। तँम्य रचि याजि  
तु अन्यन गरु। मे कँरुस ब्यवॉरी। अमि पतु लोग सु पनुनि बेकलॉज़ी हुंदि एहसासु  
अँदुरी गलुनि तु गव महागणीशस ज़ारु पारस। सु गव अँमिस ख्वश तु द्युतुनस  
ज्ञान। वोनुनस 'अगर च़े त्युथ कांह ब्रह्मन समखी यस अकि वननु सोरुय याद  
आसि रोज़ान, तेलि हेछिनॉव्यज़्यन सु च़ु।' म्योन बरथा वोत ख्वश ख्वश गरु तु मे  
वँनिन सॉरुय दँलील। तनु छु सु सिर्फ़ द्यान तु ज़फ़ करान। अगर त्वहि त्युथ कांह  
नफर समखि, यस अकी वननु याद आसि रोज़ान, सु अँन्यून तोह्य यूर्य। अँमिस  
सुत्य मेलि त्वहि ति ती यि तोह्य कांछान छिवु।

वरुश ब्रह्मनु संज़ि अअशनि निश यि दँलील बूज़िथ दिच़ असि तस हथ स्वनु मोहरु  
युथ तस गँरीबी च़लि, तु द्राय तमि शहरु मंज़ु। अँस्य फीर्य सॉरिसुय सु नफर  
छांडुनि यस अकी वननु याद रोज़ान आसि। ऑखुरस वॉत्य नाकाम सपदिथ यथ  
गरस मंज़। येति वुछ चोन लँडकु यस अकि फिरि बूज़िथ सोरुय याद रोज़ान छु।  
मॉजी, अँस्य छी च़े गुज़ॉरिश करान यि लँडकु असि सुत्य सोज़नु खॉतरु, युथ  
असि सारिनय ज्ञान मेलि।

### वरारुची संज़ दँलील :

व्यादी ब्रह्मनु संज़ यि दँलील बूज़िथ वोन म्यानि माजि 'यि सोरुय छु रलान। मे छे  
तुहंज़न कथन प्यठ पछ, तिक्व्याज़ि म्याँनिस नेचिव्य सुंदि थनु प्यनु विज़ि गँयि  
आकाश वॉनी 'च़े ज़ेवी सु बचु यस अकी विज़ि बूज़िथ सोरुय याद रोज़ान आसि।  
अँमिस सपदि वरुश ब्रह्मनस निशि ज्ञान हॉसिल तु यि बनावि ग्रैमर अख बोड बारु  
अँलिम तु अँमिस रोज़ि वरारुची नाव तिक्व्याज़ि यि जान आसि तु यथ मंज़ इनसानु  
संज़ दिलचस्पी ऑसिथ हेकि, आसि अँमिस ख्वश करान।' तनु गव यि बचु बडान  
तु बु रूज़ुस सॉचान ज़ि अँम्यसुंद गुरु वरुश कति आसि। अज़ गँयस यि बूज़िथ  
स्यठाह ख्वश। यि नीवुन पानस सुत्य। यि ति छु त्वहि बोय।' येलि तिमव म्यानि  
माजि हुंज़ु यिमु कथु बोज़ु, तिम दूशवय याने व्यादी तु यँद्रदत्त गँयि ख्वश। व्यादी  
ब्रह्मनन दिच़ पनुन्य सॉरुय दौलथ म्यानि माजि, युथ स्व मे मेखल दिथ हेकि तु युथ  
मे वेद परनुक हक मेलि। अमि पतु द्रास बु तिमन सुत्य। माजि हुंद ओसुम फेरान  
मगर तोति कोरुम सबर। व्वं गव म्यानि माजि गव ओश रुकावुन मुश्किल।  
ब्रह्मन ज़ादन ओस बासान ज़ि कार्तिकिया सुंदि वरदानुक फल ओस तिमन जल्द  
मेलन वोल तु तिम द्रायि अमि शहरु मंज़ु तीज़ी सान। कँह कालु पतु वॉत्य अँस्य

वरुश ब्रह्मनस निश। दोयिमि दूह रँट्य तँम्य अँस्य पानस ब्रौह कनि चाटु कोट  
कँरिथ, तु सु लोग इल्हॉमी आवाज़ि मंज लफुज अँ परनि। यकदम गँयि वेद तु शे  
शास्त्र तँम्य संजि ज़ेवि प्यठ जॉरी। यि कँछा तँम्य वोन, मे थोव ति सोरुय याद  
सिर्फ अकी फिरि बोजनु सुत्य। व्यादीयस रूद द्वयि तु यँद्रदत्तस त्रेयि तॉलीमि  
याद। येलि शहरुक्यव ब्रह्मनव यि इल्हॉमी आवाज़ बूज, तिम आयि हॉरान सपदिथ  
प्रथ तरफु लारान, तु कांह कथ करनु वरॉयी पेयि वरुशस खवरन तल। यि करामात  
वुछिथ लँग्य न सिर्फ उपावरुश बँल्यकि पाटलीपुत्रुक्य सॉरी लुख नचुनि। राजु  
नंदन येलि महागणीशु संज शक्ति वुछ, सु गव ख्वश तु वरुश ब्रह्मनु सुंद गरु बोरुन  
दनु द्यारव सुत्य।

### वरारुची संज दँलील :

वेदन हुंज दँलील हनि हनि अंद वातुनाँविथ येलि अकि दूह गुरु वरुशन पनुन  
दूहदिशुक पाठ म्वकुलोव, असि प्रुछ तस 'त्वहि छा मोलूम जि यि शहर पाटलीपुत्र  
किथु पॉदय छु लक्ष्मी तु सरस्वती हुंद गरु? ही गुरुदेव, असि वँन्यतव यि  
दँलील।' यि बूजिथ वोन तँम्य असि कन दॉरिथ अमि शहरुच तॉरीख बोजनु  
खॉतरु।

### शहर पाटलीपुत्रुच बुनियाद :

कन्नखला छु अख पॉकीजु तीर्थ। यि छु तथ जायि येति गंगा पहाडव मंजु छे  
नेरान। अथ जायि छे पवित्र गंगा दिवताहन हुंद हँस्य पनुनि करु सुत्य वँलिथ ब्वन  
वॉजमुच। अति ओस अख दक्षनुक ब्रह्मन रोजान। सु ओस पनुनि आशनि सुत्य  
रूजिथ तप ज़फ करान। तस ज़ायि तति त्रे नेचिव्य। कँह काल गँछिथ गँयि तिम  
दूशुवय बॉच स्वरुगस तु तँम्यसुंद नेचुव गव अँलिम प्रावनि राजगढ। तति प्रोव  
तिमव ज्ञान विज्ञान मगर पनुनि येतीमी हुंद ओसुख एहसास। अति नीरिथ गँयि तिम  
दक्षन कारतिकेय सुंदिस मंदरस गछनु खॉतरु। तिम वॉत्य अँकिस शहरस मंज  
यथ चिंचिनी नाव ओस तु युस समंदरु बँठिस प्यठ ओस। अति रूद्य यिम अँकिस  
ब्रह्मनु सुंदि गरि यस भोजिक नाव ओस। तँम्य कोर पनुन्यन त्रेन कोर्यन यिमन  
सुत्य खांदर तु पनुन सोरुय दाश नदाश यिमन दिथ गव पानु गंगायि रियाजत  
करनि। तिम लँग्य पनुनिस हेहरु सुंदिस गरस मंज रोजुनि। अमि पतु कँचि दूही  
वोथ अति ख्वशुक सॉली किन्य ज़बरदस द्राग। येलि ख्वनस कँह रूदुख नु,  
त्रेशिवय ब्रह्मन चँल्य अति पनुनि रुचु आशनि त्रॉविथ तिक्याजि जॉलिम मर्दन छेनु

पनुनि गरुच कांह फिकिर आसान। यिमन मंज्र ऑस मँजिम बेनि ग्वबि ख्वरु। यिम त्रेशिवय गँयि यजन दत्तुनिस गरस मंज्र रोजुनि युस यिहँदिस मॉल्य सुंद दोस ओस। ख्वदुवय तिम अति कॉफी बुर हालच मंज्र रोजान आसु, अमा पोज़ तहँद्य खयाल ऑस्य सिर्फ पनुन्यन बॉचन वँन्य दिवान। तिव्याज़ि रुति खानदानुचि ज़नानु छे मँसीबतस मंज्र ति रुचन आशेन्यन हुंद्य फरुज याद थावान। केह काल गँछिथ ज़ाव मँजिमि बेनि अख लँडकु ति तिम त्रेशिवय लजि लोलु सान अँमिस रछुनस मान मान करनि। अकि दूह सपुज दँलील ज़ि शंकर ओस पार्वती सुत्य पकान। येलि पार्वती, ख्वसु शंकरस वछस सुत्य लँगिथ ऑस, यिमन बेन्यन हुंद अँमिस बचस खॉतरु लोल वुछ, तमि प्रूछ शंकरस 'सॉमी, वुछिव यिम त्रेशिवय बेनि क्याह लोल छे अँकिस बचस बरान। यि छु यिहुंज आश, तु व्वमेद छख ज़ि कुनि दूह करि यि यिमन खँदमथ। कोताह जान गछिहे अगर यि बचु शुर्य पानय यिहुंज सीवा वँरिथ हेकिहे।' येलि पार्वती तस आर ओन, शंकरन वोनस 'यि बचु बनावन बु पनुन तिव्याज़ि अँकिस ब्रूहमिस ज़न्मस मंज्र छे अँम्य तु अँम्यसुज़ि आशेनि म्यॉन्य आरादना वँरमुच, तु यि छु पनुन्यन कर्मन हुंद फल प्रावुनि यथ बुतरॉच प्यठ आमुत। अँम्यसुंज स्व आशेन्य ति छे व्वन्य पटला नावु किन्य राज़ु महँदर वर्मनस ज़ामुच, तु यिहय बनि अँमिस यथ ज़न्मस मंज्र ति आशेन्य।' अमि पतु वोन शंकरन तिमन त्रेशिवुन्य रुचन ज़नानन सोपुनस मंज्र यिथ 'अँमिस बचस रोपिज पुत्राका नाव तु प्रथ दूह येलि यि नँदुरि व्वथान आसि, अँमिस आसन अख लछ स्वनु मोहरु शांदस तल आसान। ऑखुरस बनि यि राज़ु।' येलि सु नँदुरि वोथ, तिमव रुचव ज़नानव तुजि स्वनु मोहरु तसुंदि शांद तलु। पतु बन्यव अमि स्वनु किस बलस प्यठ पुत्राका अख राज़ु तिव्याज़ि ख्वश कुस्मती छे रुत्यन कर्मन तु रियाज़ुच हुंद फल आसान। अकि दूह वोन यज़दत्तन तस 'राज़ु, चोन मोल तु पेत्र चँल्य द्रागुकि खोफु खबर कोत। चु कर कॉफी दान युथ चरचु बूज़िथ तिम ति च़े खॉरात मंगुनि यिन। बोज़ बु वनय ब्रह्म दत्तुन्य दँलील।'

### राज़ु ब्रह्म दत्त :

प्रानि वख्तु ओस बनारसुक राज़ु ब्रह्म दत्त। तँम्य वुछ अकि दूह अख स्वनुहॉर्य राज़ु होंज़ु जूर्य राथ क्युत वावस मंज्र वुडान। यिम ऑस्य स्वनुक्य पॉठ्य चमकु चमक करान तु यिमन पतु पतु ऑस्य हतु बँद्य राज़ु होंज़ ति। बासान ओस ज़ि सफेद ओबुरस मंज्रस छु वुज़मलि गाह त्रोवमुत। तस गव यिमन रटनु खॉतरु दिल बेकरार तु सोरुय शाहानु ऑश अशरथ मोटुस। सारिनुय जांदारन कोरुन कांह तकलीफ

वातुनावुनस ठाख। पनुन्यन वॅज़ीरन सुत्य मशवरु कॅरिथ बनावुनोवुन अख शूबिदार तलाव। कमय काल गॅछिथ वुछ तॅम्य स्व राजु होंजु जूर्य तथ तलावस मंज। येलि तिमन अति रोजुनस हॉल गॅयि, तॅम्य प्रूछ तिमन तॅहंदि स्वनु हॉर्य आसुनुक वजह। तिमव वोनहस 'राजु, ब्रॉह जन्मु ऑस्य अॅस्य काव। कावु पचि हंघन फल्यन प्यठ अॅस्य पानुवॉन्य चुवान। अकि दूह गॅयि अॅस्य अकि खॉली शिव मंदरु मंजु डुलु तु अॅथ्य जायि गॅयि अॅकिस नॅटिस मंज, येति असि जुव द्राव। अमि किन्य छु असि स्वनुहॉर्य रंग तु असि छु ब्रुहिम जन्म ति याद। यि बूज़िथ कॅर राजन तस यड बॅरिथ नज़राह तु चेशमन तु दिलस गॅयस फरहत।

### शहर पाटली पुत्रुच बुनियाद :

'अगर चु ति खॉरात करख, चे मेलुनय पनुन मोल तु पेतुर वापस।' यज्ञदत्तन द्युत तस यि सलाह तु यि मोन पुत्राकन। तॅम्यसुंदि खॉरातुक शोहरु येलि दूर दूर ताम वोत, तिम ब्रह्मन (मोल तु पेतुर) ति आयि तोर खॉरात मंगनि। येलि तिम परजुनॉविख, तिमन दितिख कॉफी दनु द्वार तु तिम गॅयि पनुन्यन आशेन्यन निश। यि कथ छे अॅजीब जि तकलीफ तुलिथ ति छिनु कॅमीनु इनसान पनुन्य जॅलील फितरत मॅशरिथ ह्यकान, तिक्याज़ि तिमन मंज छेनु रुतिच तु क्रितिच पहचान आसान। कॅह दूह गॅछिथ लॅग्य तिम राजुसी छारुनि तु पुत्राक मारनुच कॅरुख सखर। तिमव वोन तस दुर्गा तीर्थस गछनु खॉतरु येति तिमव मंदरुस अंदर कॉतिल गुपिथ थॉव्यमुत्य अॅस्य। तिमव वोन तस कुनिसुय जॅनिस अंदर अचनु खॉतरु। येलि सु अंदर च़ाव, तति वुछ तॅम्य पनुन्य मारन वॉल्य। तॅम्य प्रूछ तिमन जि तिम क्याज़ि अॅस्य तस मारुन यछान? तिमव द्युतुस जवाब 'असि छु चॉन्य मॉल्य तु पेत्रव चे मारनु खॉतरु कोछ द्युतमुत।' अॅथ्य मंज कॅर्य तिम दुर्गायि बद-हवास तु राजन वोनुख 'बु दिमोवु त्वहि पनुन्य म्वलुल्य लाल तु जवॉहिर। बु वनु नु यि कथ कॉसि तु बु गछु कुनि दूर जायि।' तिमव मोन तु तॅम्यसुंघव पलुवव प्यठ तुलिख लाल जवॉहिर तु बाक्य वस ह्यथ द्रायि पानस। तॅम्यसुंदिस मॉलिस तु पेत्रन वोनुख जि तिमव मोर सु। तिम ब्रह्मन आयि वापस तु कॅरुख तख्त प्रावनुच कूशिश मगर तिम मॉन्य वॅज़ीरव गद्वार तु खॉरिख दारस। एहसान फरामोश छिनु ज़ांह ख्वशहाल बनान।

राजु पुत्राकन ओस वादु कोरमुत तु अवु मूजुब गव सु गॅनिस विंध्यावनस मंज, तिक्याज़ि सु ओस सख दिल मलूल। अॅथ्य वनस मंज फेरान फेरान वुछ तॅम्य अॅकिस जायि ज़ु नफर दब करान। तॅम्य प्रूछ तिमन जि तिम कम अॅस्य तु दब

क्याज़ि ऑस्य करान? तिमव वोनुहस 'ऑस्य छि माया नॉव्य असुर संघ ज़ लड़कु। मॉल्य संज दौलथ बॉगुरॉव असि मगर पथ कुन रूद्य त्रे चीज़। यिम छि अख बानु, अख लूर तु अख खाव। अवय छि ऑस्य दब करान। युस अखाह ति पोशि, सु नियि यिम चीज़।' येलि पुत्राकन यि बूज़, तस आव असुन तु वोनुनख 'यिम चीज़, यिम छि अँकिस इनसानस खॉतरु रुच वरासथ।' तिमव वोन तस 'यि खाव लॉगिथ छु इनसान पनुनि मरज़ी मुताँबिक बुडान, तु यि केंछा येमि लोरि सुत्य लेखनु यी, ति छु पूर सपदान। यि केंछा इनसान ख्योन येछि, ति छु येमि बानु मंज़ नेरान।' येलि पुत्राकन यि बूज़, तँम्य वोनुख 'लडायि सुत्य नेरि नु केंह। तोह्य दृशुवय त्राँविव दोर। युस ब्रॉह नेरि, सु नियि यिम चीज़।' तिमव अहमकव मोन तु त्राँवुख दोर। तँम्य लॉज खाव तु लोग आकाश बुडनि। पानस सुत्य तुलुन बानु ति तु लूर ति। स्यठाह कम समयस मंज़ वोत सु अँकिस स्वंदर शहरस मंज़ यथ आक्रशक नाव ओस। सु लोग पानस सुत्य सौंचुनि 'बदकार ज़नानु छे आसान दोखु बाज़। ब्रह्मन छि म्यॉनिस मॉलिस तु पेत्रन हिव्य। सौदागर छि लालुची। फिकरी छुम नु तरान बु कथ गरस मंज़ रोज़ु।' अमी विज़ि वोत सु अँकिस वॉरान मकानस नखु यथ मंज़ सिर्फ अख बुड रोज़ान ऑस। तँम्य दिच तस क्याहताम डॉल्य तु लोग तति रोज़ुनि।

अकि दूह ऑस बुड ख्वश। तमि वोन पुत्राकस 'मे छे चानि खांदरुच फिकिर। येतिकिस राज़स छे अख कूर। नाव छुस पटाली। स्व छे मँहलु खानुकिस पेटिमिस टावरस प्यठ अकि अनमोल जवाहिरुक्य पॉठ्य रँछिथ।' यि बूज़िथ ज़न तु तस कामुदीवु सुंद तीर जिगुरस आव। सु गव बैकरार तु तमी दूह कोरुन तस विगनि वुछनुक फॉसलु। राथ क्युत लॉज तँम्य खाव तु वोत वुडव कँरिथ पटालि हुंज़ि दारि नखु, ख्वसु स्यठाह थज़ुरस ऑस। तँम्य वुछ स्व पलंगस प्यठ शॉगिथ। बासान ओस ज़ि स्व ऑस ज़ूनि ज़ुचन मंज़ तन नावान यिमु तस अंगन अंगन बोसु करान आसु। तस बास्यव ज़न तु हुस्न आलम मुहिथ मखमूर अंदाज़ु आरामस ओस। येलि सु यि सौंचान ओस ज़ि सु किथु वँन्य करि तस हुशार, नेबुर्य आयि अँकिस रॉछदरु सुंदि ग्यवुनुच आवाज़ 'यावुन येलि काँसि यावन मचि मस नैदरि हुशार करि, तेलि छु तस पनुन कर्म फल मेलान। तु येलि स्व तस मॉर्य मँद्य आयस मंज़ ब्यवॉरी करि, तु सु तस नालुमति रटि, तेलि यिन मसवलि हुंज़ु अँछ लोलु मनकलि हुंदि वुशिनेरु मुचरावनु।' यि होसलु अफज़ा शार बूज़िथ लँग्य तस अंग फ़कनि तु तँम्य कोर तस विगनि नालु मोत। स्व गँयि हुशार तु आयि लोलु तु हया क्यन पर्दन वलनु। राथ गँयि रसान तु तिहुंदि लोलुच रेह गँयि तेज़ान। पतु कोर

तिमव गंधर्व अअयि खांदर। रॉच हंडि पॅत्यमि पॅहरु द्राव पुत्राक दिलस नलु वठ थॅविथ तु वोत बुजि निश। पतु रूद वारयाहन रॉचन यि सिलसिलु जॉरी। ऑखुर लोग मॅहलुक्यन रॉछ दरन यि सोरुय पय। तिमव वॅन्य राजस सॉरुय शेछ तु तॅम्य वोन अॅकिस ज़नि मॅहलस अंदर पटाली नज़र थवनु खॉतरु। तमि येलि शाहज़ादु शॉगिथ वुछ, तमि द्युत तस व्वज़ुजि लाछि सुत्य पलुवन दाग युथ सु परज़ुनावनु यियि। सुबहस वोन तमि राजस सोरुय तु तॅम्य सूज्य प्रथ तरफु जोसूस। दागु किन्य परज़ुनोव तिमव पुत्राक तु ओनुख राजस निश रॅटिथ। येलि तॅम्य राजु खश्मस मंज़ वुछ, सु लोग ख्राव लॅगिथ वुडुनि तु च़ाव पटालि हंडिस मॅहलस मंज़। तॅम्य वोन तस 'सोन पय लोग सारिनय। व्वथ अॅस्य च़लव।' तिम लॅग्य वुडुनि तु पतु वॅथ्य अॅकिस जायि गंगायि बॅठिस प्यठ। अति द्युत पुत्राकन पनुनि मसवलि होसलु। बानु मंज़ु ख्योख नॅफीस ख्यन। येलि पटाली पुत्राक सुंदि कमालुक अंदाज़ु लोग, तमि कोर तस इल्तिमास। सु बामल अननु खॉतरु बनोव तॅम्य लोरि सुत्य अख बोड शहर, यथ च्वशुवय फूजी बल ऑस्य। तथ शहरस मंज़ बन्यव सु राजु। येलि तॅम्यसुंद बल बड्यव, तॅम्य द्युत पनुनिस हेहरस शिकस तु बन्याव च़क्रुथ राजु। यि छु सुय शहर युस तॅम्य लोरि सुत्य बनोव तु अवय छि अथ पाटली पुत्र वनान। यि छु लक्ष्मी तु सरस्वती हुंद गरु। विंध्यावनस मंज़ कानुभूतीयस यि वाकह बोज़ुनॉविथ थोव वरारुचीयन पनुन बयान जॉरी।

### वरारुची संज़ दॅलील :

बु ओसुस तति यॅद्र दत्तस तु व्यादीयस सुत्य रोज़ान। मे कोर वारियाहन अॅलिमन प्यठ अबूर हॉसिल तु अॅथ्य सुत्य म्वकल्यव म्योन ल्वकचार ति। अकि दूह लोग यॅद्राज़ुन मॉलु तु अॅस्य ति गॅयि यि वुछुनि। अति वुछ असि अख कूर ख्वसु ज़न तु कामु दीवुन कान ऑस। यॅद्र दत्तन वोन मे 'यि छे उपावर्शु संज़ कूर तु नाव छुस उपाक्वश।' तमि ति वुछ मे कुन लोलु चेश्मव तु पनुन्यव च्वंज़व दॅस्य कोरुन मे मुतलिक मोलूम। स्व ऑस च्वदॉहिम ज़ून तु अॅछ आसस नील्य पम्पोश। शूबिदार नरि ज़न तु पम्पोशि नल। वछ ओसुस बरजस्तु फोलिथ तु हॅटिस आसस शंखुक्य पॉठ्य त्रे शूबिदार रुखु। व्वज़ुल्य वुठ, स्व ऑस दौयिम लक्ष्मी। ज़न तु कामु दीवुन्य दौयिम हुस्नु सॉबुरन। लोलु कान लोग तु दिल गोम रतु सॅर्य। रॉत्य रातस रूदुस तॅम्यसुंदन गिलासु वुठन म्वनि करान। येलि मंज़्य रचि खंजि नैदर पेयम, मे वुछ सोपनु मंज़्य सफेद पलव लॉगिथ अख दीवी। तमि वोन मे ज़ि उपाक्वश ऑस ब्रूहमिस ज़नुमस मंज़ चॉन्य आशेन्य तु यथ ज़नुमस मंज़ ति शूबख च्यु तस अज़लु



लोन। स्व ति छय च़ेय योत लोल बरान। बु छस सरस्वती तु चानि दिलुच दग बरदाश नु कॅरिथ वॅनी मे यि शेछ।’

यि वॅनिथ गॅयि स्व गॉब तु बु गोस हुश्यार। गरि द्रास तु वोतुस उपाक्वशि हुंदिस गरस नखु। तति ब्यूतुस अँकिस अम्ब कुलिस तल। तमि सूज़ पनुन्य अख राजदार। तमि वोन मे ज़ि उपाक्वशि कोताह लोल ओस म्योन। यि बूज़िथ वॅरुन मे जिगुरस ज़्यादय दग तु मे वोनस ‘बु क्याह करु तस रोस? योताम नु तॅम्यसुंद्य ज़िठ्य तस मे सुत्य अथुवास करन, तोतान्य कति रलि स्व मे सुत्य? बे-यज़ती खोतु छु मरुन जान। अगर कुनि तॅरीकु तॅम्यसुंदि दिलुच कथ तॅम्यसुंदिस मॉलिस माजि ताम वाति, मुमकिन छु अमि सुत्य मा असि अथुवास तु शादकॉमी। च़ु छख रुच़ ज़नानु। अगर च़ु यि कॉम करख, मुमकिन छु च़ु मा बचावख म्यॉन्य तु पनुनि वेसि हुंज़ जिंदगी।’

यि बूज़िथ द्रायि स्व तु वोनन सोरुय उपाक्वशुनि माजि। तमि वोन यि सोरुय रूनि स उपवर्शस। तॅम्य सूज़ पनुनिस बॉयिस वर्शस शेछ तु वर्शन कोर खांदर मंज़ूर। सात आव वुछनु। व्यादी गव तु तॅम्य अँन्य कोसम्बी प्यठु म्यॉन्य मॉज तु उपाक्वशि आव मे सुत्य लॅगुन करनु। बु लोगुस पाटलीपुत्र पनुनि आशनि तु माजि सुत्य जान पॉठ्य रोज़ुनि। हनि हनि लॅग्य वर्शस शेश्य हरुनि तु यिमन मंज़ ओस अख यस पानुनी नाव ओस। तस ओस नु किहीन्य तगान, अव मूजुब कोड सु ग्वर-माजि गरि। सु गव दिल मलूल तु दिल फुटिथ लोग हिमालया पर्वतस प्यठ तप करनि। चँद्रशेखर सपदुस प्रसन्न तु द्युतुनस अख नोव ग्रैमर युस ज़बॉन्य हुंद आगुर छु। सु अअव वापस तु वोनन मे बहस करनु खॉतरु। सत दूह गॅयि असि बहस करान तु अूठ्यमि दूह ओस सु हारुनस तैयार ज़ि बगवान शिवन कॅड ग्रज़वुन्य आवाज़ खसु सारिवुय बूज़। अमि सुत्य द्राव यँद्रु ग्रैमर नोन तु असि सारिनुय द्युत पानुनीयन शिकस। असि बास्यव पनुन पान अहमक। बु गोस त्यूत दिल मलूल ज़ि मे कोर पनुन सोरुय सरमायि अँकिस सौदागर हेरन गुप्तस हवालु, युथ सु म्योन गरु पकनावि। उपाक्वशि सोरुय वॅनिथ द्रास पानु कैलास पर्वतस कुन युथ बु तप कॅरिथ शंकर प्रसन्न कॅरिथ ह्यकन।

### **उपाक्वश तु तॅम्यसुंद्य च़ोर प्रेमी :**

उपाक्वश रूज़ व्फादार आशनि हुंद्य पॉठ्य म्यानि कामयॉबी खॉतरु गरि दूहय गंगा श्रान तु रुच़ु कामि करान। व्वन्य ऑस स्व हना वॅछमुच़ तु ज़रदेमुच़ मगर ति कॅरिथ

ति आँस स्व बुनि मर्दन काँफी स्वंदर तु रम्बुवन्य बासान। स्व आँस दूहय गंगायि  
प्यठ्य श्रान करनि गछान। अँथ्य मंज बुछ स्व अकि दूह वति राजु संद्य गरेलू गोरन,  
काँज्य तु शाहजादु संद्य वँज़ीरन। यिमन सारिनय डँज तस मुतलिक नेत। अमि  
दूह लोग तस तन नावान ज्यादय वख। येलि स्व वापस आयि, शाहजादु संद्य  
वँज़ीरन वँरुस थफ। तमि वोनूनस अक्लमँदी सान 'बु ति छस ती यछान यि चु  
काँछान छुख। मगर बु छस रुति खानुदानुच तु म्योन रून छुनु गरि। व्वन्य किथु  
पाँठ्य मानु बु चोन ? बनान छु कांह बुछि असि तु पतु पेयी च़े ति प्यतरुन तु मे ति।  
जान गव यि जि चु यि साँतु, राँच हंदि ग्वडुनिकि पँहरु सोन। तमि सातु आसन  
साँरी साँतु वोसु द्रोसि मंज मस तु च़े बुछी नु कांह।

यि बूज़िथ त्राँव तँम्य तस थफ यलु मगर कैह कदम पँकिथुय वँरुस राजु संद्य  
गोरन थफ। तँमिस निशि ति म्वकुलोव तमि यि वँनिथ पान जि तस पजि साँतु,  
राँच हंदि दोयिमि पँहरु युन। तँम्य ति त्राँव स्व यलु तु स्व पँच ब्रौह कुन। साँरिसुय  
पानस आँसुस थरु थरु । हना पँकिथुय रँटुस वथ काँज्य। मुश्किलन कोर तमि  
त्रेयिमि पँहरु प्रारुनुक वादु वँरिथ राँज्य तु वाँच गरु। अति वोनून पनुनि नोकुरानि  
सोरुय। पतु लँज साँचुनि 'जान खानुदानुचि ज़नानि येलि पनुन बाँच गरि आसि  
न। तु तँम्यसुंदिस हुस्नस प्यठ प्यन व्वपरन हंजु बद नज़रु, तेलि छु तस मोत  
बेहतर।' तमि राँच अअव नु तस कैह ख्यनु तु न आयस नैदर। स्व आँस सिर्फ  
पनुनि शक्ति ल्यलु करान। दोयिमि दूह सूज़ तमि सुबहय पनुन्य नोकुराँन्य हेरन  
गुप्तस कैह र्वपुयि मंगुनि। वोनूनस जि तस छु ब्रह्मनन साल करुन। हेरन गुप्त  
आव तस निश तु वोनूनस 'ग्वडु कर मे लोल बँरिथ दिल ख्वश तु पतु दिमय बु च़े  
सु अमानत युस चाँन्य बाँचन मे निश थोवमुत छु।' यि बूज़िथ लँज स्व साँचुनि जि  
तस छुनु कांह शहादत जि तँम्य संद्य रुन्य छु तस अथि पनुन पाँसु टूक थोवमुत।  
तस तोग बोज़ुन जि हेरन गुप्त सौदागर ओस कँमीनु तु अमि एहसासु गव तस  
काँफी रूहाँनी सदमु । तमि वोन तस तमी राँच हंदि चूर्यमि पँहरु यिनु खाँतर। यि  
बूज़िथ द्राव हेरन गुप्त ख्वश ख्वश पाँठ्य।

येलि स्व साँतु राथ वातुन्य हेचुन, तमि ओन अँकिस बानस मंज चाँग्य कज़ुल।  
अथ रलुवुन तील, नाफु तु बाक्य ख्वशबू तु यि मोथुन च्वन ज़ेछन कपर र्यलन।  
बेयि बनावुनोवुन अख बोड बारु साँदूक यथ नेबर्य हाँकल आँस। येलि साँथ वोट,  
शाहजादु सुंद वँज़ीर आव ग्वडुनिकि पँहरु स्यठाह शूबदारी सान। सु च़ान अंदर तु  
काँसि ति बुछ नु। उपाक्वशि वोनूनस 'ग्वडु कर श्रान, अदु करु बु च़े सुत्य कथ।

गछ अछ अंदर तु कर श्रान।' तँम्य अहमकन मोन यि तु उपाक्वशि हुंजव नोकुरान्यव न्युव सु अंदर अँकिस अनि गटि कुठिस मंज। अकि नोकुरानि कँड्यनस सॉरी पलव तु जवॉहिरात। सॉरिसुय पानस कोरुनस कजुल तु कपर र्यल दिचुनस श्रानु पटु खॉतर। वुनि आसु नोकुरानि वँजीरुसुय तन नावान जि रॉच हुंद दोयुम पँहर वोत तु राजु सुंद गोर चाव ओर। नोकुरानि वोन वँजीरस 'राजु सुंद गोर आव योर, युस वरारुची सुंद रुत दोस छु। चु अछ ताम यथ संदूकस मंज। तिमव बोर सु अँथ्य हालुतस मंज संदूकस तु नेबुर्य कँरुहँस हाँकल। गोर ति आव अंदर श्रान करुनावनुकि हीतु चानुनु। सॉरी पलव तु वस नीहँस। हाय मँछुहस तु यीतिस कालस मंज आव काँज्य। यि खबर बूज्जिथ गव गोर परेशान तु नोकुरान्यव बोर सु ति संदूकस। अमि पतु आव काँज्य अंदर चानुनु तु सु ति वोत संदूकस मंज कजुल मँथिथ। यिमन त्रेशवुन्य बास्यव जि तिम आयि नर्कनिस चँकिस बरनु तु खौफु किन्य फूरुख नु कथ ति। उपाक्वशि चोन चोंग जॉलिथ सौदागर अँथ्य कमुरस मंज तु मौंगुनस पनुन अमानथ। तस वँमीनस ऑस राय जि तति छुनु कुहुन्य, तु वोनुनस ' मे कोरुय ना चे वादु जि यिमु र्वपुयि चॉन्य रुन्य मे निशि थविमचु छे, तिमु दिमय बु चे वापस। उपाक्वशि दिच संदूकस कुन क्रेख 'ही दिवताहव, अथ कथि रीज्जिज्यवु शहादथ।' यि वँनिथ कोर तमि चोंग छयतु तु हेरन गुप्तस ति आव श्रान करनु खॉतर वनुनु। पलव कँडिथ मोथुख तस कजुल। यीतिस कालस फोल गाश। नौकुरान्यव वोन तस गछनु खॉतर। तँम्य येलि नेरुनस वायि कोर, गर्दनि कँरुहस थफ तु कोडुख न्यबर। श्रानुपठ लाठस मंज गव सु कोचु गल्यव मँज्य हाय मँथिथ गरु कुन तु हून्य लँगिस व्वगुनि। गरि लजि तस नौकुरानि कजुल तुलुनि। तस आसु नु शर्मि किन्य तिमन कुन अँछ ति व्वथान। बेशक छे पापुच वथ स्यठाह दुखदायक। येलि सुबुहस गाश पूर आव, उपाक्वशि वोन नु मॉलिस माजि किहीन्य तु स्व गँयि पनुनि नौकुरानि ह्यथ राजस पँरियाँद्य। तमि वोन राजु नंदस जि हेरन गुप्तस निश य्वसु दौलथ तँम्य सुंद्य बरुथहन थँवमुच ऑस, सु ओस स्व वापस दिनस यब करान। राजन अनुनोव सौदागर तु तँम्य कोर सॉरिसुय यब। यि बूज्जिथ वोन उपाक्वशि 'राजु, मे छे शहादथ ति। गरि नेरनु ब्रॉह थोव म्यॉन्य बरुथहन ठोकुर सॉब संदूकस मंज तु अँम्य छु तस ब्रॉह कनि अमि कथि हुंद यकरार कोरमुत। तोह्य अनुनॉव्यू सु संदूक तु पानु वँर्यतव मोलूम।'

यि बूज्जिथ गव राजु हॉरान तु संदूक अनुनावनु खॉतरु द्युतुन होकुम। कँचव नफुरव ओन सु संदूक तु अपाक्वशि वोन 'दिवताहव, पोज वँनिव जि येम्य सौदागरन क्याह वोन तोहि ब्रॉहकनि तु पतु गँछिव तोह्य पनुनिस पनुनिस स्थानस।

अगर तोह्य पोज वॅनिव नु, तेलि ज़ालोवु बु तोह्य तु यथ संदूकस मुच़रावु राज़ दरबारस मंज़ ठानु।’

येलि अँदरु तिमव बूज़, तिम गॅयि वारय खोफ़ज़दु तु वोनुख ‘यि छु पोज़ जि सौदागरन कोर असि ब्रोंह कनि अमानतुक यकरार।’ यि बूज़िथ गव सौदागर हयबुंगु तु तॅम्य मोन जि तस निश ओस उपाक्वशि हुंद अमानथ। मगर राज़ ओस शिशदर ह्यु। उपाक्वशि हुंदि इजाज़तु मुच़रोव तॅम्य संदूकस ठानु तु अमि मंज़ु द्रायि चुनि मॅथिथ त्रे नफर। यिम आयि मुश्किलन परज़नावनु। साँरी लॅग्य ठाह ठाह करान असुनि। राज़न प्रुछ उपाक्वशि अथ मुतलिक। तमि पाक ज़नानि वॅन्य तस साँरुय दॅलील। यिम तति आँस्य, तिमव वॅर्य यि वॅनिथ उपाक्वशि हुंद तॉरीफ़ जि रुच़न ज़नानन हुंद कर्दार, यिमन महलु खानु बजायि सिर्फ़ पनुन रुत मिज़ाज़ु राँछदर छु आसान, छु यकीनन थ्यकुन लायक।

पनुनिस हमसायि संज़ी आशनि प्यठ बद नज़र थवन वॉल्य तिम च्वशुवय नफर आयि जलायिवतन करनु तु साँरिसुय जादादस कोरुनख राज़न कुर्क। आँखुर कुस बद यखलाक छु फवलान? उपाक्वशि द्युत राज़न स्यठाह यनामु तु वोनुनस ‘अँज्यकि योर छख चु मे बेनि। वर्शन तु उपवर्शन बूज़ यि दॅलील तु तिमन फोल जिगर। प्रथ काँसि रुतिस इनसानस सपुज़ ख्वशी।

अथ दौरान ओसुस बु सख तपस्या करान। पार्वती हुंद साँमी तु म्योन इष्टदेव बगवान शिव गव ख्वश त। तॅम्य वॅन्य मे ग्रैमरुक्य तिम असूल यिम तॅम्य पानुनीयस वॅन्यमुत्य आँस्य। बगवान शिवु संज़ि मरज़ी मुताँबिक दिच़ मे तिमन तरतीब तु तफसीर। शादाब सपदिथ वोतुस गरु वापस। थकुन बास्योम नु रछ ति तिव्याज़ि मे ओस चंद्रशेखर संज़ि वॉनी हुंद अमृत चोमुत। गरु वॉतिथ कॅर मे माजि तु ग्वरस पादन पूजा तु तिमन निश बूज़ मे उपाक्वशि हुंज़ दॅलील। हाँराँनी तु शादमाँनी सुत्य फोलुम जिगर तु पनुनि आशनि खॉतरु बासेयम लोलु मन्कल वुहान।

म्यॉन्य गुरु वर्शन वोन मे नौव व्याकरन बोज़नावनु खॉतरु तु म्यान्यव वुठव लोग यि क्वमार पानु बोज़नावुनि। व्वन्य प्रुछ व्यादी तु यँद्रदत्तन पनुनिस गुरु वर्शस जि तिम क्या दिन तस गुरु दक्षना। तॅम्य वोनुख ‘मे दियिव दॅह लछ मोहरु। तिमव मोन तु वोनुख मे ‘चु व्वलु असि सुत्य। अँस्य गछव राज़ नंदस तु तस मंगव दक्षना तिव्याज़ि, बेयि कति बनन दॅह लछ मोहरु? राज़ नंदस छे नमुनमथ करोर मोहरु।

बेयि छे तँम्य चॉन्य आशेन्य वारियाह ब्रौह बेनि बनाँवमुच। यिथु वँन्य छुख चु तस बेमु। असि ति गछि चानि खॉरातु मुश्किल हल।’

अँस्य त्रेशुवय ग्वरुबॉय द्रायि तु गँयि अजोद्यायि योत अमि विजि राजु नंद गोमुत ओस। मगर युथुय अँस्य ओर वॉत्य, राजु नंद गव मँरिथ। सॉरिसुय प्रजायि मंज वोथ वावेला तु अँस्य गँयि ना-व्वमेद। यँद्रदत्त ओस योग ज्ञानान। तँम्य वोन मे जि अचि म्वरदु राजु सुंदिस मँरिस मंज तु बु करु तँमिस दरखास तु सु दियि मे स्वनु मोहरु। तीतिस कालस करि व्यादी तँम्यसुंदिस बदनस रॉछ योताम सु अथ मंज वापस यियि। यि फॉसलु वँरिथ चाव यँद्रदत्तुन रूह राजु नंदुनिस मँरिस। येलि राजु जिंदु गव, सॉरी लुख गँयि ख्वश। व्यादी रूद अँकिस प्रॉनिस मंदुरस मंज यँद्रदत्तुनिस मँरिस रॉछ तु बु गोस राजस निश। अंदर अँचिथ कोरुमस नमस्कार तु दँह लछ मोहरु दिनु खॉतरु वोनुमस युथ बु गोरस दक्षना ह्यकु दिथ। तँम्य वोन वँजीर शक्तलस मे मोहरु दिनु खॉतरु। वँजीरस गव शख तिव्याजि राजु ओस मँरिथ जिंदु गोमुत तु सॉयिलस ओस यकदम ति म्यूलमुत, येमि खॉतरु तँम्य दरखास कोरमुत ओस। वँजीर शक्तल ओस ऑकुल तु ऑकुल क्वसु कथ छुनु सनजान? वँजीरन वोन ‘बु करु आज्ञा पूर।’ मगर पानस सुत्य लोग सौंचुनि ‘अस्ल राजु नंदुन नेचुव छु ल्वकुट तु प्रथ तरफु छि दुश्मन ऑस वाहरॉविथ। म्यानि खॉतरु छु यी बेहतर जि अँम्यसुंद यि शरीर थवु बु फिलहाल तख्तस अँथ्य मूजूदु हालतस मंज।’ यि इरादु वँरिथ द्युत तँम्य होकुम जि सॉरी म्वरदु शरीर गछन जालनु यिन्य। प्रथ तरफु सूजिन म्वरदु छांडनु खॉतरु जोसूस। यँद्रदत्तुन शरीर ति आव लबनु। व्यादी मंदरु मंजु न्यबर वँडिथ ज़ोलुख यि शरीर ति। हुपॉर्य कोर राजन मोहरु दिनस चार मगर शक्तलन वोनुनस ‘महाराज सॉरी छि तुहंदिस जिंदु गछुनस प्यठ शॉद्यानु करान तु सॉरी मुलॉजिम छि खुशी सुत्य मस। यि ब्रह्मन रॉरिन तु बु दिमु अँमिस म्वहरु। अँथ्य मंज आवव्यादी ब्रह्मन ति तु कोरुन बडि हटि पँरियाँद्य ‘राजु, मे वँरिव सहायता। अँकिस ब्रह्मनु सुंद मोर, युस योग साधुनायि मंज ओस तु येमि सुंज जिंदुगी वुनि बाक्य ऑस, आव जबरन जालनु। महाराज, यि बे-इन्साँफी सपुज तुहंदिस दौरस मंज।’ यि बूजिथ गव नकली राजुनंदस (यँद्रदत्तस) अँदुरी गॉयिलु तु कथ ति फूरस नु। येलि शक्तलस बोजुन तोग जि यँद्रदत्त हेकि नु व्वन्य सु शरीर त्रॉविथ, तँम्य दिचु मे दँह लछ मोहरु।

योगानंदन याने यँद्रदत्तन वोन ल्वति पॉठ्य व्यादी ब्रह्मनस ‘अफसूस, जि ब्रह्मन ऑसिथ बन्योस बु चंडाल। यि सॉरुय राजुसी छे म्यानि खॉतरु बे-मतलब।’ यि

बूज़िथ द्युत तस व्यादीयन तसली तु वोनूनस 'शक्तलस छु चानि असलियेँच हुंद पय लोगमुत। येति योर वॅर्यजि एहतियात तिव्याजि सु छु आँकुल। येति तस मोकु मेलि, सु करी चे खत्म तु बनावि राजु नंदुनिस नेचिविस राजु। च्चु बनावुन वरारुची पनुन मंत्री युथ सु पनुनि अक्लि चॉन्य हकूमत बिलकुल पायदार बनावि।' यि वॅनिथ द्राव व्यादी म्वहर ह्यथ पनुनिस गुरुहस दिनु खॉतरु तु योगानंदन बनोवुस बु पनुन वॅज़ीर। मे वोन तस 'योदुवय चोन ब्रह्मन दरजु खत्म सपुद, मगर मे छुनु तोताम चोन तख्त महफूज़ बासान योतान्य शक्तल येति छु। जान रोज़ि यि कुनि हीतु खत्म करुन।' अमि पतु बोर शक्तल योगानंदन कँदिलस तँम्य सुँद्य हथ नेचिव्य ह्यथ तिव्याजि तस प्यठ ओस अख ब्रह्मन जिंदय ज़ालुनुक जुरुम आँयिद सपुदमुत। तिमन सारिनय आँस प्रथ दूह अख वुश्कु कवुल्य तु अख त्रेशु कवुल्य दिनु यिवान। अवु मूजुब वोन शक्तलन पनुन्यन नेचिव्यन 'अख इनसान ति हेकि नु यथ ख्यनस प्यठ जिंदु रूज़िथ, असि सारिनय हुंज़ छेनु कथुय। अमि किन्य छयस बु यछान जि यि वुश्कु ख्यवन खेयि असि मंज़ सिर्फ सु अख युस योगानंदस बदलु हेकि ह्यथ।' तँम्य सुँद्यव नेचिव्यव वोन यक ज़बान सपदिथ मॉलिस 'तोही यॉत्य हेकिव तस बदलु ह्यथ, अवु मूजुब वाति त्वही यि ख्यन ख्यथ जिंदु रोजुन।' व्वन्य ओस शक्तल कुनुय ज़ोन दूहय ख्यन ख्यवान तिव्याजि गॉरत मंदन छु जिंदुगी खोतु बदलु ज़्यादु टोठ आसान। शक्तल रूद पनुन्यन फाकु फरि नेचिव्यन हुंद मरुन वुछान तु पानस सुत्य सौंचान 'यस इनसानस ति पनुन रुचर टोठ आसि, तस पज़ि नु काँसि बलवानस ज़ानुनु तु पछ परवानु रोस्तुय तु तँम्य सुंजि मरज़ी खलाफ सौंचनु रोस्तुय कैह करुन।' तँम्य सुंजन अँछन ब्रौह कनि गँयि तँम्य सुँद्य नेचिव्य मरान तु पोतुस रूस सु कुनुय ज़ोन यिमन अँड्यजि क्रंज़न मंज़। यपाँर्य गव यूगानंद पनुन्य मूल डाखुरावान। व्यादी ब्रह्मनन दिच ग्वरस दक्षना तु कैह काल गँछिथ आव यूगानंदस निश। 'म्यानि मेत्र, चोन राज रुज़िन मूजूद मगर मे दि व्वन्य वरखसथ। मे छु तपस्या करनि नेरुन।' यि बूज़िथ आव यूगानंदस ओश तु तँम्य वोनस 'मे निश रोज़ तु म्यानि राज़सी तुल लुत्फ।' व्यादी ब्रह्मनन वोनस 'राज़ु, जिंदुगी हुंद कुस बोरुसु छु ? कुस आँकुल रावुरावि पनुन्य जिंदुगी ख्वखुर्यन आँशन पत ? आँश तु ख्वशहॉली छु अख सराब यिम गाटल्यन दोखु छि दिवान।' यि वॅनिथ द्राव सु तपस्या करनि। अमि पतु गव यूगानंद पाटलीपुत्र पनुनि राज़दानि। बु तु सोरुय फौज गव तस सुत्य। व्वन्य आँस मे ति काँफी ख्वशहॉली तु अँथ्य हालतस मंज़ रूदुस बु वारियाहस कालस। उपाक्वश आँस मे रंजुवान। बु ओसुस राज़स महामंत्री तु म्याँन्य मॉज तु म्योन गुरु आँस्य मे सुत्य। माता गंगा

ऑस म्यानि साधुनायि सुत्य ख्वश सपदिथ मे बे-शुमार दौलथ दिवान। सरस्वती  
ऑस पान मे सलाह मशवर दिवान।

### वरारुची संज्ञ दॅलील :

हनि हनि बन्याव योगानंद वासुनायि हुंद दास तु अकिस यॉग्य हॅस्य सुंद्य पॉठ्य  
लूर्य तॅम्य सॉरी बेरु बॅठ्य। हंगु मंगु अॅमीरी कस डालि नु कॉड्य? यि वुछिथ  
लोगुस बु पानस सुत्य सौंचुनि। 'राज्ञु छु अय्यॉशी मंज्ञ यीरु गोमुत। बु छुस राज्ञु  
काम्यन मंज्ञ त्यूत आवुर गोमुत जि पनुनिस नित्यकर्मस ति छम नु फुर्सथ यिवान।  
मे छु बासान, बु त्रावुनावन शक्तल यलु तु बनावन सु वॅज़ीर तु पनुन सॉथी। अगर  
सु मे खलाफ ति रोज़ि, तोति क्याह करि मे योताम बु महामंत्री छुस।' यि फॉसलु  
कॅरिथ ह्योत मे राज्ञस इजाज्ञथ तु शक्तल त्रावनोवुम यलु। ब्रह्मन छु नर्म आसान  
तु बुदिमान ति। ज़ीरक शक्तलस तोग बोज़ुन जि योताम बु महामंत्री ओसुस,  
तोताम हेकिहे नु सु यूगानंदस तख्तु प्यठु वॉलिथ। तमि किन्य पज़ि तस वाव  
वुछिथ नाव त्रावन्य तु इन्तिकामु खॉतरु किनि जान विज़ि प्रारुन। म्योन मॉनिथ  
मोन तॅम्य मंत्री बनुन तु राज्ञु काम्यन हुंद बार रोदुन पानस प्यठ।

अकि दूह गॅयि दॅलील जि राज्ञु द्राव शहरु न्यबर तु गंगायि मंज्ञ वुछुन अख अथु  
व्वदुनी यथ पांचुवय ऑगुजि म्वठ वॅटिथ अअसु। तॅम्य प्रुछ मे जि अम्युक माने  
क्याह ओस? मे हावि अथस कुन योरु ज़ु ऑगुजि तु अथु गव गॉब। राज्ञस गव  
स्यठाह तॉजुब। मे प्रुछुन जि अम्युक मतलब क्याह ओस? मे द्युतुस जवाब 'यि  
अथु ओस पनुनि पांछ ऑगुजि वॅटिथ यि वनान जि अगर पांछ नफर रलन, तिम  
क्याह ह्यकन नु कॅरिथ। राज्ञु, मे वोनस योरु ज़ु ऑगुजि हॉविथ जि अगर ज़ु  
इनसान ति अकी खयालु आसन, तिम ति ह्यकन खबर क्याह कॅरिथ।' राज्ञु गव  
यि प्रॅच तु अम्युक जवाब बूज़िथ ख्वश मगर शक्तल गव परेशान तिक्याज़ि तस  
बास्यव जि तस खॉतरु ओस नु मे माथ द्युन सॅहल।

### असुवन्य गाड :

अकि दूह वुछ यूगानंदन पनुन्य रॉन्य दारि किन्य अॅकिस ब्रह्मनस सुत्य कथ  
करान। यि वुछिथ गव राज्ञु नारो नार तु तॅम्य द्युत ब्रह्मन फहि दिनुक होकुम  
तिक्याज़ि रकाबत छे अक्लि हुंद चोंग छ्यतु करान। ब्रह्मन आव रटनु तु येलि तस  
मारनु खॉतरु पकुनावान ऑस्य, बाज़रु मंज्ञु त्रोव अकि मूमचि गाडि ठाह ठाह  
कॅरिथ असुन। येलि राज्ञन यि बूज़, तॅम्य करुनोव ब्रह्मन मारुन मुल्लती। मे प्रुछुन

ज़ि गाडि क्याज़ि त्रोव असुन। मे वोनस ज़ि बु दिमु सूचिथ जवाब। बु वोतुस गरु तु वॅरुम सरस्वती हुं आरधना। स्व गॅयि प्रकट तु वोननम 'काँसि पनुन पान हावनु रोस्तुय खस च़ु राथ कयुत खॅज़ुर कुलिस तिहरिस ताम। तँती तरी च़े पानय फिकरी ज़ि गाडि क्याज़ि त्रोव असुन।' यि बूज़िथ द्रास बु राथ क्युत तु खोतुस खॅज़ुर कुलिस तिहरिस प्यठ। पनुन पान थोवुम गुपिथ। केह काल गॅछिथ वुछिम अख हॉबतनाक राक्षसेन्य पनुन्य शुर्य ह्यथ यिवान। तमिव मोंग तस केह ख्यन तु तमि वोनख 'ठहरिव, पगाह सुबुहन ख्यावुनावोवु बु तोह्य अँकिस ब्रह्मनु सुंद माज़, युस नु अज़ मारुनावनु आव।' तिमव प्रुछ माज़ि 'सु क्याज़ि आव नु अज़ मारनु।' तमि वोनख 'सु अअव नु अज़ अमि किन्य मारनु तिक्याज़ि अकि मूमचि गाडि त्रोव तस कुन वुछिथ असुन।' नेचिव्यव प्रुछुस 'गाडि क्याज़ि त्रोव असुन?' तमि वोनख 'राज़ु संज़ु सारेय आशनि छे बदकार। तिमव छे मँहलु किस प्रथ हिसस मंज़ मर्द ज़नानु पलव लॉगिथ थॉव्यमुत्य। यिमन छुनु काह प्रुछान तु अख बेकसूर ब्रह्मन छु मारनु यिवान। अँथ्य प्यठ त्रोव गाडि असुन तिक्याज़ि असुर छि कुनि नतु कुनि शक्लि मंज़ च़ूरि रूज़िथ हमेशु राज़न हुंज़ि कम अक्ली प्यठ असान।' राक्षसेनि हुंद यि तफसीर बूज़िथ वोथुस बु ब्वन। सुबुहस वोनम राज़स ज़ि गाडि क्याज़ि ओस असुन त्रोवमुत? राज़ु गव मँहलस मंज़ तु तति वॅडिन तिम मर्द यिम ज़नानु रख्तस मंज़ ऑश करान ऑस्य तु बिचोर बेकसूर ब्रह्मन त्रोवुन यलु।

### रानी हंदि बदनुक लखचुन :

राज़ु संज़ यि गॉर ओसूली तु गॉर कॉनूनी कार्रवाँयी वुछिथ ओसुस बु परेशान। यिमनुय दूहन आव राज़ु दरबारस मंज़ अकि दूह अख चित्रकार। तँम्य बनावि अँकिस म्वचि दजि प्यठ राज़ु संज़ तु तँम्यसंज़ि पट रानि हुंज़ शक्लि। यिमु दूशुवय तसवीरु आसु तीचु शूबिदार ज़ि दूशुवय ऑस्य ज़िंदु बासान। यिमन ओस हरवँच़ तु ज़ेवि रोस सोरुय। राज़ु गव ख्वश तु तँम्य द्युत चित्रकारस कॉफी यनामु कुठिस मंज़ थोवुन यि कारनामु अवेज़ान। अकि दूह च़ास बु अथ कुठिस मंज़। खबर क्याज़ि आम यि खयाल ज़ि रानि हुंज़ि शक्लि मंज़ छिनु तिम साँरी निशानु यिम रुत अज़लु लोन हावान छि। दोयुन निशानु वुछिथ द्युत मे पनुनि जायि च्यथ तु वोतुस अथ नँतीजस प्यठ ज़ि रानि गछि हँलिस प्यठ ति लखचुन आसुन। यि सूचिथ बनोव मे अथ जायि लखचुन। येलि राज़ु यूगानंदन यि वुछ, तँम्य कोर मोलूम ज़ि ओर कुस ओस च़ामुत? तँम्य बूज़ ज़ि बु ओसुस तोर च़ामुत तु मेय ओस सु लखचुन बनोवमुत। यूगानंदस खोत सख खश्मु तु सु लोग सोंचुनि 'मे रोस छनु अमि निशानुच काँसि ज़ान तिक्याज़ि बदनुकिस अथ हिसस छु परदु आसान। तेलि



किथु पाँठ्य लॅज वरारुचीयस अमिच खबर? शायद छु तस म्योन ज़नानु खानु आयितन तु तवय वुछ तॅम्य तिम मर्द यिम तति ज़नानु रख्तस मंज़ ऑस्य।’ अहमकन छि हमेशि यिथी हिशर वनि यिवान। तॅम्य अनुनोव शक्तल नाद दिथ तु वोनुनस ‘चु मारुन वरावुची तिक्याज़ि तॅम्य छि म्यॉन्य पटरॉनी फसाँवमुच। शक्तलन वोनुनस ‘महाराज, होकुमस सपदि ताँमील।’ सु द्राव तु ओस साँचान ‘मे पज़ि नु वरारुची मारुन तिक्याज़ि तस छि दिवतुहन हुंज़ ब्वद्धी। तॅम्य म्वकुलोवनस बु काँदिलु मंज़। सु छु ब्रह्मन। बेहतर छु ज़ि बु करन सु पनुनि तरफु तु थवन गुपिथ।’ यि फाँसलु कॅरिथ अअव सु मे निश तु वोनुन मे राज़ु संज़ि नाराज़ुगी मुतलिक। पोतुस वोनुन ‘मगर मे पेयि बेयि कांह मारुन युथ राज़ु शेछ बोज़ि। मगर चु बेह म्यानि गरि युथ ब्रॉकुन चु मे अँमिस वासुनायि मँतिस निश बचाँविथ ह्यकख।’ तॅम्यसुंद सलाह माँनिथ रूदुस बु तॅम्यसुंदि गरि। रोटुलि मारुनोव तॅम्य बदल कुसताम। मे वोन तस लोलु सान ‘चे कोरुथ पनुन पान अख महान मंत्री साँबित तिक्याज़ि चे मारुनोवुथस नु बु। वं गव यि वनय ज़ि मे हेकि नु कांह माँरिथ तिक्याज़ि मे छु अु राक्षुस दोस, युस महज़ खयाल करनु सुत्य मे निश वाति तु म्यॉनिस वनुनस प्यठ करि साँरिसुय डास। राज़ु छु चकि ब्रह्मन, म्योन दोस यँद्रदत्त, तु बु छुस नु यछान ज़ि सु ति गछि मरुन।’ यि बूज़िथ वोन तॅम्य ‘मे ति हावतन सु राक्षुस।’ मे कोर राक्षुस सुंद द्यान तु सु प्यव वाँतिथ। तस वुछिथ गव शक्तल हाँरान तु खौफ़ज़दु। राक्षुस द्राव तु शक्तलन प्रुछ मे ज़ि सु किथु पाँठ्य ओस मे दोस बन्योमुत? मे वोनुस ‘वारियाह काल गव तनु ज़ि शहरस मंज़ लॅग्य रेंदु वॉल्य गाँब गछुनि। यि हाल वुछिथ द्युत राज़न पुलसु म्यानि मातहती मंज़। बु द्रास राथ क्युत पानु ति गश्त करनि। गश्त करुनस दौरान वुछ मे अख राक्षुस ओरु योर फेरान। तॅम्य प्रुछ मे ज़ि शहरस मंज़ क्वसु ऑस हँसीन तँरीन ज़नानु माननु यिवान। यि बूज़िथ चोल मे ठाह ठाह करान असुन नीरिथ तु वोनुमस ‘चार्याह, युस ति मर्द काँसि ज़नानि लोल बरि, स्व छे तस हँसीन तँरीन बासान।’ यि बूज़िथ वोन तॅम्य ‘चुय योत छुख सु इनसान येम्य बु पोज़ वँनिथ हारुनोवनस।’ तॅम्य सुंदिस सवालस जवाब दिथ ओस मे पनुन पान बचोवमुत तु तॅम्य वोन मे ‘बु छुस चानि अक्लि ख्वश। अँज़्यकि योर गोख चु मे दोस। येलि ति चु मे याद करख, बु वातु चे निश।’ यि वँनिथ गव सु गाँब तु बु आस वापस। अमि पतु करुनोव मे शक्तल माता गंगायि हुंद इनसाँनी शक्लि मंज़ दर्शान, तु अति ओर बन्यव सु म्योन काँबिल एतिमाद दोस।

गुपिथ रूज्य रूज्य आस बु तंग तु अकि दूह वोन मे शक्तलन 'यूथ ज्ञांनी आँसिथ क्याजि छुख चु ना-व्वमेद ? चे छुय ना मोलूम जि राजन हुंद मन छु चंचल आसान। अँती तोलु, अँती माशु। मे छु वेश्वास, कमय कॉल्य यिन चॉन्य सॉरी इलजाम छलनु। बोज, बु बोजुनावथ अख दँलील।

### शिव वर्मन :

दपान प्राणि वख्तु ओस अख राजु यस आदित्य वर्मन नाव ओस। अँमिस ओस अख आँकुल वँजीर यस शिव वर्मन वनान आँस्य। अकि दूह बूज राजन जि तँम्यसंज अख आशेन्य छि बँरुच। यि बूजिथ गव सु नारो-नार। तँम्य अँन्य मँहलु खानुक्य रॉछदर सॉबुरिथ तु वोनुनख 'त्वहि छु मोलूम, जु वँरी गँयि मे अँमिस रानि हुँदिस हर्मस मंज अचुनस। तेलि किथु पॉठ्य छे स्व ग्वबि ख्वर ?' तिमव वोनुस 'महाराज, मँहलु खानस मंज छुनु शिव वर्मनस बगॉर कांह अचान नेरान। तस प्यठ छनु ओर अचुनस कांह पाबंदी।' यि बूजिथ लोग राजु सॉचुनि 'यि प्यार करुन छे शिव वर्मननुय गदॉरी। मगर सु छु लुकन मंज मकबूल, अमि किन्य रोजि नु सु ननिवानु मारुनावुन जान।' यि सँचिथ सूज राजन शिव वर्मन बहानु वँरिथ कथ ताम कामि पनुनिस हमसायि राजयोग वर्मनस निश। पतु सूजुनस अख र्वकु यथ मंज शिव वर्मन मारनु खॉतर वोनुनस।

यपॉर्य लँज ग्वबि ख्वर रानि पनुन राजु नोन गछुनुच फिकिर। तमि वँर अँकिस ज़नानि सुत्य चलनुच कूशिश मगर दूशुवय रँट्य पँहरु दरव। यि आव वुछनु जि दोयिम ज़नानु आँस चकि ज़नानु रख्तस मंज मर्द। पज़रुक एहसास सपदिथ गव राजु पनुनिस कॉबिल वँजीरु सुंदिस मारुनस प्यठ दिल मलूल। यपॉर्य वोत शिव वर्मन योग वर्मननुनिस दरबारस मंज। अकि दूह वोन तस योग वर्मनन जि अअदित्य वर्मनन छु तस शिव वर्मन मारनु खॉतर वोनमुत। यि बूजिथ वोनुस शिव वर्मनन ' मे मार। अगर चु मे मारख नु, तेलि मारु बु पानय पनुन पान।' यि बूजिथ गव योग वर्मन हॉरान तु प्रुछुनस 'ऐ ब्रह्मन, यि क्या दँलील छे ? चु क्याजि मारख पनुन पान ?' आँकुल शिव वर्मनन वोनुनस 'राजु, यथ मुल्कस मंज ति बु मारनु यिमु, तति पेयि नु बाहन वँरियन रूद।' यि बूजिथ वोन योग वर्मनन पनुनिस वँजीरस 'राजु आदित्य वर्मन छु चकि बद-खसलत। सु छु यछान जि म्यॉन्य राजुसी गछि बरबाद सपदुन्य। नतु हेकि हे ना सु शिव वर्मनस पनुनिस मुल्कस मंजुय ल्वति पॉठ्य मॉरिथ ? असि पजि नु शिव वर्मन मारुन।' तँम्य कोर शिव वर्मन पनुनि मुल्ककि हदु न्यबर। शिव वर्मनन बचोव पनुन पान पनुनि अक्लि सुत्य।

यपौर्य आँस्य तँम्यसुंघ इलजाम ति छलनु आमृत्य। पजुरस छुनु कांह जवाल आसान। ऐ कात्यान (वरारुची सुंद दोयुम नाव)! रोज आराम सान। वुछ यि राजु ति किथु पॉठ्य पछतावि ? शक्तलुन सलाह मॉनिथ रुदुस बु बेयि केंचस कालस तँम्य सुंदि गरि खँटिथ।

### हिरन्यगुप्त तु हापुत :

ऐ कानुभूती, वारु बोज। अकि दूह गँयि दँलील जि यूगानंदुन नेचुव, यस हिरन्यगुप्त नाव ओस, गव शिकारस तु कुनुय ज़ोन गव दूर तामथ नीरिथ। यीतिस कालस गव शाम तु सु खोत अँकिस कुलिस। कँह चिह्य गँछिथ खोत अँथ्य कुलिस अख हापुत ति युस सुहस खूचिथ चोलमुत ओस। येलि तँम्य शाहज़ादु वुछ, तँम्य वोन तस इनसानु आवाज़ि मंज 'खोच मु, चु छुख मे दोस।' यिथु वँन्य कोर हापुतस तस तकलीफ नु वातुनावुनुक वादु तु शाहज़ादन त्रॉव तस येतिबार कँरिथ नँदुर। हापुत रूद हुश्यार। ब्वनु कनि ओस सुह तु तँम्य वोन हापुतस 'हापुता, दिन यि इनसान ब्वन दॉरिथ। बु ख्यमन तु गछु पानस।' हापुतन वोनस 'ज़ॅलीलाह, बु मारुनावनु पनुन दोस?' शाहज़ादु वोथ नँदुर कँरिथ तु व्वन्य शॉग हापुत। सुहन वोनस 'ऐ इनसानु! दिन यि हापुत दॉरिथ।' सु ओस सिर्फ पनुन पान बचावुन यछान, तु सुह ख्वश करनु खॉतरु ह्योत तँम्य हापुत दॉरिथ द्युन। मगर तकदीरन कोर सु हापुत हुश्यारु तँम्य द्युत तस शाफ 'गछु च़े डॅलिनय कॉड्य, तिक्याज़ि च़े कोरुथ यारस विश्वासघात। येलि कांह त्रेयिम यि सोरुय ज़ानि, तेलि म्वकुली च़े शाफ।' येलि शाहज़ादु गरु वोत, तस डॅल्य कॉड्य। यि वुछिथ गव तसुंद मिल राजु यूगानंद न्यराश तु परेशान। तँम्य वोन 'काश वुन्यक्यस आसिहे वरारुची जिंदु। बलाय मे, येम्य सु मारुनोव।' राजु लोग वेलुजॉरी करनि। यि वुछिथ सूच शक्तलन 'योहय छु कात्यान नोन कडनुक मोकु। सु छु गॉरतु वोल इनसान। सु रोजि नु येति ति। पतु रोजु बय सोरुय कर्ता दर्ता।' यि सूचिथ वोन तँम्य राजस मॉफी मँगिथ 'राजु, चु मु गछु ना-व्वमेद। वरारुची छु जिंदय।' राजु गव यि बूजिथ ख्वश तु बु आस दरुबारस मंज अनुनावनु। मे वुछ शाहज़ादु सुंज हालत। माजि सरस्वती हुंजि विद्यायि वोन मे जि सपुदमुत क्याह ओस। मे वोन तस 'राजु, शाहज़ादन छु पनुनिस मेत्रस विश्वासघात कोरमुत।' शाहज़ादस म्वकुल्योव शाफ। तँम्य वँर्य मे तॉरीफ तु राजन प्रुछ मे जि मे किथुवँन्य ओस फिकरी तोरमुत जि क्या ओस सपुदमुत? मे वोनस 'राजु, ऑकल छि हालात वुछिथ तु सॉचस द्रसु दिथ वनान जि सोदमुत क्या छु? शाहज़ादु सुंज दँलील तँज मे तिथय पॉठ्य बोज़ुन्य यिथु

पाँठ्य मे यि बास्योमुत ओस जि तुहंजि पटरानि गछि हँलिस प्यठ ख्वशबख्ती हुंद लखचुन आसुन।’

यि बूजिथ गव राजु शरमंद तु तस कुन द्युत नु मे कांह तवज्जूह। पनुनि बदनामी हुंद दाग छलनु यिनु सुत्य ओस मे सोरुय प्रोवमुत। तिव्याजि आँकुल छु किर्दारस बँड दौलथ मानान। बु वोतुस गरु तु तति लँग्य नौकर रिनुनि। म्याँन्य गुरु उपवर्शन वोन मे ‘येलि उपाक्वशि यि बूज जि राजन द्युतुख चु फहि, तमि कोर पनुन पान सँती। तु अमि द्वखु सुत्य फुट चानि माजि हुंद दिल ति।’ यि बूजिथ गोस बु हयबुंग तु सोतिथ प्योस पथर। रिनुन वोथ सॉरिसुय। पनुन्यन हुंद द्वखु नार कस छुनु सूर करान। वर्ष अअव मे निश तु वोनुन ‘यथ नाशवान जगतस मंज छुनु होसलु रोस कांह चीज सवर। यि छे सॉरुय परमीश्वरु संज माया तु चु क्याजि छुख अमिकिस ब्रेमस मंज यिवान।’ यिमु कथु बूजिथ लोब मे पानस प्यठ कोबू। हना करार लँबिथ ति लोग नु मे दुनियँहस सुत्य दिल। मे तरोव सोरुय दुनियाँवी हश्मत। सोरुय कोरुम त्याग तु द्रास बाक्य तपस्या करन वाल्यन कुक तपस्या करुनि। केह दूह गँयि। अकि दूह आव यिमन तपु रेश्यन निश अख मनुश्य तु मे प्रुछ तस यूगानंदुनि हकूमच मुतलिक। तँम्य परजुनोवुस बु तु अफसूस वँरिथ वँनिनम यि दँलील।

### शक्तलुन इन्तिकाम :

‘बोज, चे पतु क्या सपुद राजस’ तँम्य लोग वनुन। ‘शक्तलन ज़ोन अकि दूह मोकु राजस ददार वातुनावुनस। सु ओस हमेशु सौंचान जि किथु वँन्य हेयि तस बदलु। अँथ्य मंज वुछ तँम्य अकि दूह अख ब्रह्मन यस चांकिया नाव ओस तु युस अँकिस जायि वथ खनान ओस। तँम्य प्रुछ तस जि सु क्याजि ओस वथ प्राटान ? चांकिया वोथुस ‘बु छुस दँरुब प्राटान तिव्याजि अमि सुत्य लोग मे ख्वरस त्रुक।’ यि बूजिथ सूच शक्तलन ‘यस ब्रह्मनस यीच चख खसि तु यस युथ यरादु आसि, सुय योत हेकि राजु नंदस नाश वँरिथ।’ तँम्य प्रुछ तस नाव तु वोनुनस ‘ब्रह्मन, ज़ून पछी त्रुवुश दूह छु राजु नंदुनि श्राद। चे मेली लछ म्वहरु दक्षना तु चु बेहख सारिनुय प्यठ कनि। तोताम रोज चु म्यानि गरि।’ श्रादु दूह ओनुन सु पानस सुत्य। चांकिया ब्यूठ प्यठ कनि मगर राजु नंदुन्य ब्रह्मन शुबंधूनन मोन नु ब्वनु कनि ब्युहुन। शक्तलन प्रुछ राजस तु तँम्य वोनुस जि शुबंधू गछि प्यठ कनि ब्युहुन तिव्याजि अथ जायि छु तँम्यसुय बेहनस हक। शक्तलन वोन चांकियहस सोरुय तु ज़ारु पारु वँरिथ वोनुनस जि अथ मंज छुनु तस कांह कोसूर। चांकियँहस खोत खश्मु। तँम्य मुचरोव पनुन छोग तु कोरुन कसम ‘ राजु नंद करन बु सिर्फ सतन दूहन मंज

खत्म, अदु करु बु छॉगिस बेयि गंड। यि वॅनिथ द्राव चांकिया तु शक्तलन थोव सु पनुनि गरि। अमि पतु कोर चांकियँहन अख हवन तु अमि सुत्य खोत यूगानंदस मरनुक तफ तु सँत्यमि दूह मूद। शक्तलन ओस तँम्यसुंद नेचुव ब्रोंदुय मोरमुत। पतु बन्यव चंद्रगुप्त युस प्रॉनिस नंदु राजुन नेचुव ओस, राजु। तँम्य बनोव चांकिया पनुन महामंत्री तिक्याजि सु ओस तद्दुबुरस मंज बृहस्पँतियस बराबर। शक्तलन ओस पनुन सोरुय मक्सद पूर कोरमुत। तँम्य त्रोव सोरुय तु गव जंगल।

‘ऐ कानुभूती! ब्रह्मनस निश यि सोरुय बूजिथ गव मे सख अफसूस। चकि छु यि सोरुय जगत अख बॉज्यगर तमाशु। अमि पतु वोतुस बु दुर्गा मातायि हुंदिस मंदुरस मंज। तमि वोनुम चोन पय तु चुय वुछिथ प्योम पनुन प्रोन ज़नम याद। मे वॅनी च़े बृहतकथा। व्वन्य म्वकुल्योव मे शाफ तु व्वन्य प्रारु बु यि मोर त्रावुनस। मगर च़ु रूज्यजि येती। योर वाति अख ब्रह्मन यस गुनाड्य नाव छु। तँम्य छे त्रे ज़बॉन्य मँशुराविमच़ु छे तु शेश्य छिस अँद्य पँख्य सुत्य। म्यॉन्य पॉट्य छु पार्वती तस ति शाफ द्युतमुत। सु छु च़कि अख गन, महादीवु सुंद सीवक, मॉल्यवान छुस नाव मगर म्यॉन्य कथ करनु खॉतरु बन्यव सु नाशवान। च़ु बोज़ुनॉव्यज्यन सु स्व दँलील य्वसु च़कि शिवन वँन्य। अदु म्वकुलिव तोह्य दूशवय शापु तलु।

कानुभूतीयस यि सोरुय बोज़ुनॉविथ द्राव वरारुची बद्रिका तीर्थस कुन युथ तति पनुन शँरीर त्रावि। पकान पकान वुछ तँम्य गंगायि बँठिस प्यठ कंदु मूल ख्यनु वोल अख र्योश यस दर्बि सुत्य अथु छ्योन। वरारुचियन कोर पनुनि रूहॉनी ताकतु सुत्य तस अज़मावनु मूजुब तँम्य सुंद रथ कंदु मूल रसस मंज तबदील। यि वुछिथ गव सु र्योश ख्वश तु वोनुन ‘बु छुस सिद्ध बन्योमुत।’ तस बास्यव पनुन पान सिद्ध। यि वुछिथ त्रोव वरारुचीयन असुन तु वोनुनस ‘मे कोर चोन रथ कंदु मूल रसस मंज तबदील च़ु अज़मावनु खॉतरु। मगर च़े छुय नु वुनि ति किबुर त्रोवमुत। किबुर छु ज्ञानुचि वति मंज बोड दुश्मन तु योताम ज्ञान तु इरफान अअसि नु, तोताम कति मेलि मुक्ती, कति बनि नजात। स्वरगुक स्वख ति छु नाशवान तु स्वर्ग ति छुनु मुक्ती गारन वॉलिस वति डालान। ऐ तपस्यवी, किबुर त्राव। अदु प्रावख सु ज्ञान युस मुक्ती हुंद ज़रियि छु।

सु र्योश प्यव तस परन तु वरारुची गव बँद्रीनाथुचि तसकीन बँरचि जायि कुन। तति वँरुन माजि पार्वती हुंज साधुना तिक्याजि व्वन्य ओस सु शँरीर त्रावुन यछान। तमि होव तस असुल शक्ति मंज दर्शुन तु वोनुनस स्व साधुना करनु खॉतरु य्वसु

तस भस्म करि। यिथु वॅन्य कोर वरारुचीयन हनि हनि पनुन शॅरीर भस्म तु वोत पनुनि जायि वापस। विंद्यावनस मंज़ रूद कानभूती अँछ्य पुतुन्य वॅरिथ गुनाढ्यस वत वुछान।

मॉल्यवान रूद वारियाहस कालस इनसान शक्लि मंज़ वनु वनु फेरान। व्वन्य ओस तस गुनाढ्य नाव। सु ओस राजु सत्वाहनस निश ति। अकि कस्मु मूजुब त्रॉव तॅम्य राजस ब्रॉह कनि संस्कृत तु बेयि दून ज़बान्यन मंज़ कथ बाथ करुन्य तु द्राव तति। स्यठाह दूखी हालँच मंज़ वोत सु दुर्गायि निश य्वसु विंद्या पर्वतस प्यठ ऑस। तमि वोनस कानभूती छंडनु खॉतर। पतु पेयि तस पनुन्य असली हालत याद तु सु ज़न गव मचि नॅद्री हुश्यार। कानभूतीयस पनुन्य ज़ान पिशाच ज़बानि मंज़ करनॉविथ, तिक्क्याज़ि तॅम्य ओस बाक्य त्रे ज़बॉन्य मॅशुरावनुक कसम कोरमुत, वोन तॅम्य तस 'म्यानि दोस्तु, स्व दॅलील बोज़ुनाव चु मे वॅल्य वॅल्य य्वसु चु पुष्पदंतन बोज़ुनोवुख, युथ अँस्य दूश्वय शापु तलु म्वकलव।' यि बूज़िथ गव कानभूती ख्वश तु डंडुवथ वॅरिथ वोनस ' बु बोज़ुनावथ चु स्व दॅलील मगर चानि येमि ज़न्मुक्यन कारुनामन हुंज दॅली बोज़ुनुक छुम सख शोक। यि एहसान कर मे।' तॅम्यसुंद यि ज़ारु पारु बूज़िथ कॅर गुनाढ्यन पनुन्य दॅलील शुरू।

### गुनाढ्य संज दॅलील :

मुल्क प्रतिष्टानस मंज़ ओस अख शहर यथ सुप्रतिष्ठा नाव ओस। अति ओस अख व्यद्वान ब्रह्मन रोज़ान यस सोमशर्मन वनान ऑस्य। म्यानि आदन यारु, तस ब्रह्मनस ऑस्य ज़ु नेचिव्य, वत्स तु गुलमक। बेयि ऑसुस अख कूर यस श्रुतर्था नाव ओस। कैह काल गँछिथ गँयि ब्रह्मन तु तसुंज आशेन्य येमि आलमु तु बाँय ज़ु लॅग्य बेनि रछुनि। अँथ्य मंज़ रूज़ स्व बॅरुच। बाँय बारुन्यन आव नु समज कैह तु तिम गँयि स्यठाह परेशान। यि महसूस वॅरिथ वोन श्रुतर्थायि तिमन 'तोह्य मु वॅरिव काँसि प्यठ शक। बूज़िव, बु वनोवु पोज़ जि दॅलील क्या छि? अख शाहज़ादु यस कीर्तीसेन नाव छु तु युस नाग राजु वास्कीयस बाँय सुंद नेचुव छु, तॅम्य वुछुस बु श्रान करान तु वोल लोलु ज़ालन। मे वॅनिन पनुन्य ज़ाथ तु असि कोर गंधर्व अअयि खांदर। सु छु ब्रह्मन ज़ॉच तु तस निश रूज़ुस बु ग्वबि ख्वर।' बेनि हुंज कथ बूज़िथ वोन तस बायव 'चॉनिस वनुनस किथु पाँदय करव अँस्य पछ?' यि बूज़िथ कोर तमि कीर्तीसेन याद तु सु प्यव वॉतिथ। तॅम्य वोन तिमन 'तुहंजि बेनि सुत्य कोर मे खांदर। तुहंज बेनि छि चकि स्वर्गुच विगिन्य य्वसु अकि शापु किन्य मनुश

बनेयि। त्वहि बाँय बारुन्यव ति छु शापु किन्य ज़न्म ह्योतमुत। तुहंजि बेनि येलि नेचुव ज़ेवि, त्वहि त्रेश्वन्य म्वकलि शाफ।' यि वँनिथ गव कीर्तीसेन गाँब।

कैह वक गँछिथ ज़ाव श्रुतर्थायि नेचुव। म्यानि यारु, सु नेचुव छुस बु। येलि बु ज़ास, तमि विजि गँयि अख आकाश वॉनी 'यि लँडकु छु भगवान शिवु सुंदिस अँकिस गनु सुंद औतार तु अँमिस गछि गुनाढ्य नाव थवुन। यि छु ब्रह्मन ज़ाँच।' अमि पतु म्वयि मे माँज तु माम। मे रूद नु कांह रछन वोल। बु ओसुस शुर मगर मे त्रोव सोरुय गम दँनिथ। आत्म वेश्वास लोबुम तु ज्ञान प्रावुनि गोस दक्षन कुन। वारु वारु हेछिम साँरी अँलिम तु हनि हनि लँबुम मशहूरी। पतु आस पनुन प्रोवमुत पनुनिस वतुनस हावुनि। येलि वारियँहस कालस ओर रूजिथ बु पनुनिस शहरस मंज शेश्य ह्यथ च़ास, मे वुछ अख अँजीब नज़ारु। अकि तरफु अँस्य ग्यवन वॉल्य साम वीदुक्य श्लोक परान, बेयिस जायि अँस्य ब्रह्मन पवित्र किताबन हुंदिस तफसीरस तु ताँवीलस मुतलिक बहस करान। बेयिस जायि अँस्य ज़ार्य येमि आयि ज़ारस चूनि जरान जि 'युस ति कांह ज़ार गिंदुनक फन ज़ानान आसि, तस छु खज़ानु आयितन आसान।' बेयिस जायि अँस्य बापॉर्य दौलथ ज़ेनुचि हनुनरन मुतलिक कथ करान। अँक्य सौदागरन वँन्य यि दँलील।

### गगर सौदागर :

यि छनु कांह बँड हॉरॉनी जि किफायत-शार छु र्वपुयि र्वपय ज़ेनान। मगर मे प्राँव अँमीरी कुनि दनु वरॉयी। म्यानि ज़्यनु ब्रोंदुय मूद मे मोल तु म्यानि माजि न्युव वँमीनु रिशतुदारव सोरुय मुहिथ। तिहुँदि खौफु चँज स्व ग्वबि ख्वर हालँच मंज तु लँज म्याँनिस मॉल्य सुंदिस अँकिस दोस कुमार दत्तुनि गरि रोज़ुनि। अँती ज़ास बु तस। बु ओसुस तँम्यसुंदि यिनु कालुक डोख। तमि वँर कम तर मोज़ूर्य तामथ तु बु रोछुनस। गँरीब आसनु किन्य कोर तमि अँकिस व्वस्तादस मे खॉरातस प्यठ परनावुनु खॉतरु ज़ारु पारु। कैह काल गँछिथ वोनुन मे 'चु छुख अँकिस बापॉर्य सुंद नेचुव। व्वन्य पज़ी च़े कांह कारुबार करुन। दपान यथ शहरस मंज छु अख बोड बापॉर्य यस विशाखिल नाव छु। सु छु रुति खानुदानुक्यन गँरीबन करजु दिवान। गछ च़ु ति अनुस आर तु कर कांह काँम शुरू। बु गोस विशाखिल सुंद गरु। येलि बु तोर च़ास, सु ओस खश्मु सान अँकिस सौदागरस वनान 'यि मूमच़ गगर छिहनु पथर वुछान। अँकिस काँबिल इनसानस खॉतरु छु यि ति माल, यथ प्यठ सु कैह ज़ीनिथ हेकि। मगर च़ु छुख नाबुकार। मे दिती च़े वारियाह दीनार। यिमन हुय़र करनु बजायि हेकिथ नु च़े यिम ति रँछिथ।' येलि मे यि बूज़, मे वोन

विशाखिलस 'बु निमय चै निश यि गगुर बतौर पेशुगी रकम।' यि वॅनिथ तुज मे गगुर अथस मंज़ त् तस द्युतुम अम्युक रॅसीदु युस तॅम्य पनुनि मंज़बूथ पेटि मंज़ थोव। बु द्रास। सु लोग असुनि। मे कुन्य स्व गगुर अँकिस सौदागरस यस ब्रारि हुंदि खॉतरु माज़ बकार ओस। तॅम्य दिचुम तोरु छोलु म्वठ। यि छोलु कोरुम साफतु पां नोट ह्यथ ब्यूतुस अँकिस जायि। तति द्युतुम छोलु तु पोन्थ ज़िन्य मोज़ूरन स्यठाह यखलाकु सान। प्रथ काँसि दिचु मे ज़ु ज़ु ज़िन्य हचि। यिमु ज़िन्य हचि कुनि मे बाज़रु। यि केंछा अथ आव, तथ ह्योत मे बेयि छोलु तु गोस ज़िन्य मोज़ूरन निश। केंचस कालस यी कॅरिथ गव मे कॅह पाँसु टूक जमह। अमि पतु ह्योतुम तिमन ज़िन्य मोज़ूरन त्रेन दूहन सोरुय ज़्युन मॅल्य। अँथ्य मंज़ कोरुन वारियँहन दूहन सख रुद। लुकव ह्योत होख ज़्युन छांडुन। मे कुन सु ज़्युन केंचन हतन पनन। अमि पाँसु सुत्य त्रोव मे अख वान। पतु सोम्बुरम कुननु दुननु सुत्य वारियाह दौलथ महज़ पनुनि काँबलियतु सुत्य। अमि पतु बनावुनॉवुम स्वनु संज़ गगुर तु यि कॅरुम विशाखिलस हवालु। तॅम्य दिचु मे पनुन्य कूर नेथुर्य। अमि किन्थ छि मे साँरी गगर सौदागर वनान। अख पाँसु आसनु रोस्तुय प्राँव मे ख्वशहॉली। यि दॅलील बूज़िथ गॅयि साँरी सौदागर हॉरान तिक्क्याज़ि लबव रोस्तुय शक्लु अवेज़ान वुछिथ कॅम्यसुंद ज़ेहन छुनु हॉरान गछान ?

### सामवीद ग्यवन वोल तु ग्यवन वाजेन्य :

बेयिस जायि ओस अख ब्रह्मन यस आँठ माशु स्व ओस। सु ओस सामवीद ग्यवान। तति ओस अख कम ज़र्फ तु तॅम्य वोनुस 'ब्रह्मन आसनु मूजुब छुय चै ज़िंदु रोज़नु खॉतरु कॅह नतु कॅह बनान, मगर अख नामुवर इनसाम बननु खॉतरु पज़ी चै अमि स्वनु सुत्य दुनियादॉरी हेछिन्य।' तॅम्य अहमक ब्रह्मनन प्रुछुस 'मे कुस हेछिनावि ?' कम ज़र्फन वोनुस 'अख ग्यवन वाजेन्य यस चतुरिका नाव छु, हेछिनावी चै सोरुय। चु गछ तस निश।' ब्रह्मनन प्रुछुस 'तति क्याह छु मे करुन ?' कम ज़र्फन वोनुस 'तस दि यि स्वन। बेयि वर्ताव कॅह साम तस ख्वश करनु खॉतरु।' यि बूज़िथ गव सु अहमक चतुरिकायि हुंदिस ठिकानस प्यठ। स्व आयि तस बुथि तु अपजुय रंज़नोवुन। तॅम्य द्युत तस सोरुय स्वन तु वोनुस 'मे हेछिनाव दुनियाह-दॉरी।' यि बूज़िथ त्रोव तति बिहिथ लुकव असुन। हना सूचिथ कॅर्य तॅम्य अथु ज़ु अँकिस बीनि हुंज़ि सूरँच मंज़ तु लोग साम वीद ग्यवुनि। साँरी औबाश लॅग्य तॅम्यसुंद तमाशु वुछनि तु अख अँकिस वनुनि 'यि शाल कति आव योर टुंगु दिनि ? अँस्य थवव अँमिस चँद्रम हँटिस प्यठ। यि बूज़िथ सूच ब्रह्मनन ज़ि चँद्रम गव अमि शक्लि हुंद खंजर। तस बास्यव ज़ि तिम चटन तस कलु। सु चोल तति यि वनान



‘मे हेछ दुनियादौरी।’ सु गव तस कम ज़र्फस निश येम्य सु तोर सूजमुत ओस। तस वॅनिन सौरुय दॅलील तु तॅम्य वोनस ‘मे वोनय च़े साम वर्तावुन। म्योन मतलब ओस ज़ि च़ु करुहन स्व पनुनि ख्वशामदु सुत्य पनुनि कनि। अँकिस ग्यवन वाजनि हुँदिस माहौलस मंज़ छा शूबान वीद ग्यवुन। मे छु बासान सु इनसानुय छु अहमक युस वीदन सुत्य मगुज़ मॉरी करि।’ यि वॅनिथ त्रोव तॅम्य असुन। सु गव ग्यवन वाजनि निश तु तस वोनन ‘तस दु-ज़ंगल दांदस दि पनुन स्वन फल वापस।’ तमि ओस तु द्युतुनस स्वन वापस। येलि ब्रह्मनस यि स्वन वापस म्यूल, सु गव ख्वश सपदिथ तिथु कॅन्य गरु वापस, ज़न तु दुबारु माजि ज़ामुत ओस।

### गुनाढ्य संलज दॅलील :

प्रथ जायि यिथ्य नज़रु वुछिथ वोतुस बु राज़ सुंदिस मँहलु खानस निश। तॅम्यसुंद दरबार ओस यँद्राज़ सुंद दरबार ह्यु। म्यॉन्य शॉगिर्द च़ायि ब्रोंतुय युथ म्यानि ओर वातुनुक ऐलान करन। तिमव वुछ राज़ सत्वाहन पनुनिस दरबारस मंज़ पनुन्यन अँमीरन तु वँज़ीरन दरमियान अँकिस लाल तु जवॉहिर जॅर्यमुतिस तख्तस प्यठ तिथय पॉढ्य बिहिथ यिथुपॉढ्य यँद्राज़ दिवतँहन मंज़ माग आसान छु। तस ऑशीर्वाद दिथ ब्यूतुस बु पनुनि जायि। तॅम्यसुंदव वँज़ीरव कॅर्य म्यॉन्य तॉरीफ। राज़ मनुश्य छु सारिनुय अमलन मंज़ ताक। अवय छु अँमिस गुनाढ्य नाव युस अँम्यसुंद स्वबाव बदि कडान छु। यि बूज़िथ गव राज़ सत्वाहन ख्वश। मे कोरुन आदर सत्कार तु बनोवुनस पनुन वँज़ीर। मे कोर खांदर तु लोगुस आरामु सान रोज़नि। राज़सी हुँद मामलु ति ओसुस वुछान तु पनुन्य च़ाठ ति ओसुसख परनावान।

द्वहा द्वहा रूद गछान। अकि द्वह ओसुस बु गोदावॅरी बँठिस प्यठ फुरसँच़ सान चकराह करान ज़ि मे पेयि अँकिस बागस कुन नज़र यथ दीवीकृति नाव ओस। यि बाग वुछिथ गोस बु त्यूत ख्वश ज़न तु मे बुतरॉच़ प्यठ नंदन बाग वुछमुत ओस। मे प्रूछ बागवानस ज़ि सु बाग क्युथ ओस तति ? तॅम्य वोन ‘महाराज, तमि दॅलीलि मूजुब य्वसु असि प्रान्यन निश बूज़मुच़ छे, दपान कर तामथ आव योर अख ब्रह्मन येम्य मून थवनुक प्रन कोरमुत ओस। न ओस कॅह ख्यवान, नु च्यवान। तॅमी बनोव यि स्वर्गु बाग तु मंदर। यि वुछिथ समेयि येति सॉरी ब्रह्मन तु तिमव कोर तस मूनी ब्रह्मनस पनुन्य दॅलील बोज़नावनुक इसरार तु तॅम्य वोन:

### मायायि बाग :

‘यथ परगनस मंज छे नरबदायि प्यठ अख जाय यथ वकाकाछ नाव छु। बु छुस तँत्य जामुत। बु ओसुस गवडु प्यठय गँरीब तु आलुछ्य। मे ओस नु कांह खॉरात दिवान। बु आस जिंदुगी निशि तंग तु चोलुस गरि। तीर्थन लोगुस फेरुनि तु अकि दूह वोतुस विंघावनस मंज दुर्गा मंदरस मंज। तति विछिम लुख पँश्य बँली दिवान। मगर मे क्या ओस ? प्यठ ओसुस मूर्ख तु अमि किन्य सूचुम जि बु दिमु दुर्गा मातायि पनुन पान रतु छेपि। यि यरादु कँरिथ तुज मे तलवार अथस मंज तु माता दुर्गा गँयि मे ब्रॉह कनि नमूदार तु वोनुन ‘चु मु बांबर। चु बनख कॉमिल। पनुन पार मु मार। म्यॉन्य चरनु सीवा कर।’ दीवी निश यि वरदान प्राँविथ खुलेयि मे नजर। बसीरच सुत्य गोस सँर्य। सॉरुय त्रेश तु ब्वछि चँजिम। बु रूदुस तँत्य तु अकि दूह वोन मे माजि दुर्गायि ‘पोत्रु, चु गछ प्रतिष्ठान तु तति बनाव अख शूबिदार बाग।’ यि वँनिथ द्युत मे तमि स्वरगुक ब्योल। बु आस योर तु तँम्य संजि ऑही सुत्य बनोवुम यि बाग। तोह्य ति करिज्यवु यथ बागस रॉछ।’ यि वँनिथ गव सु ब्रह्मन गॉब। यिथु कँन्य छु दीवियि पानय ब्रॉह कालु कर ताम यि बाग बनोवमुत। येलि मे बागवानस निश दीवी हुंजि शक्ती हुंज दँलील बूज, बु गोस हॉरॉनी सान सॉचान गरु।

### राजु सत्वाहनन्य दँलील :

येलि गुनाढ्यन यि वोन, कानुभूतीयन प्रुछुस ‘सॉमी राजस क्याजि ऑस्य सत्वाहन वनान?’ गुनाढ्यन वोनस ‘बोज, बु बोजनावथ अम्युक कारन।’

दिव्यपीकरन ओस अख बलवान राजु। तस ऑस आशेन्य शक्तीमती खसु तस पनुनि जिंदुगी खोतु टॉठ ऑस। अकि दूह ऑस स्व बागस मंज शॉगिथ जि स्वरफन दिचुस ट्वफ। स्व म्वयि। योदुवय राजस कांह शुर ओस नु, मगर तँम्यसंज याद ताजु थवनु खॉतरु कोर तँम्य कसम जि सु करि नु बेयि ज़ांह खांदर। अकि दूह आव तस चंद्रशेखर सोपनु मँज्य तु वोनुन तस ‘जंगलु मँज्य फेरान फेरान वुछुहन चु सुहस प्यठ अख लँडकु। सु अँन्यज्यन तु रँछिज्यन नैचुव बनाँविथ।’ राजु गव हुशार तु सोपुन याद पाँविथ गव स्यठाह ख्वश। दूहा दूहा गव तु अकि दूह गव राजस शिकारस गछुनुक शोक। जंगलु मँज्य फेरान फेरान वोत सु दुपहरस अँकिस पम्पोशि सरस निश। तति वुछुन अख तीजवान लँडकु सुहस खँसिथ सिर्यिक्य पाँट्य प्रजुलान। सुहस लँज त्रेश तु लँडकु त्रोवुन पथर। राजस प्यव सोपुन याद। तँम्य मोर सुह तीर लॉयिथ मगर मरनु विजि डँज सुहस शक्ल तु सु बन्यव इनसान। राजन वोनस ‘मे छु अफसूस जि यि क्या सपुद।’ तँम्य

इनसानन द्युतुस जवाब ' राज़ बु छुस दर-अस्ल यक्ष। नाव छुम सत। बु छुस क्वबेरु सुंद सीवक। वारियाह काल गव, मे वुछ अख रेश्य कूर श्रान करान। तमि ति वुछुस बु तु तस ति गनेयि म्याँन्य माय यिथु पाँट्य मे तसुँज गनेयि। गंधर्व आयि खांदर कँरिथ बनाँव मे स्व आशेन्य। येलि तँम्य सुंदव आँशुनावव यि वुछ, तिमन खोत शरारथ तु दितुख असि शाफ। दोपुख 'तोह्य दूशय छिवु वद खाह, तु यि ख्वश कोरवु, ती कोरुव। अमि किन्य बँनिव तोह्य सुह।' तिमव वोन जि तस चलि तमि विजि शाफ येलि तस कांह थनु पेयि। तु मे रोजि तोताम शाफ योताम चु मे मारख कान लाँयिथ। अँस्य दूशय बनेयि सुह जूर्य। स्व रूज बेयि जुव तु लँडकु थनु प्यनु विजि गँयि मँरिथ। यि लँडकु रोछ मे दोयिमि सीमनि हुंद दूद दिथ। अज म्वकुलोवुथ चे तीर लाँयिथ म्योन शाफ। अमि किन् छुस बु ख्वश। यि लँडकु छुसन बु पनुनि ख्वशी दिवान तोक्याजि रेश्यन हुंज आँस यँहय यछ।' यि वँनिथ गव सु सत नाँव्य यक्ष गाँब तु राज़न न्युव लँडकु गरु। चूँकि सु लँडकु ओस सत नाँव्य यक्षस सवारि खोतमुत, अवु मूजुब थोव तस राज़न सत्वाहन नाव। येलि राज़ सोरुय त्राँविथ जंगल तपस्या करनि गव, सत्वाहन बन्यव राज़।

पनुनि दँलीलि दर्मियान कानुभूतीयिनि सवालुक जवाब दिवान थँव गुनाढ्यन पनुन्य दँलील जाँरी।

### राज़स गँयि पनुनि अज़ाँनी प्यठ शर्म :

अकि दूह गव राज़ सत्वाहन सोँथ कालस मंज मायायि बागस चकराह करनि। यि बाग असि द्यवव बनोवमुत तु मे ओस तस अथ मुतलिक वोनमुत। सु रूद तिथु पाँट्य तति मस गँछिथ फेरान यिथु पाँट्य यँद्राज नंदन बागस व्यूर तुलान छु। पनुन्यन आशिन्यन सुत्य वोथ सरस मंज लुत्फ तुलनि। तति लोग सु तिमन सुत्य पाँनिस गिंदुनि। तिमु ति लजि तस तिथ्य पाँट्य पोन्य अथु सुत्य छकुनि यिथु पाँट्य हँस्तिन्य हँसिस पां सँर्य करान छे। तिमु गवलालु रोय तु हरनु चेश्म मसवलु आसु सरस मंज ओरु योर करान। तिहुँद्य ज़ाँविल्य पलव आँस्य तिहुँजि चमि सुत्य लाँरिथ, राज़स अँदरी वोतरु बुन्युल तुलान। यिथु पाँट्य पोशि वनस मंज वाव क्रीपरु वँथुर मुचरान छु, सुय हाल कोर राज़न यिमन नाज़ुलन। तिमु चजि नँजदीख छँत्र कुलिस कुन। टेक्य आँसिख ड्यकव प्यठ वँथ्यमुत्य तु वस आँसिख छलि छांगुरि। अख रॉन्य येम्य सुंद बदन पोशिक्य पाँट्य नोजुक ओस तु य्वसु हना नँमिथ आँस, थँच गिंदान गिंदान। तमि वोन राज़स 'मे मु लाय पां कतरु।' यि बूजिथ अनुनाँव राज़न यकदम तस खॉतरु मिठाँय। यि वुछिथ त्रोव

रानि ठाह ठाह कॅरिथ असुन तु वोनुनस 'पां सरस मंज क्याह ओस मे मिठायि करुन? मे वोनुय च्चे मे मु लाय पां कतरु। च्चे छुय ना वुनि ति लफज़न हुंद माने कडनुक शवूर? च्चे छी ना लफज़ जोडनुक्य ग्रामरुक्य असूल पॅर्यमुत्य? बु छस हॉरान जि च्चे छुख यूत चोर।' येलि रानि तस यि वोन, सारिवुय नोकुरान्वय त्रोव असुन तु राजस गव सख महसूस। सु आव पनुनिस महलुखानस मंज तु पानस सुत्य गॅयस सख नफरत। सु आव पॉन्य पानय खजालेच मंज ह्यनु। नु ओसुस ख्यनस मॉल तु नु च्यनस। काँसि सुत्य ओस नु कथ ति करान। सु ओस सॉचान, या तु पजि तस अँलिम प्रावुन तु नतु मरुन। तस आँस अँदर रुमन रुमन दग तु तँम्यसुंज यि हालत वुछिथ गॅयि साँरी परेशान। मे तु शर्वावरमनन बूज राजु सुंजि हालच मुतलिक केह काँल्य पतु। असि ओन राजु सुंद अख सीवक राज हंस नाद दिथ तु प्रूछ तस राजस मुतलिक। तँम्य वोन, 'मे छुनु पनुनि जिंदुगी मंज राजु यूत व्दोँस्य ज़ांह ति वुछमुत। बेयि अकि रानि वोन मे जि तस छे वरल नाजलि विष्णु शक्ति सुंजि कोरि खजालथ कॅरमुच।' येलि शर्वावरमनन तु मे यि बूज, अँस्य गॅयि परेशान तु लॅग्य अथ नोजुक मसुलस मुतलिक सॉचनि। 'अगर राजस बदनुकिस कुनि अंगस दग आसिहे, अँस्य अनुहोख हँकीम तु चारुगॅर्य। मगर मनुचि दगि क्याह करव येलि अम्युक वजह ति पय आसि नु। राजु सुंदान शत्रन हुंद मूल छि गॅल्यमुत्य, साँरी लुख छि ख्वश। कुनि जायि छेनु कुनि रंगु कांह व्यछय। पच छुनु जि राजन क्याह छु अँद्री ह्योतमुत?' पानुवँन्य अथ मसुलस प्यठ बोजु-शोच कॅरिथ वोन शर्वावरमनन 'मे लोग राजु सुंजि परेशाँनी हुंद कारन पय। सु छु पनुनु ला-अल्यमी तु जहालतस प्यठ व्दोँस्य। तचय छु सु पानस हमेशु अहमक वनान। वारयाह काल गव यनु तँम्य सुंज यि खॉहिश मे फिकरी तँर जि सु छु यछान अँलिम बनुन तु मे छु बासान जि रानि छे तस तँम्यसुंजि ला-अल्यमी प्यठ जँट कॅरमुच। तवय छुस अँद्री वठ गोमुत।'

राँत्य रातस रूद्य अँस्य अँथ्य सिलसिलस मंज बोजु-शोच करान तु सुबुहय गॅयि राजु सुंदिस जँती कुठिस मंज। मुश्किलन चायि अँस्य अंदर तिक्याजि राजन ओस काँसि ओर अचुनस ठाख कोरमुत। राजस नजदीख बिहिथ वोन मे तस 'राजु! तोह्य क्याजि यीत्य न्यराश?' यि बूजिथ ह्युत नु तँम्य कांह जवाब। पतु वोन शर्वावरमनन तस येमि आयि 'राजु, तनु गव वारयाह काल, तोहि वन्योवु मे जि तोह्य छिवु यछान अँलिम प्रावुन। राथ प्यव मे यि याद तु मे पॅर्य मंत्र सोपुन वुछनु खॉतरु। राथ क्युत वुछुम सोपुन। आकाशु प्यव अख पम्पोश। यि मुचुर अँक्य आकाँशी गंदरन। अमि मंजु द्रायि अख अचु-रछ सफेद जामु लॉगिथ तु नेरवुनुय

चायि तुहँदिस म्वखस मंज। यूताह वुछिथ गोस हुशार तु तोगुम बोजुन जि स्व अछु  
रछु ख्वसु त्वहि आँसस मंज चायि, आँस सरस्वती।’

येलि शर्वावर्मनन पनुन सोपुन तस वोन, राजन फुटरोव पनुन मौन तु मे कुन वोनुन  
शोकु सान ‘कुतिस कालस हेछि इनसान अँलिम अगर सु मेहनच सान हेछिनावोन।  
राजुसी मंज छुनु अँल्यमु रोस कांह लुत्फ। दबदब, शान तु शौकत कथ लागि  
अहमकस। तस खॉतरु छि यिम तिम वस यिम कनि मौँडिस पॉरिथ आसन।’

### जु रँकीब व्वसताद :

यि बूजिथ वोन मे राजस ‘राजु, आँलिमन हुंद वनुन छु यि जि ग्रेमर हेछिनस छि  
बाह वँरी लगान तिक्याजि यि छु सारि अँल्यमुक दरवाजु। मगर बु हेछिनावोव तोह्य  
यि सिर्फ शेन वँरियन मंज।’ म्यॉन्य कथ बूजिथ गव शर्वावर्मनस हसद तु वोनुन  
‘आँश अशरतुक आँदी इनसान कति करि यूत बरदाश। राजु, बु हेछिनावोव तोह्य  
फकत शरन र्यतन मंज सोरुय ग्रेमर।’ शर्वावरमनुन यि लाफ बास्यव मे ना-मुमकिन  
तु मे वोनुस शरारतु सान ‘अगर चु राजु शेन र्यतन मंज सोरुय ग्रेमर हेछिनावुहन,  
तेलि त्रावु बु संसकृत, प्राकृत तु पनुनि माजि जेवि मंज कथ करुन्य। यिम छे तिम  
त्रे ज़बॉन्य यिमन हुंद शूबिदारन मंज आम चलन छु।’ तु शर्वावरमनुन वोन ‘अगर बु  
पनुन वादु पूर वँरिथ ह्यकु नु, बु पकनावु चोन ख्वरबानु बराबर बहन वँरियन  
कलस प्यठ।’ यि वँनिथ द्राव सु तु बु ति द्रास गरु। राजस आव करार तिक्याजि  
तस बास्यव जि असि मंजु अँक्यसुँदि दँस्य लबि सु पनुन मक्सद। शर्वावर्मन आव  
क्वपॉठ्य हेनु तिक्याजि तस ओस बासान जि तस खॉतरु ओस वादु पूर करुन  
कॉफी कूठ। सु लोग अफसूस करनि जि तँम्य क्याजि कोर यि वादु। तँम्य वँन्य  
सॉरुय दँलील पनुनि आशेनि। स्व ति गँयि फिकरि तु वोनुनस ‘सॉमी, मे छु बासान  
जि अगर कार्तिक्या दया करि, तेलि छुनु यि कांह मसलु। शर्वावर्मनन वोनस ‘बु  
करु तँम्यसुंज पूजा।’ यि वँनिथ द्राव शर्वावर्मन रॉच हुँदि पँत्यमि पँहरु क्वमारु सुंज  
तपस्या करनु खॉतरु। मे वँन्य पनुन्यव जोसूसव यि सॉरुय दँलील तु सुबुहन वोन मे  
सोरुय राजस। राजस ओस अक बरुसु वोल राजपूत सीवक यस सिन्हागुप्त नाव  
ओस। तँम्य वोन राजस ‘राजु, येलि मे बूज जि त्वहि छु कुसताम दूख, बु गोस  
परेशान तु द्रास येमि शहरु मंजु दुर्गायि पनुन पान बली दिनु खॉतरु। तति गँयि  
आवाज ‘पनुन पान मु दि रतु छेपि। राजु सुंज यछा गछि पूर। अवु मूजुब छु मे  
बासान जि यी सपदि।’ अमि पतु सूज्य जु सवार सिन्हागुप्तन शर्वावर्मनस निश युस  
कारत्की सुंज तपस्या ओस करान। सु ओस वावहॉरी तु मून। कारतिक्यन वँर

तस यॉरी तु सवारव वॅन्य वापस यिथ राजस रुच शैछ। राजु गव ख्वश तु बु ना-  
व्वमेद। यिथु पाँढ्य सदफ ओबुर वुछिथ ख्वश तु राजु होंज दुखी छु सपदान।  
शर्वावर्मन वोत वापस तु राजु हेछिनोव तॅम्य क्वमारु सुंदि अनुग्रह सोरुय ग्रेमर। दयि  
यछायि क्या छिनु कॅरिथ ह्यकान। सॉरुय प्रजा गॅयि राजु सुंदिस ऑलिम बननस  
प्यठ ख्वश। प्रथ जायि आयि शॉद्यानु मनावनु। प्रथ जायि आसु शादमॉनी हुंजु  
अलमु लॅगिथ तु वाव येलि यिमन ज़ीर दिवान ओस, बासान ओस जि प्रथ तर्फु छे  
गतुरेनि गथ करान। शर्वावर्मनस मील्य लाल तु जवॉहिर। सु मोन राजन पनुन  
गुरू। तस आव बोड ओहदु दिनु। राजु गव सिन्हागुप्तस ति ख्वश येम्य तस  
ग्वडुन्यथ वोनमुत ओस जि शशम्वख क्वमारन ओस शर्वावर्मनस वरदान द्युतमुत।  
तु तस ति द्युत राजन त्यूत जि सु बन्यव हश्मत वोल। स्व रॉनी येमि तस हतख  
कोरमुत ओस, तु य्वसु तॅम्यसुंदि ऑलिम बननुच मूलु कारन ऑस, आयि पटरानी  
बनावनु तु राजु लोग तस पनुन्यव अथव पोन्व छॅक्य छॅक्य लोल बरनि।

### गुनाड्य संज दॅलील :

मे कोर मौन दारनुक वादु तु आस राजस निश। तति वोन अॅक्य ब्रह्मनन अख  
शलूख तु राजन कॅर पानु तस सुत्य संस्कृतस मंज कथ बाथ। दरबारस मंज गॅयि  
सॉरी ख्वश। पतु वोन राजन शर्वावर्मनस 'मे वन जि क्वमारन किथु पाँठ्य द्युतुय च़े  
वरदान?' यि बूजिथ लोग शर्वावर्मन कार्तिक्या संजि दयायि हुंज सॉरुय दॅलील  
वननि।

### नवि ग्रेमरुच बावथ:

राजु, पतु द्रास बु फाकु फरि मौन दॉरिथ तु गोस पकान। वुनि ओस मे बेयि कॅह  
पकुन जि बु प्योस पथर, तिक्क्याजि वारियाह कालुकि फाकु तु तपस्यायि सुत्य  
ओसुस कॉफी कमज़ोर गोमुत। अॅथ्य मंज आव अख इनसान नेजु अथस मंज  
ह्यथ तु तॅम्य वोन मे बदलय आवाजि मंज 'गोबरु वोथ थोद। सोरुय सपदि चानि  
खॉतरु रुत।' यि बूजिथ जन तु मे सॉरिसुय अमृतु वरशुन सपुद। बु गोस हुशार। नु  
ऑसुम ब्वछि तु नु त्रेश। सोरुय वजूद ओसुम हशाश बशाश। पतु गोस बु नखय  
मंदरस कुन। पनुनि भक्ती हुंद बास ओसुम रुमन रुमन ति सिरुसॉव्य हालत।  
बगवान स्कंदन द्युत मे दर्शुन तु सरस्वती बीठुम म्वखस। क्वमार जीयन वोन मे  
ग्वडुन्युक सूत्र युस हर्फन हुंज बुमियाद छु, तु दौयुम सूत्र वोनुम पानय। पतु वोन  
बगवानन 'अगर च़ु दौयुम सूत्र पानु वनुहख नु, तैलि रटिहे यि नोव ग्रेमर पानुनी

संजि ग्रेमरुच जाय। यि ग्रेमर छु छोट मोट तु अमि मूजुब रुज्ज अथ कातंतरा तु काल्पक याने मोरु सुंदि लटि मंजु नाव युस म्योन वाहन छु।' पतु वोन बगवानन मे पानय यि नोव तु छोट मोट ग्रेमर। तँम्य वोन मज्जीद 'चोन राजु ओस ब्रोंह जन्मु अख रयोश तु ऋशि भारद्वाजुन अख शेश यस कृष्ण नाव ओस। सु ओस सख सादना करान मगर अकि दूह लगोवुस कामदीवन सु तीर जि अख रेश्य कूर वुछिथ रूदुस नु पानस ताम केह। रेशव द्युतुस शाफ तु ह्योतुन नोव जन्म। स्व कूर बनेयि तस रॉन्य। राजु सत्वाहन छु चकि अख सादू तु येलि चै सु वुछी, तस मेलि प्रथ अँलिमुक ज्ञान पनुनि मरज्जी मुताँबिक। महात्मा छि थँद्य तु बँड्य पजर जल्द ज्ञानान तिक्याजि तिहुँद्य संस्कार छि बलवान आसान।' यि वँनिथ गव सु अंतरद्यान तु तँम्यसुँद्यव सीवकव दित्य मे त्रे तोमलु फँल्य। बु आस तोरु तिम तोमलु फँल्य ख्यवान मगर तिम गँयि हुरान तु चरान।

### गुनाढ्य संज दँलील :

येलि शर्वावर्मनन पनुन्य दँलील वँनिथ म्वकुल्योव, राजु सत्वाहन गव स्यटाह ख्वश तु गव श्रान करनि। चूकि मौन दारन करनु किन्य आँस नु मे व्वन्य कांह काँमाह काराह, बु द्रास राजस निशि कलु नोमुराँविथ इजाजथ ह्यथ, युस मे निशि ओस नु दूर रोजुन यछान। बु द्रास तमि शहरु मंजुँ सिर्फ ज़ु शेश ह्यथ, तु बु ओसुस सिर्फ तपस्या करुन्य यछान। अउ मूजुब वोतुस बु विंध्यावनस मंजु तिक्याजि बगवती ओस मे सोपुनस मंजु यी करनु खॉतरु वोनमुत। विंध्यावनस मंजु वुछिम वारियाह पिशाच। बु रूदुस तिमन सुत्य तु तिहुँजि कथि बाथि सुत्य गोम शोक यि ज़बान हेछुनुक तिक्याजि य्वहय हेकिहे म्योन मौन फुटराँविथ। बेयि बूज मे जि च़ु ओसुख उज्जैन गोमुत तु अउ किन्य ओसुम च़े ति प्रारुन। येलि च़ु तोरु आख, मे कोरुय च़े चूर्यमि ज़बॉन्य मंजु इस्तेकबाल तु पतु पेयि मे पनुन्य असलियत याद। यि बोज़नोवुख मे च़ु येमि जन्मुच दलील।

येलि गुनाढ्यन यि वोन, कानुभूतीयन वोन तस वापस 'बोज़ बु वनय, मे किथु कँन्य लोग राथ पय च़ु छुख योर आमुत। मे छु अख राक्षस मेत्र यस भूतीवर्मन नाव छु। तस छु आगाह म्वकल। बु समखुस तस उज्जैनी मंजु येति सु अँकिस बागस मंजु रोज़ान छु। म्यॉनिस यि प्रुछुनस प्यठ जि म्योन शाफ कर म्वकलि, वोन तँम्य 'असि छनु दूहस कांह शक्ती आसान। च़ु ठँहर, बु वनय राथ सपदिथ।' मे मोन। येलि राथ गँयि, मे प्रुछुस शोकु सान ज़ी भूत क्याजि छि रातस व्वलुसनस यिवान ? भूतीवर्मनन वोन मे 'बोज़, बु वनय जि मे क्या बूज शिव ब्रह्माहस वनान। राक्षस,

पिशाच तु यक्ष छिनु दूहस कांह सामरथ थवान तिक्याज़ि सिरिं गाशु सुत्य छु तिमन  
अँछन गचर गछान, तु अवय छि यिम रातस ख्वश रोज़ान। येति दिवताहन हुंज़  
पूजा तु ब्रह्मनन हुंद आदर छुनु सपदान, येति लुख छ्योट ख्यन। तति ति छे यिमन  
शक्ती आसान। येति मामस ख्यवान आसन नु या ज़नानु श्रूच आसि, तोर ति छिनु  
यिम वातान। यिम छिनु बहोदरन तु हुशारन हमलु करान।’ यि वँनिथ वोन मे तँम्य  
राक्षसन ज़ि च़ु गछ, गिनाड्य छुय प्रारान येमि सुंदि बरकतु च़ु शापु निशि  
म्वकुलख।’ यि बूज़िथ आस बु योर। व्वन्य वनय बु च़े स्व दँलील य्वसु पुष्पदंतन मे  
वँन्य। मगर मे छु यि बोज़नुक सख शोक ज़ि तस क्याज़ि ओस पुष्पदंत नाव तु च़े  
मालीवान?’ कानुभूतीयस तस निशि यि सवाल बूज़िथ वोन तस गुनाढ्यन।

### पुष्पदंतन्य दँलील :

गंगायि बँठिस प्यठ छु अख परगनु युस राज़न ब्रह्मनन जॉगीर द्युतमुत ओस। यथ  
बहूसूरका नाव ओस। अति ओस अख व्यदवान ब्रह्मन गोविंद दत रोज़ान। तस  
ऑस अख लोल बरन वाजेन्य आशेन्य यस अग्नीदता नाव ओस। तस ज़ायि पांछ  
नेचिव्य। तिम ऑस्य शँकील मगर चॉर्य, तु बेकुल आयि गँयि बडान। अकि दूह  
आव अथ गरस पोछ। यि ओस अख ब्रह्मन यस वेश्वनर नाव ओस। यि ओस ज़न  
तु अग्नी दिवता। येलि सु युहुंद गरु चाव, गोविंद दत ओस नु गरि। तँम्य कोर  
तँम्यसुंदान नेचिव्यन नमस्कार तु तिमव त्रोवहस तोरु असुन। तस गव हतक तु सु  
लोग वापस नेरनि। ओरु आव गोविंद दत तु कोरुनस ज़ारु पारु मगर अँम्य वोनस  
‘चॉन्य नेचिव्य छि प्यॉर्य तु अमि किन्य ज़ॉच न्यबर। यिमन सुत्य रोज़नु मूजुब  
छय च़े ति पनुन्य ज़ात रॉवमुच़। बु ख्यमु नु चानि गरि किहिन्य ति। अगर ख्यमु,  
तेलि ह्यकु नु कुनि मंत्रु सुत्य पनुन पान श्वद वँरिथ।’

यि बूज़िथ वोन गोविंद दतन तस कसम हॉविथ ‘येति योर लागु नु यिमन बदखाहन  
अथु ति।’ तँम्य सुंजि पँछ्य पूजा करन वाजेन्य आशेन्य ति आयि तु लँजिस ज़ारु  
पारु वँरिथ यी वनुनि। मुश्किलन गव वेश्वनर तति रोज़नस तैयार। गोविंद दतुन  
अख नेचुव यस देवदत नाव ओस, ओस यि सोरुय वुछान। येलि तँम्य मॉलिस  
माजि हुंज़ु कथु बोज़ु, तस बास्यव नु पनुनि ज़िंदुगी कांक कुमत तु द्राव बद्रीनाथ  
कुन तपस्या करनि। तति लोग सु ग्वडु कुल्य पन खेनि तु पतु ओस व्वमायि हुंदिस  
सॉमीयस ख्वश करनु खॉतरु फकत दुह चवान। शम्बू गव तँम्य सुंजि साधुनायि  
प्यठ ख्वश। दर्शुन द्युतुनस तु तँम्य मोग तस वरदान ज़ि सु रोज़ि प्रथ विजि तस  
सीवा करान। यि बूज़िथ वोनस शंकरन ‘ज्ञान प्राप्ती कर तु बुतरॉच प्यठ कर



कामुनवार्थी । अमि पतु लबख च्चु सौरुय पनुनि यछायि मूजुब ।। सु गव ज्ञान प्रावुनि पाटली पुत्र । तति गव अँकिस व्वस्तादस निश यस वीदक्वंभ नाव ओस । मगर तति लँज व्वस्तादु संज आशेन्य तस कुन वुछिथ केशनि तु अकि दूह कोर तमि तस जब्र । अफसूस जि ज्ञानान हंघ शोक छि बे-पछ आसान । कामुदीव वेद्यायि मंज ठोर बननु किन्य द्राव तति देवदत्त तु गव प्रतिष्टान । तति गव सु अँकिस बुजर्ग व्वस्ताद मंत्रास्वामिनस निश यस आशेन्य ति मँर्यद्यादम आँस । अति कोर तँम्य जान पॉठ्य अँलिम हॉसिल । अकिदूह वुछ सु राजु सुशुर्मनुनि कोरि यस श्री नाव ओस तु लँजिस तिमवय लोलु चेशमव वुछनि यिमव श्री विष्णुहस वुछान छे । तँम्य ति वुछ स्व दारि प्यठ तिथय पॉठ्य शोलु मारान यिथु पॉठ्य जून पनुनिस रंगु रथस मंज ओरु योर नचान छे । तिम दूश्वय वँल्य लोलु वालु वाशि । राजु कोरि कोर तस अकि आँगजि सुत्य नखु यिनुक इशारु । यि इशारु ओस कामु दीव सुंद होकुम तु सु आव तस नखु । स्व द्रायि मँहलु मंजु तु दंदु सुत्य चोटुन अख पोश तु त्रवुन तस कुन । तस तोग नु बोजुन जि यि क्वसु कथ वँन्य तस राजु क्वमारि । हॉरान गँछिथ गव सु पनुनिस ग्वरस निश । तति दित्य तँम्य जँमीनि पेट्य डुलंग्य । कथ ति आँसुस नु फोरान तिक्व्याजि लोलु नारन ओस जनूनी तु कोल कोरमुत । तँम्यसंज हालत वुछिथ तोग तँम्यसुंदिस ग्वरस सौरुय बोजुन । तँम्य प्रुछ तस हनि हनि सौरुय दँलील । यि बूजिथ अअयि ग्वरस सौरुय प्रँच समुज तु तँम्य वोन तस 'पनुनि दंदु सुत्य पोश चँटिथ च्चे कुन त्रॉविथ वोनुय तमि च्चे पुष्पदंत मंदरस मंज प्रारनु खॉतरु । नेर, गछ च्चु तोर ।' येलि तँम्य यि बूज, तस चोल सौरुय गम तु गव मंदरस मंज तु लोग तति प्रारुनि । राजु क्वमॉर्य ति गँयि तोर । गरि ह्योटुन आँठम हुंद हीथ तु च्चायि मंदरस मंज । तँम्यसुंद मदनवार ओस दरवाजस पतु कनि । तँम्य रँट स्व वुछिथुय नालु मति तु तमि प्रुछुस 'हॉरॉनी छे, च्चे किथु वँन्य तोगुय म्यॉनिस इशारस माने बोजुन । 'मे नु' तँम्य द्युतुस जवाब 'बँल्यकि म्यॉनिस ग्वरस तोग चॉनिस दंदु सुत्य पोश चटुनस माने बोजुन ।' यि बूजिथ खोत राजु कोरि खश्मु तु तमि वोनुस 'मे त्राव यलु । च्चु छुख च्चकि अहमक ।' स्व द्रायि वँल्य वँल्य मंदर मंजु तु अँद्री ओसुस खोफ जि तस गोछ नु वुछुन कांह । देवदत्त द्राव दिल फुटिथ । पनुनि मसवलि रोस रूदुस नु किहीन्य याद तु तँम्य सुंदि फिराकु लोग तस सौरुय वजूद व्यगलुनि । भगवान शंकरन येलि तँम्यसंज हालत वुछ, तँम्य सूज पनुन अख गन यस पंचशिख नाव ओस, तस मदद करनि । तँम्य द्युत तस दिलासु । सु लागुनोवुन ज्ञानानु पलव तु पानु बन्यव अख ज़ज बुडु । तिम दूश्वय गँयि राजु सुशर्मनस निश युस तस रूस्य कचि मोल ओस । पंच शिखन वोन तस 'राजु म्योन नेचुव छय गरु दूर खबर कति । बु गछु तस छंडनि तु तवय छुस यछान म्यॉन्य यि

न्वश रोज़ि त्वहि निश म्योन अमानथ। मे छे व्वमेद ज़ि राज़ रछि अँमिस जान  
पाँदय। राज़ सुशर्मन खूच ब्रह्मनु सुंदिस शापस तु तमि किन्य सूज़न ब्रह्मनु संज़  
न्वश पनुनि कोरि हुंदिस महलु खानस मंज़। पंचशिख द्राव तु देवदत्त लोग पनुनि  
मसवलि सुत्य ज़नानु बँनिथ रोज़ुनि। हनि हनि बन्याव सु तँम्यसुंद कौबिले बरोसु  
चोतुर। अकि राँच गोड राज़ क्वमारि लोलु नारन जलाव तु देवदत्तन कोर तस  
निश पनुन पान ज़ौहिर तु तमि कोर गंधर्व आयि खांदर। अँथ्य मंज़ येलि स्व बँरुच  
रूज़, पंचशिखन न्युव तति राथ क्युत देवदत्थ वँडिथ। तस बदलौविन ज़नानु  
पलव तु सुबहस आव तस ह्यथ राज़स निश तु वोनुनस 'राज़, मे लोब नेचुव। व्वन्य  
छे मे न्वश बकार।' यि बूज़िथ गव राज़ कोल तु ज़ोर तिक्याज़ि तस ओस मोलूम  
ज़ि तँम्यसंज़ न्वश आँस नु व्वन्य तति। सु खूच ब्रह्मनु सुंदिस शापस तु पनुनिस  
वँज़ीरस वोनुन 'मे छुनु यि ब्रह्मन बासान। यि छु कुसताम दिवता मे तारुनि आमुत  
तु यिछ कथ छे यथ दुनियाहस मंज़ बनान।' तु अथ प्यठ वँन्य राज़ सुशर्मनन यि  
दँलील।

### यँद्राज़ तु राज़ शवी :

प्रानि ज़मानु ओस अख राज़ यस शवी नाव ओस। सु ओस त्याँगी, हमदर्द, सखी,  
पकु इरादुक तु सारिनुय जुव ज़ौचन रछन वोल। तस तारनु तु बजर मुहिथ निनु  
खौतरु बन्याव यँद्राज़ बाज़ तु धर्मराज़स वोनुन फ़ाख्तु बननु खौतरु। फ़ाख्तु गँयि  
त्रँहरेमुच वुडान वुडान राज़ शवी संज़ि ल्वलि मंज़ तु बाज़ युस तस पतय ओस,  
वोथ राज़ शवीयस कुन 'राज़, यि फ़ाख्तु छे प्रकच किन्य म्योन ख्यन। यि दिन मे  
तिक्याज़ि बु छुस ब्वछि होत। अगर च़ु यि फ़ाख्तु मे दिहन नु, तेलि मरु बु ब्वछि  
होत तु पतु कति रोज़ि चोन धर्म?' यि बूज़िथ वोन राज़न तस 'यि बिचौर आयि मे  
शरन तु अवु मूजुब ह्यकुनय नु यि बु च़े ख्वयनु खौतरु दिथ। बु दिमय च़े बेयि कुनि  
मामसुक अँम्य सुंद वज़न।' बाज़न वोनस 'तेलि दि मे अँम्यसुंदि वज़नु पनुन  
माज़।' राज़न मोन यि ख्वश सपदिथ। त्रकुर आयि अनुनावनु मगर राज़ यूताह  
माज़ पानस च़टान गव, त्यूताह गव फ़ाख्ति वज़न हुरान। पतु त्रोव राज़न पनुन  
सोरुय बदन त्रकरि मंज़। अमि पतु गँयि आकाश वौनी 'व्वन्य आयि डँड बराबर।' राज़  
शवी हस होव यँद्राज़न तु धर्मराज़न दर्शुन तु द्युतुनस जुव वापस तु बेयि ति  
कँह वरदान। इथय पाँदय छु यि ब्रह्मन मे निश अज़मौयिश करनि आमित।

### पुष्पदंतन्य दॅलील :

यि वॅनिथ वोन राजु सुशर्मनन तस गनस जि तॅम्य छु ब्रह्मन लोगमुत तु राजु प्यव तस पादन तल तु वोननस 'मे बख्श। चॉन्य न्वश नियि खबर वॅम्य किथु ताम पाँट्य हालांकि तस ओस पूर पॅहरु।' यि बूजिथ वोनस पंचशिखन 'राजु, अगर यि दॅलील छे, तेलि दिन चु पनुन्य कूर मे नेचिविस नेथुर्य।' शापन खोचनु मूजुब दिच राजन पनुन्य कूर देवदत्तस नेथुर्य। अमि पतु गव पंचशिख पनुनि वति तु देवदत्तस गव ननि वानु पनुनि मसवलि सुत्य अजलु-म्युल तु सु लोग राजु सुशर्मनस निश जान पाँट्य रोजनि तिक्क्याजि राजस ओस नु कोरि रोस कांह औलाद। कैह वख्तु पतु ज़ाव तस नेचुव यस महीधर नाव कोरुख। राजन बनोव सु पनुन जानिशीन तु पानु गव वनस मंज साधना करनि। अमि पतु सूच देवदत्तन जि तॅम्य प्रोव सोरुय तु सु ति गव आशेन्य ह्यथ वनस कुन तपस्या करनि। तति वॅर तॅम्य शिवु संज त्वता तु येलि तॅम्य शरीर त्रोव, सु ति बन्यव शंकरु संजि दयायि किन्य गन याने तॅम्य सुंद सीवक। चूकि तॅम्य ओस नु दंदु सुत्य पोश चटुन चितुरमुत, तवु किन्य थोव गनव तस पुष्पदंत नाव। तॅम्य संज आशेन्य बनेयि पारवती हुंज ब्रांदु रॉछ च्वंज जयि। यि वोनुय मे जि तस किथु पाँठ्य प्यव पुष्पदंत नाव। व्वन्य वनय बु पनुनिस नावस मुतलिक।

### मालीवानन्य दॅलील :

वारियाह ब्रॉह ओसुस बु तॅम्यसुय गोविंद दत्तुन अख नेचुव युस देवदत्तस मोल ओस तु मे ओस सोमदत्त नाव। हतक गॅछिथ द्रास बु देवदत्तन्य पाँट्य गरि तु हिमालया पहाडस प्यठ कोरुम तप तु शंकरस पूजा वॅरिथ कोरुम सु ख्वश करनुच कूशिष। म्याँनिस बाँय सुंद्य पाँट्य द्युत शंकरन मे दर्शुन। मे वोनस जि बु बनहा तस सीवक तिक्क्याजि बाक्य कुनि ति स्वखस कुन ओस नु मे मॉल तु तॅम्य पर्मुदीवन वोन मे 'चे वॅरुथ मे पोशि मालु लॉगिथ पूजा। तिमन पोशन हुंजु मालु यिमु यथ वनस मंज पवलान छे। चु बनख म्योन गन तु चे रोजी मॉलीवान नाव। मे त्रोव पनुन शरीर तु बन्योस तसुंद दास तु इथु वॅन्य द्युत जटादॉरियन पनुनि दयायि हुंद निशानु मे यि नाव। ऐ कानुभूती, सु मालीवान बन्याव बेयि अकि लटि मनुश। इथु पाँट्य चु मे वुछान छुख तिक्क्याजि पारवती द्युत शाफ। व्वन्य वन मे चु स्व दॅलील ख्वसु शिवन वॅन्य युथ असि दूश्चन्य शाफ म्वकुलन।

गुनाड्य सुंद इल्तिमास मदे नज़र थँविथ वँन्य स्व इल्हॉमी दास्तान याने ब्रहस्त कथा कानु भूतीयन पनुनि ज़बॉन्य मंज़ ।

ब्रहस्त कथायि आसु सथ लंजि तु गुनाड्यन कँर यि दास्तान तँथ्य पशॉच ज़बॉन्य मंज़ सतन वँरियन सथ लछ शुलूकन मंज़ नज़म । गुनाड्य ओस अज़ीम शॉयिर तु तँम्य लीछ यि दास्तान मील नु आसनु किन्य पनुनि खून सुत्य जंगुलन मंज़ युथ विद्यादर अथ चूरि निन नु । विद्यादर, सिद्ध तु नीम दिवता आयि यि दास्तान बोज़ुनि तु तथ जायि ओस आकाशस मंज़ छँथुर बासान यथ जायि कानुभूती यि दास्तान बोज़ुनावान ओस । येलि कानुभूतीयन गुनाड्य यि दास्तान नज़ुमावान वुछ, सु म्वकुल्याव शापु तलु तु गव पनुनि अस्ल जायि । यिम ति पिशाच तस पनुनि फेरु थोरि मंज़ सुत्य ऑस्य, तिम ति गँयि स्वर्गस तिक्याज़ि तिमव ति ऑस यि इल्हॉमी दास्तान बूज़मुच । अमि पतु लोग सु महान कवि गुनाड्य सॉचुनि 'मे पज़ि बृहतकथा बुतरॉच प्यठ नेशुनावुन्य तिक्याज़ि पार्वती छु योहय शर्त म्यॉनिस म्वकुलुनस थोवमुत । मगर यि किथु पॉठ्य नेशुनावु बु ? कुस बोज़ुनावन ?' तँमिस ऑस्य ज़ु शेश्य सुत्य । अँकिस ओस गुनादीव नाव तु बेयिस नंदीदीव । तिमव वोन तस 'राज़ु सत्वाहनय योत छु सु महा पुरुश यस यि दास्तान बोज़ुनावुन्य पज़ि । तस छु ज़ोक़ तु सु वातुनावि यि दास्तान दूर दूर ताम यिथु पॉठ्य वाव मुश्क छँकुरावान छु ।' गुनाड्यन वोनुख 'ती कँरिव ।' यि वँनिथ दिच तँम्य किताब तिमन तु दोपुनख राज़ु सत्वाहनस निश गछुन । पानु ति वोत प्रतिश्टान मगर अंदर अचनु बजायि ब्यूठ तथ बागस मंज़ युस भगवती हुंज़ि दयायि बन्योमुत ओस तु अति रूद पनुन्यन शॉगिर्दन प्रारान । शेश्य गँयि तु हॉवुख राज़ु सत्वाहनस तु दोपुहस जि यि ऑस गुनाड्य सुंज़ तखलीक । येलि राज़न यि पिशॉच ज़बान बूज़ तु तिम ति पिशॉच शक्लि वुछिन, तस गव पनुनिस अँलिमस प्यठ किबुर, तु वति डँलिथ वोनुनख ज़म कँरिथ 'सथ लछ शुलूकन छु स्यठाह वज़न । मगर पिशाच ज़बान छे वहशीयन हुंज़ बूल्य । प्यठ छे यि खून सुत्य लीखिथ । नीरिव, मे छे नु अथ सुत्य कांह दिलचस्पी ।' तिम द्रायि तमी वति किताब ह्यथ वापस येमि वति आमृत्य ऑस्य तु वँनिख गुनाड्यस सॉरुय दँलील । यि बूज़िथ गव तस सख महसूस । कस गछि नु महसूस येलि तस कांह ज़ानन वोल बँल्य ब्यवॉरी तु बे यज़ती करि ? सु गव पनुन्य चाठ ह्यथ अँकिस नज़दीकी वुडुर प्यठ । अँकिस खलवख मगर शूबिदार जायि ज़ॉजिन दून्य तु अख अख वरुख लोग प्रथ दूनि मंज़ त्रावनि । तँम्यसुंज़ आवाज़ बूज़िथ आयि सॉरी चँरिंदु तु पँरिंदु चँसिथ तु तँम्यसुंद्य चाठ लँग्य वदनि । अख दँलील ख्वसु अख लछ शुलूकन प्यठ मुश्तमिल ऑस, थॉव तँम्य पथ कुन । यि ऑस नरवाहन दत्तुन्य

दास्तान ख्वसु तँम्य पनुन्यन चाटन हुंदि खॉतरु पनुन निशानु जॉनिथ पथ कुन थॉव,  
तिक्व्याज़ि तिमन ऑस यि ज़्यादु ख्वश करान। येलि सु यि इल्हॉमी दास्तान वरकु  
वरकु पॅरिथ ज़ालान ओस, सॉरी हांगल, रूस्य तु हापत, माँशि वॅट्य तु बाक्यु  
जंगली जानवर आयि तोर पनुनि ग्वफु त्रॉविथ तु अँकिस दॉयिरु किस सूरतस मंज़  
बीठ्य तस अँद्य अँद्य यि दास्तान बोज़ुनि। अँछव ओसुख ओश वसान तु थोद  
व्वथुनस ओसुख नु व्वंदु यिवान।

अँथ्य दोरान गव राज़ु सत्त्वाहन ब्यमार तु हँकीमव वोन ज़ि सु ओस सु मामस ख्यनु  
किन्य ब्यमार सपुदमुत यथ मंज़ गुज़ॉयियत बिलकुल ऑस नु। येलि वाज़न ब्यवॉरी  
सपुज़, तिमव वोन 'युस माज़ शिकॉर्य अनान छि, तिम छि सुय रनान।' येलि  
शिकार्यन सज़ा दिनु आव, तिमव वोन 'नखय छु अख ब्रह्मन अँकिस वुडुर प्यठ  
क्वसुताम किताब वरकु वरकु पॅरिथ ज़ालान तु सॉरी पॅश छि तस अँद्य पँख्य बिहिथ  
बोज़ान। तिमव छु ख्योन तु च्योन त्रोवमुत तु नु छि ओरु योर फेरान। अवय छुनु  
व्वन्य तँहुंदिस माज़स मज़ु तु गुज़ॉयियत तिक्व्याज़ि फाकु फर छु तिमन अँड्यजि  
क्रंज़ुय योत म्वच्योमुत।

येलि राज़न यि बूज़, तँम्य वोन शिकार्यन अथ जायि वथ हावनु खॉतरु तु हॉरॉनी  
सान द्राव पानय अँमिस शख्सस वुछनि। गुनाड्यस ओस जंगुलस मंज़ रोज़नु  
मूजूब मस ज़ेठ्यामुत तु अथ आसस रेंचु गॉमचु। यि ओस तमि शापुक दुह बासान  
युस तस व्वन्य म्वकुलनस तैयार ओस। वदुवन्यन पशन दर्मियान परज़नोव राज़न  
गुनाड्य तु कोरुनस नमसकार। पतु प्रुछुनस सॉरुय दॅलील। तँम्य बुदिमान ब्रह्मनन  
वॅनिस पिशाँच ज़बॉन्य मंज़ पनुन्य सॉरुय दॅलील तु तिमन हालातन हुंज़ कॅरुन  
वखनय यिमव मूजूब यि इल्हॉमी दॅलील बुतरॉच प्यठ वँछमुच ऑस। राज़स तोग  
बोज़ुन ज़ि गुनाड्य छु गनु सुंद औतार तु प्योस परन तु वॅनिनस स्व असमॉनी  
दॅलील बोज़ुनावनु खॉतरु ख्वसु शवु सुंदि म्वखु द्रामुच ऑस। यि बूज़िथ वोन  
गुनाड्यन राज़ु सत्त्वाहनस, 'राज़ु, मे ज़ाजि शे दॅलीलु यिम शन लछन शुलूकन  
प्यठ मुशतमिल आसु। व्वन्य छे अँकिस लछन शुलूकन हुंज़ यि दास्तान। यि नि चु  
तु म्यॉन्य यिम ज़ु चाठ करन च़े निश अमिच वखनय।'

यि वॅनिथ द्राव गुनाड्य राज़स इजाज़थ ह्यथ तु पनुनि यूगु बलु त्रोवुन अँकिस  
जायि पनुन शरीर तु शापु तलु म्वकुलिथ वोत पनुनि अस्ल जायि। राज़न तुज स्व  
दॅलील यथ ब्रहत कथा नाव छु, तु यथ मंज़ नर्वाहन दत्तुन्यन कारनामन हुंज़

वखुनय छे तु गव पनुनिस दरबारस मंज़। अति द्युत तैम्य गुनाड्य सुंघन च़ाटन  
खज़ानु, जॉगीर, स्वन वस्मथ, हँस्य, गुर्य तु लाल। तिहुंदि मदतु अमि किताबि हुंद  
हर्तर च़ितरिथ कॅर सत्वाहनन कथा पीठुच तखलीक युथ सॉरी ज़ॉनिथ ह्यकन ज़ि  
यि दास्तान किथु कॅन्य आयि पिशॉच ज़बॉन्य मंज़ लेखनु। अथ दॅलीलि मंज़ ऑस  
स्व रंगारॅगी ज़ि लुकन गॅयि अथ सुतुय स्व दिलचस्पी ज़ि तिमन गॅयि दिवताहन हुंज़  
दॅलील मॅशिथ तु यि दॅलील गॅयि त्रेन भवनन मंज़ मशहूर।

**This ends Book : 1 (Chapter : 8)**

## कथा सरित सागर

### Book : 2 (Chapter : 9)

#### कथामुख :

प्रानि समयि द्राव येमि दॅलीलि हुंद अमृत शिव सुंदि म्वखु मंजु हिमालय पुत्री हुंदि लोलु तिथय पॉठ्य यिथु कॅन्य लाफॉनियतुक अमृत मंदरा पहाडु सुत्य समंदरस छॉफ दिथ खोत। तिम लुख यिम येमि दॅलीलि हुंद अमृत चन, तिमन यिन साँरी पाफ छलनु। स्वख तु सम्पदा प्रावन तु शिव सुंजि दयायि लबन येथ्य बुतरॉच प्यठ दिवतहन हुंज पदवी।

#### आँही :

शंकरु सुंदि आँरकुक सु पोन्थ रॅछिन त्वहि युस गौरी हुंदि नालुमति ताजुगी लॅबिथ व्वपुद्याव तु येमि सुत्य कामुदीवन शिवु सुंजि त्रेयमि अँछ हुंदि नारु निशि पनुन पान बसुम गछनु निशि रोछ।

विद्याधरन हुंज यि दॅलील बूजिव तु खसु सीवक-गन पुशु दंतन कॉलास पर्वतस प्यठ जटादॉरीयस निश बूज, तु खसु अँम्यसुय पुशुपदंतस निश बुतरॉच प्यठ कानुभूतीयन बूज, येलि सु पुशुपदंत वरारुची बन्योमुत ओस, तु खसु गुनाड्यन कानुभूतीयस निश बूजिथ सत्त्वाहनन बोजुनोव।

#### उद्दयन, राजु वत्सुन्य दॅलील :

अख मशहूर मुल्क छु वत्स। यि ओस त्यूत शूबिदार जि बासान ओस दयन छु यि बुतरॉच प्यठ स्वरगुक किबुर वालनु खॉतरु पानु बनोवमुत। अथ मुल्कस ओस से-मंजस अख बोड शहर यथ क्वसम्बी नाव ओस तु युस लक्ष्मी हुंदि रोजनुच जाय आँस। यि शहर छु बुतरॉच हुंद रॉग। अथ शहरस मंज ओस अख राजु रोजान, यस शतानिक नाव ओस। यि ओस पांडव क्वलुक तु जन्मेजय सुंद नेचुव तु राजु परीकशतुन जुर्, युस अभिमन्यू सुंदिस जुर् सुंद नेचुव ओस। अभिमन्यू युस अरजनुन नेचुव ओस, येम्य सुंद्य ब्वज-बलन शिवस सुत्य मनुट्य मीन्य। तँम्य सुंज आशेन्य आँस बुतराथ तु विश्नुमती तसुंज रॉन्य। ग्वडनिचि दित्य तस लाल तु जवॉहिर मगर दोयिमि ज़ाव नु कैह। अकि दूह ओस राजु शिकारस नीरिथ ओरु-योर फेरान। अँथ्य मंज गँयि तस वनस मंज अँकिस सादुहस सुत्य ज़ान, यस

शांडले नाव ओस। तस तोग बोजुन जि राजस छु नेचुव बकार। सु आव तस सुत्य  
क्वसम्बी तु तँम्यसुंजि रानि द्युतुन अख माजून मंत्र पँरिथ। अमि पतु ज़ाव तस  
अख नेचुव यस सहसरानिक नाव रूद। तँम्य शूबरोव मोल तिथय पॉदय यिथु  
पॉदय अज़मतस पाकीज़ुगी सजावान छे। पतु बन्याव शहज़ाद वली-अहद तु राजन  
त्रोव मुल्क-क्यन मामुलन सनुन। अमि पतु वँछ असुरन तु दिवतुहन हर, तु  
यँद्राज़न सूज़ मताली तस मदत मंगुनि। राजन कोर मुल्क तु शहज़ाद महामंत्री  
योगानंदस तु सेनापति सुपरातिकस हवालु तु पानु द्राव देवासुर संग्रामस मंज़  
असुरन नाश करनि। तँम्य मॉर्य वारयाह असुर यिमन मंज़ यमदनिश्टर तहुंद ज्युठ  
ति ओस। मगर राजु ति मूद अँथ्य लडायि मंज़ यँद्राज़स डेशान। तसुंद शव ओन  
मतालीयन रथस प्यठ तु रानि ज़ोल अँथ्य सुत्य पान। सहसरानिक बन्याव राजु तु  
अँद्य पँख्य यिम ति राजु ऑस्य, तिमव नोमुरॉव तँम्यसुंदि दबदबु किन्य गरदन।  
यँद्राज़न कोर य्वद ज़ेनुनुचि खुशी मंज़ साल। अथ मंज़ सूज़ तँम्य राजु  
सहसरानिकस ति मताली अननु खॉतरु, तिक्याज़ि सु ओस तस दोस्तु सुंद नेचुव।  
स्वर्गस मंज़ ऑस्य सॉरी पनुनि पनुनि नाज़लु ह्यथ व्वसि आमुत्य मगर सहसरानिक  
ओस कुनुय ज़ोन तु तस गव पनुन कुनुय आसुन महसूस। यँद्राज़स तोग यि सोरुय  
बोजून तु तँम्य वोन तस 'राज़ु, परेशॉनी त्राव। बुतरॉच प्यठ छे ब्रॉठुय अख नाज़ल  
चॉन्य आशेन्य बननु खॉतरु थनु पेमुच। बोज़, बु बोज़ुनावथ यि दँलील।

### राज़ु उदयनु सुंद मोल मॉज :

वारयाह काल गव तनु। अकि दूह गोस बु ब्रह्मा जीयस समखुनि। अख वासू यस  
विधूम नाव ओस, आव मे पतु पतु। अँथ्य मंज़ आयि तोर अख विगिन्य अलमभूशा  
ब्रह्मा जीयस समखुनि। तँम्य सुंद पलव डॉल्य वावन, हना। तँम्य सुंज र्वपु तन  
वुछिथ रूद नु वासूहस पानस तान्य, फोर रोवुस। स्व विगिन्य ति लँज तँमिस लोलु  
चेश्मव वुछनि। येलि ब्रह्मा जीयन यि चितुर, तँम्य त्रॉव मे कुन नज़र। तँम्य सुंद  
मतलब चितरिथ खोत मे खश्मु तु यिमन दूधुन्य दितुम शाफ 'तोह्य दूधय बे-शर्म  
बँनिव बुतरॉच प्यठ ज़न्म ह्यथ बॉच ज़ु'। ऐ सहसरानिक, सु वासू छुख चु, युस  
चँद्र वंशीयन हुंद चोंग छु। स्व विगिन्य छे अजोद्यायि मंज़ राजु क्रतावर मनसुन्य  
कूर यस मृगावती नाव छु।

यँद्राज़न्यव यिमव लफज़व सुत्य लँज तँम्यसुंदिस दिलस मंज़ लोलु मनकल वुहनि  
यिथु पॉदय नारस वाव वुहवान छु। अमि पतु कोर यँद्राज़न वारयाह यज़थ  
अफज़ॉयी वँरिथ सु पनुनिस रथस मंज़ र्वखसथ, तु सु ह्योतुन मतालीसस सुत्य



पनुनि राजदानि कुन नेरुन। अमे विजि आयि विगिन्य तिलोत्मा, तु तमि वोनुस 'राजु, मे छे चै सुत्य कथ करुन्य, रछाह ठँहर।' मगर तँम्य बूज नु कैह, तिव्याजि, मृगावती हुंघन खयालन मंज ओस सु लीन गोमुत। सु ठँहर्याव नु, तु यि वुछिथ खोत तिलोत्मायि शरारत, तु तमि द्युत तस शाफ 'राजु, चु रोजख बराबर च्वदहन वँरियन तस निश दूर येम्यसुंघन खयालन मंज लीन रुजिथ चै म्यॉन्य कथ ति बूजथ नु।'

मतालीयन बूज यि मगर राजु ओस पनुन्यन खयालन मंज मस। रथस मंज वोत तँम्य सुंद बदन क्वसम्बी मगर तँम्यसुंज आत्मा ऑस अजोद्यायि मंज पनुनि मसवलि वँन्य दिवान। राजुदानि वॉतिथ वँन्य राजन पनुन बोस लोचुरावनु खॉतरु मृगावती हुंज यँद्राजस निश बूजमुच कथ योगानंदस तु बाक्यन वँजीरन। दूरिरुक ताब नु अँनिथ सूज तँम्य क्रीतावर्मनस कोरि मांगयि खॉतरु मँजिम यॉर्य। मँजिम यार्यन हुंज कथ बूजिथ वोन यि तँम्य पनुनि आशनि कलावतीयि। तमि वोनुस तोरु 'असि पजि सहसरानिकु सुंज कथ मानुन्य, तिव्याजि यँहय कथ वँन्य मे अँक्य ब्रह्मनन सोपुनस मंज ति।' राजु गव ख्वश तु तँम्य होव मँजिम यार्यन मृगावती हुंदि नचनुक, ग्यवनुक तु बाक्य ह्वनुरन हुंद कमाल तु तँम्य सुंद न्यरल तु न्यरमल हुस्न। यिथु पॉट्य द्युत क्रितावर्मनन पनुनि कोरि हुंद अथु सहसरानिकु सुंदिस अथस मंज, य्वसु लँतीफ फनन हुंदिस वरतावस मंज बे-मिसाल ऑसिथ ति नबुच जून प्रजलान ऑस। अमि अजलु मिलवनु सुत्य कोर अँक्य बेयि सुंघन ग्वनन मंज हुंरर तु यि ओस ह्वनर तु ज्यहानतुक म्युल।

### तलोत्मायि हुंद शाफ पूर सपदुन :

अमि पतु कम्य कॉल्य ज़ाव राजु सुंदिस वँजीरस अख नेचुव यस योगेंद्रायन नाव कोरुख। सेनापति सुपरातिकस ति ज़ाव नेचुव, यस रुमनदत्त नाव रुद। तवाजह वजीरस ति ज़ाव नेचुव यस वसंतक नाव कोरुख। कैह दूह पतु लँज मृगावती लेदरुनि तु यि ऑस अमिच बावथ जि स्व ति ऑस ग्वबि ख्वरु। राजस आसु फकथ तस कुन अँछ दरस आसान। अकि दूह वोनुस तमि जि तस छु रतु तलावस मंज श्रान करनुक शोक गछान तु राजस पजि रतु तलाव बरुनॉविथ तस प्यठ एहसान करुन। राजु ओस रुत इनसान। ग्वबि ख्वरि रनि हुंद शोक पूर करनावनु खॉतरु बरनोव तँम्य अख तलाव लाछि वानि तु बाक्य व्वजुल्यव रसव सुत्य। वुछनु तलु

ओस यि रतु बँरिथ सर बासान। रॉन्य लँज अथ मंज़ शोकु सान श्रान करनि। आकाँश्य ओस गरुड ज़ॉच हुंद अख जानवर वुफान। तस बासेयि स्व न्यूल मामस तु जोंटु दिथ नियन कथ ताम अनज़ॉन्य दिशायि कुन तुलिथ। राजु गव दिल मलूल। तस छांडुन ज़न तस यादुय रूद नु। सु ओस मृगावती योत लोल बरान। तस बास्यव ज़ि स्व नियि नु जानवरन बँल्यकि न्यून तसुंद दिल। सु प्यव बेहोश गँछिथ पथर। मतालीसस ओस यि सोरुय पनुनि आगाह किन्य नज़रि आमुत। युथुय राजस होश आव, सु वोथ वावु मंज़ु तु द्युतुन राजस तसली। पतु वोनूनस तलोत्मायि हुंदिस शाफस मुतलक युस तँम्य कैह काल ब्रोंह बूजमुत ओस। राजु ओस गमु सुत्य व्यसुर्योमुत। सु लोग व्यदाख दिनि। 'म्यॉन्य टॉदय, तमि ज़लील तलोत्मायि कोर ऑखुर पनुन दोप पूर। व्वन्य सपुद तस शापस मुतलक सोरुय मोलूम तु पनुन्यन वज़ीरन हुंद सलाह मॉनिथ रंजुनोव तँम्य मुश्किलन पनुन दिल, युथ ब्रोंह कुन तस पनुनि मसवलि सुत्य म्युल सपदि।

यपॉर्य येलि तँम्य जानवरन मृगावती तुज, तस तोग बोजुन ज़ि स्व ऑस नु न्यूल माज़ बँल्यकि ज़िंदु इनसान। तँम्य त्रॉव स्व दूर अँकिस बालु तेंतॉलिस प्यठ यथ सिरिथि खसान छु। जानवर गव पानस, तु मृगावती गँयि यि वुछिथ परेशान ज़ि स्व कति ऑस? स्व ऑस जंगुलन मंज़ महज़ अँकिस पलुवस मंज़ कुन्य जँन्य। स्व लँज वदुनि। अँथ्य मंज़ वुछ स्व अकि बजि स्वरफेनि। तमि मुचरोव स्व खेनु खॉतरु ऑस मगर अमि ब्रोंह ज़ि स्व लागिहे तस ऑस, कुसताम जवां मर्द वोथ आकाश। स्व स्वरफेन्य मॉरुन तु गव गॉब। मृगावती मोंग दयस मोत तु अँकिस मद हँस्तिस ब्रोंह कनि द्युतुन पनुन पान दॉरिथ मगर तँम्य ति कोर नु तस कैह। ज़न तु तस सुत्य क्वसुताम हमदर्दी ऑसुस। यि ति काँचाह वेखुच कथ ऑस, मगर नअ, अथ मंज़ ओस नु व्योखुत किहिन्य तिक्याज़ि शिव क्याह छुनु करान।

### उदयन सुंद ज्योन :

ग्वबि खवरु आसनु मूजुब ऑस स्व नँमिथ, तु सोंचान ज़ि पनुन पान त्रावु डुलु मगर सूंचुन ज़ि तँम्य सुंद बाँच आसि तस खॉतरु वदान, स्व ति लँज बडि बडि वदुनि। अँथ्य मंज़ आव ओरु अँकिस रेश्य सुंद नेचुव। युस कंद मूल तु फल छांडुनि द्रामुत ओस। सु आव तस नखु तु स्व वुछिन गमुच मूरत हिश। तँम्य प्रुछ तस अथ हालँच मुतलिक तु तसली दिथ वातुनॉवन जामदागनी सुंदिस आश्रमस मंज़। तति वुछ तमि सु र्योश, युस सरतापा हमदर्दी ओस। जामदागनी ओस त्यूत तीजवान ज़ि कोहुक पूर कन्यक तरफ ओस तँम्य सुंदि तीज़ु सुत्य प्रज़लान। बासान ओस ज़न

तु सिरिं छु अँत्यथुय रोटु सपुदमुत। स्व पेयि तस पादन। रेश्य युस सारिनुय पलजान ओस तु यस आगाह म्वकुल ओस, वोन तस मुसीबथ जँदनि, यस फिराकुचि श्राकि दिल कतुरमुत ओस 'मयॉन्य कूर्य, येति पेयी च़े त्युथ नेचुव थनु, युस पनुनि खांदानुक नाव नेशिनावि। च़ु मु वद। च़े मेली बेयि पनुन अज़लु लोन।' येलि तमि श्रूच़ ज़नि रेश्य संज़ यि कथ बूज़, स्व लँज तँथ्य आश्रमस मंज़ रोज़ुनि तु पनुनिस आदन बॉजिस मेलनुचि सँच़ करनि। केह दूह सपदिथ ज़ाव तस अख स्वंदर बालुक, तिक्याज़ि रुत्यन सुत्य सोहबत थँविथ छु रुतुय सपदान। अमी विज़ि सपुज़ आकाश वॉनी 'व्यकारु वोल मेहमान तु मशहूर राज़ु ज़ाव। अँमिस छु उदयन नाव तु अँम्यसुंद नेचुव आसि सारिनुय विद्यादरन हुंद राज़ु।' यि वॉनी बूज़िथ गँयि मृगावती हुंदिस दिलस बेयि स्व खुशी हॉसिल य्वसु केह कालु प्यठ रॉस्य गॉमुच़ ऑस। अथ तपोवनस मंज़ लोग सु बालक प्रथनि। तस ऑस्य फकथ पनुन्य ग्वन सुत्य-बॉज्य। अँमिस जवां-मर्द बचस ऑस्य सॉरी क्षेतुर्य लक्षन तु तस ओस जामदागनी र्योश सॉरी अँलिम परुनावान, तु तीर अंदॉज़ी हेछि नावान। अँमिस बच़ सुंदि लोलु वँड मृगावती पनुनि नरि मंज़ु अख बंगुर तु लॉजिनस। अथ ओस सहसरानिकु सुंद नाव लीखिथ।

### शेवर तु स्वरुफ :

अकि दूह ओस उदयन अँकिस रूसिस पतु दोरान। जंगुलस मंज़ वुछ तँम्य अँकिस जायि अँक्य शेवरन अख स्वरुफ रोटमुत। तस आव अँमिस स्वंदर स्वरुफस वुछिथ आर। तँम्य वोन शेवरस 'म्यानि खॉतरु त्रावुन यि स्वरुफ यलु।' तँम्य वोनस तोरु 'सॉमी, यि छु म्योन रोज़गार। बु छुस अख गँरीब इनसान तु स्वरुफन नचुनॉविथ छुस गुज़ारु करान। युस स्वरुफ मे ब्रॉह ओस, सु मूद। यथ गँनिस वनस मंज़ छाँड दिथ वुछ मे यि स्वरुफ तु माँथुर दिथ कोरुम कोबू।' येलि उदयनन यि बूज़, तँम्य दिच़ तस स्व बंगुर य्वसु माजि तस लॉजमुच़ ऑस, तु तस वोनुन स्वरुफ यलु त्रावनु खॉतरु। शेवरन रँट बंगुर, स्वरुफ त्रवुन यलु तु द्राव पानस। सु स्वरुफ गव ख्वश तु तस ब्रॉह कनि वोनुन कलु त्रॉविथ 'बु छुस वासकी सुंद ज़्युठ बोय तु मे छु वासूनेमी नाव। च़े रोछुथस बु, रठ यि साज़। अमिच तार छे मोदुर। यि छेनु साज़ुय योत वायान बँल्यकि तिम पोशि मालु ति बनावान यिम ज़ांह छेनु बरु गछान। यि साज़ छु सु ट्योक ति करान, युस ज़ांह व्वथान छुनु।'।

स्वरुफ द्राव तु उदयन ति वोत रेश्य आश्रमस मंज़। अँमिस वुछिथ ज़न तु तँम्य संज़ि माजि अँछन अमृत प्यव।

अथ्य मंज वोट सु जंगली, येम्य उदयनस निश बंगुर रँटमुच्र ऑस, शहरस मंज बंगुर कुनुनि। अथ ओस राजु सुंद नाव लीखिथ, अमि किन्य रोट सु रॉछदरव तु वातुनोवुख राजु दरबारस मंज। राजु सहसरानिकन प्रुछ तस जि तँम्य कति ऑस स्व बंगुर अँनिमुच्र। शेवरन वँन्य तस सॉरुय दलील। यि बूजिथ रँट स्व बंगुर राजन अथस मंज तु लँगिस रंगु रंगु शक गछुनि। अमे विजि बूज राजन आकाँशी आवाज, येमि तँम्य सुंद जुदोयी हुंद नार तिथय पॉट्य हना छेवुर, यिथु पॉट्य वँहरॉच्र रुद दँद्यमुतिस मोरस शेहलावान छु। 'राजु शाफ सोर्याव। चॉन्य आशेन्य मृगावती छे जामदागनी सुंदिस आश्रमस मंज चोन नेचुव ह्यथ।'

खबर किथु ताम पॉट्य सोर्याव सु द्वह तिक्क्याजि राजस ऑस गुल्य मूरनावन वाजेन्य कल गनेमुच्र। दोयिमि द्वह वोन राजन शेवरस वथ हावनु खॉतरु तु फोज ह्यथ द्राव तीज्जी सान पनुनि दिलु दुबरायि लबुनि।

वारयाह फॉसलु कँडिथ त्रोव राजन तमि द्वह अँकिस जंगुलस मंज सरु बँटिस प्यठ डेरु। शामस ओस सु बेकरार तु तमि किन्य वोननुन पनुनिस कथु गँरिस, यस संगतक नाव ओस तु युस निशि बेहनि आमुत ओस 'बु छुस मृगावती हुंद लालु रोय वुछनु खॉतरु केशान। मे बोजुनाव तिछ कांह दलील येमि सुत्य म्याँनिस दिलस करार मेलि।' यि बूजिथ वोनस संगतकन 'राजु, चु कवु छुख यूत परेशान? शाफ म्वकलिथ छुय रानि सुत्य व्वन्य च़े म्युल सपदन वोल। इनसानस छि वारयाह फिराक तु मिल्य बरदाश करुन्य प्यवान। अमिच मिसाल दिनु खॉतरु बोजुनावथ बु अख दलील।

### श्री दत्त तु मृगन कवेती हुंज दलील :

राजु, ब्रॉह कालि ओस मुल्के मालवाहस मंज अख ब्रह्मन रोजान। तस ऑस्य ज़ु नेचिव्य यिम सारिन्य टॉट्य ऑस्य। अँकिस ओस कालु नेमी तु बेयिस विगत भय नाव। येलि यिमन मोल स्वर्गस गव, यिम ऑस्य बँड्य, तु अलिम प्रावुनि द्रायि यिम पाटली पुत्र कुन। तति लँग्य तिम परुनि तु परुन म्वकुलॉविथ दिच़ तिमन पनुन्य ग्वर देवशरमनन पनुनि ज़ु कोरि नेथुर्य। यिमन ऑस्य हमसायि आसन वॉल्य तु कालु नेमियस युहुंद हसद ओस, लोग लक्ष्मी हुंद अवाहन तु हवन करनि। दीवी द्युत तस दर्शुन तु वोननुनस 'च़ु प्रावख दौलथ तु बेयि अख नेचुव, युस राजु बनि

मगर ऑखुरस यिख चु अँकिस डाकू सुंद पॉदय मारनु तिक्याज़ि च़े त्राँवुथ हवनस कूदु सान आहुती।’

हनि हनि बन्याव कालु नेमी अमीर तु केंह कॉल्य पतु ज़ास अख नेचुव, यस श्रीदत्त नाव थवनु आव। तिक्याज़ि सु ओस श्री याने लक्ष्मी तस द्युतमुत। श्रीदत्त लोग फबनि तु ब्रह्मन ऑसिथ ति लोग हथियार चलावनि, मुकू बाँजी तु पहलवाँनी करनि। अमि पतु गव कालुनेमी सुंद बोय विगतभय अँकिस व्वपर मुल्कस तिक्याज़ि तस ऑस ज़नानु स्वरफु ट्वपि सुत्य मूमच़ तु कुनि ओसुस नु दिल लगान। तवय ओस सु व्वन्य फकथ तीर्थन फेरान।

तमि मुल्कुक राज़ु ओस वलभ-शक्ति तु श्री दत्तन्य वस्फ वुछिथ बनोव तँम्य सु पनुनिस नेचिविस विक्रम शक्तीयस साँथी। विक्रम ओस तेज़ तु अवु किन्य प्योस श्री दत्तस सुत्य तिथय पॉदय रोज़ुन यिथु पॉदय दर्योधनस सुत्य भीम रोज़ान ओस। अवंती हुँद्य ज़ु क्षेतुर्य बाहूशालिन तु वज़मुश्टी ति बनेयि तस यार। दक्षनुक्य केंह नफर लँग्य तस सुत्य यारानु लागुनि तिक्याज़ि तँम्य ऑस्य तिम दबि मंज़ हारुनॉव्यमुत्य। यिम ऑस्य महाबाल, व्याघरभट, उपेंदरबाल तु निश्टुरक। दूहा दूहा गव गछान। अकि दूह द्राव श्रीदत्त शहज़ादस तु यारन सुत्य गंगायि बँठिस कुन गिंदुनि। अति बनोव गिंदुनस मंज़ श्रीदत्त पनुन्यव तु शहज़ादु सुंदयव यारव राज़ु। अथ प्यठ खोत शहज़ादस खश्मु तु तँम्य वोन श्रीदत्तस दब करनु खॉतरु। दबि मंज़ ज़्यून श्रीदत्तन। दब हॉरिथ बासेयि शहज़ादस ज़लालत तु सु लोग अँमिस खसुवनिस गंदुरस मारनुक संज़ करनि। शहज़ादु सुंदयन इरादन हुंद लोग श्रीदत्तस पय तु सु द्राव तति पनुन्य यार दोस ह्यथ।

### असर कूर तु सुह :

पकान पकान वुछ श्रीदत्तन अख कूर गंगायि फटान। तस बास्यव ज़न तु लक्ष्मी सँदुरस मंज़ ऑस। तँम्य दिच़ तस पानि मंज़ु खारनु खॉतरु व्वठ तु तँम्य सुंद शे यार रूद्य बँठिस प्यठ। श्री दत्तन कँर तस कोरि टँपिस थफ मगर स्व गँयि तोति पॉनिस मंज़ ब्वन वँसिथ। सु ति वोथ अँथ्य वाँतिस मंज़। येलि सु वारयाह ब्वन गव, तँम्य वुछ अख ऑलीशान शिव मंदर मगर नु ओस कुनि पोन्थ तु नु स्व ज़नानु। थोकमुत ति ओस सु। यि नफीस मंदर वुछिथ च़ाव सु ब्रेशभ वाहनस नमसकार करनि। मंदुरस सुत्य बागस मंज़ गुजॉरुन राथ। सुबुहस वुछ तँम्य स्व ज़नानु। स्व ऑस मंदुरस मंज़ पूज़ा करनि आमुच़। स्व ऑस बरपूर ज़नानु, ग्वनव सुत्य बँरिथ

हुस्नु मूरत। पूजा कॅरिथ द्रायि स्व ही थॅर पनुन गरु कुन तु श्रीदत्त लोग तस पतु पतु पकृनि। स्व मंदूर ऑस स्वर्गु द्वार यथ मंज स्व यावन मॅच चायि तु श्रीदत्तस सुत्य कथ करनि, बीठ स्व शूबिदार नाज़ल अँकिस संदलि प्यठ। तस आसु सासु बजु च्वंजु खँदमतस। तस नखु ब्यूठ श्रीदत्त ति अँकिस जायि। अमि पतु लजि तँमिस पदमानि हुंजु मस खॉस्य चेश्मु अशक म्वख्तु हरनि तु अँशिस लँज तसुंदिस वछस तान्य दार। श्रीदत्तस आव आर तु पृछुनस 'च क्वसु छख तु चे क्या दूख छुय ? मे वन, बु करु चोन चारु।' तमि वोनस खूच्य खूच्य 'अँस्य छे असर राजु बँल्य सुंदिस नेचिव्य बॉली सुंजु कोरि। बु छस यिमन सारिनय ज़िठ तु मे छु विद्युतप्रभा नाव। सोन बुड्य बब कोर वेश्नूहन वारयाहस कालस कौद तु सोन मोल ति मोर तँम्य अँकिस दबु मुकाबलस मंज। सु मारनु पतु छुनि अँस्य तँम्य कँडिथ तु असि थोवुन अख सुह रॉछ, युथ नु अँस्य बेयि ओर अचव। असि छु योहय अफसूस। अख यक्ष बन्याव क्वबेरुनि शापु सुह तु यि छु ब्रौदुय वननु आमुत ज़ि यक्ष सुंद शाफ म्वकलि तेलि येलि तस कांह मनुश ज़ेर करि। असि येलि वेश्नूहस यि प्रुछ ज़ि अँस्य कर ह्यकव पनुनिस शहरस अँचिथ, तँम्य वँन्य तोरु यि कथ। चु करुन सुह युस सोन दुशमन छु, पूर पॉट्य ज़ेर। येलि चु सु हारुनावुहन, सु दियी चे अख तलवार यथ मृगंका नाव छु तु अमि तलवारि सुत्य ज़ेनख चु सोरुय तु बनख राजु। अवय ओनुख चु मे फंद कॅरिथ योर।'

यि बूज़िथ मोन श्रीदत्तन तु दोयिमि दूह द्राव सु तिमु दुतु स्वंदरु ह्यथ युथ तिमु तस वथ हावन। शहरस नखु वॉतिथ मोर तँम्य सु वोखु सुह। शाप म्वकलिथ बन्याव सु इनसान तु पनुनि एहसानमंदी हुंद निशानु दिचुनस तलवार। सु गव गॉब तु अँथ्य सुत्य गव तिमन दुतु स्वंदर मालन हुंद दूख ति गॉब। अमि पतु चाव श्रीदत्त तस दुतु स्वंदरि सुत्य। तस आसु पनुनि ल्वकचि बेनि ति हमराह, तथ ऑलीशान शहरस मंज युस अनंतनागु सुंद्य पॉट्य बुतरॉच मंज फोटमुत ओस। तमि दिचु तस वॉज ख्वसु ज़हरुक असर खत्म ऑस करान। श्रीदत्तुन दिल लोग तस नाज़लि हुंजि जुल्फु वालु वाशि मगर तमि वोनस 'ग्वडु कर यथ तलावस मंज श्रान, मगर तलवार थव अथस मंज तिक्याज़ि अति छु मगरमछ। तँम्य मोन तु त्रॉवन व्वठ, मगर येलि पानि मंजु ह्योर खोत, तँम्य वुछ पनुन पान तँथ्य जायि गंगायि बँठिस प्यठ येत्यथ तँम्य ग्वडु स्व ज़नानु बचावनु खॉतरु व्वठ त्रॉवमुच ऑस। पानस निश तलवार तु वॉज वुछिथ गव सु यि सूंचिथ हॉरान ज़ि सु किथुक्कन्य ओस तल पातालु खोतमुत। मगर तस असर मसवलि हुंजि चालॉकी मुतलिक सूंचिथ गव गमगीन, मगर करिहे क्याह ? मजबूर सपदिथ लोग पनुन गरु कुन पकृनि, युथ

यारन समखि। निशतुरकन वुछ सु तु खॉर पाठ कॅरिथ वोनुनस 'येलि च़े गंगायि व्वठ त्रॉवथ, असि छॉडुख च़ु वारयाहन दूहन मगर येलि नु च़ु लोबुख, अँस्य गँय न्यराश, तु चानि लोलु हेत्य पनुन्य कलु च़टुन्य जि अकि आकाँश वॉनियि थॉव्य यि च़ेनुवन दिथ बाज़ 'म्यान्यव गोबुरव, बांबरि मंज़ मु तुलिव कांह कदम। तुहुंद यार वाति जिंदय वापस।' यि बूज़िथ लॅग्य अँस्य चॉनिस मॉलिस शेछ वननु खॉतरु ब्रॉहकुन पकनि जि अख शख्साह आव वॅल्य वॅल्य असि कुन तु वोनुन 'वुन्यक्यस मु अँच़िव शहरस मंज़ तिक्क्याज़ि राज़ वलभशक्ति गव स्वरुगस तु सारिवुय वॅज़ीरव बनोव यक राय सपदिथ विक्रम शक्ति नोव राज़। राज़ बॅनिथ गव सु दोयिमि दूह चॉनिस मॉलिस निश तु खश्मु सान पृछुनस जि तँम्य सुंद नेचुव कति ओस। तँम्य वोनुस 'मे छुनु मोलूम।' मगर राज़स बास्यव जि तँम्य थोव पनुन नेचुव चूरि। राज़स खोत सख शरारत तु वोनुनस जि सु ओस चूरि, तु अँथ्य मंज़ छुनुन मॉरिथ। यि वुछिथ फुट तसुंजि आशनि दिल। जॉलिम छि पनुन्य पापु डेर पैहम सॉबुरान। अवय छु सु व्वन्य श्रीदत्तस छंडान। तु श्रीदत्तुन्य दोस आसनु मूजुब मा मार्यव सु त्वहि ति।' येलि तँम्य शख्सन असि यि च़ेनुवँन्य दिच़, सॉन्य च़ोर यार गँयि उज्जैनी तु मे वोनुख येति चूरि रुज़िथ च़े प्रारुन। व्वलु व्वन्य गछव अँस्य ति पनुन्यन दोस्तन निश। निशतुरकस निश यि सोरुय बूज़िथ कोर तँम्य मॉलिस माजि वदुनाह तु पतु त्रॉवुन पनुनि तलवारि कुन नज़र, तिक्क्याज़ि यँहय आँस तँम्यसुंदि इन्तिकामुच आश, तु अमि पतु द्राव सु निशतरकस सुत्य उज्जैनी कुन युथ सु पनुन्यन यारन मेलि।

श्रीदत्त लोग वति पकान पकान निशतरकस पनुन्य दलील बोज़ुनावुनि। अँकिस जायि वुछ तँम्य अख ज़नानु वदान। तमि वोनुस 'मे छु उज्जैनी गछुन मगर कुनि ज़नि छम नु वथ यिवान। श्रीदत्तस आव आर तु वोनुनस सुत्य पकनु खॉतरु। राथ लॅज तिमन अँकिस सुनसान शहरस मंज़। राथ क्युत गव सु हुशार तु तँम्य वुछ तमि ज़नानि ओस तसुंद यार मोरमुत तु तँम्य सुंद माज़ आँस शोक सान ख्यवान। सु वोथ थोद, पनुन्य तलवार रँटुन अथस मंज़ तु स्व ज़नानु आयि पनुनि असली राक्षस शक्लि मंज़। श्रीदत्तन रँटु स्व टपि, मारिहेस जि स्व बनेयि विगिन्य, तु वोनुनस 'मे मु मार। मे त्राव यलु। बु छस नु राक्षसेन्य। विश्वामित्रन द्युत मे शाफ तु तवय गोम यि हाल। विश्वामित्रन ओस दौलच़ि हुंद दिवता बननु खॉतरु तप करान तु बु सूज़ुस क्वबेरन तस खंडन करनि। येलि मे सु पनुनि हुस्नु सुत्य ब्रॅमरॉविथ ह्योक नु, बु बनेयस हॉबतनाक। यि वुछिथ द्युत तँम्य मे शाफ, युस म्याँनिस कसूरस मुताँबिक ओस। 'ज़लील ज़ँन्य, गछ च़ु बन राक्षसेन्य तु मारुख मनुश।'

तँम्य वोन जि म्योन शाफ म्वकलि येलि चु मे टपि रटख। यिथु पॉदय बनेयस बु राक्षसेन्य तु येमि शहरुक्य लुख खेयम। चे म्वकुलोवुथ वारयाहि कॉल्य म्योन शाफ। अमि खॉतरु मंग कैह वरदान। ' येलि श्रीदत्तन तसंज सॉरुय कथ बूज, तँम्य वोन तस एहतिरामु सान, चु छख मॉज। मे दि यि वरदान जि म्योन यार गछि जिंदु। अमि रोस छुनु मे कैह बकार।' तमि वोन 'ती सपदिन' तु गँयि गॉब। निश्टरक वोथ, ज़न तु मच्चि नैद्वि हुशार गँछिथ। सुबहस द्रायि तिम तु ऑखुर वॉत्य उज्जैनी येति तस वुछिथ तँम्य सुंदन यारन तिथय पॉदय नोव जुव चाव यिथु पॉदय ओबुर वुछिथ मोरस शादमॉनी सपदान छे। येलि दोस्तन तँम्य पनुन्य सॉरुय वेखुच दलील वँन्य, बाहू शालिनन न्युव सु पँछ्य लाजि गरु तु सु लोग तति तमि आरामु सान रोज़नि ज़न तु सु पनुनुय गरु ओस।

### राज़ु क्वमार मृगन कवती :

अँथ्य मंज येलि सोंतु काल चलान ओस, सु गव पनुन्यन यारन सुत्य अँकिस बागस मंज ख्यन चन तु शॉदियानु करनि। तति वुछ तँम्य राज़ु बम्बुकी संज कूर य्वसु ज़न तु फुलय बँनिथ तोत तमाशु वुछनि आमुच ऑस। तस ओस मृगनकवती नाव तु वुछान वुछानुय रँट तमि तँम्यसुंदिस दिलस मंज जाय। मृगनकवती हुंजु नज़रु ति लजि तस गथ वँर्य वँर्य अतुगथ दिनि। अमि पतु गँयि स्व गँनिस कुन, तु येलि श्रीदत्तस स्व अँछव तलु डँज, सु गव परेशान। तँम्य सुंदिस यारस बाहू शालिनस तोग यि सोरुय बोज़ुन तु तँम्य वोनस 'श्रीदत्त, पनुन व्वंदु मु खट। व्वलु अँस्य गछव ऊर्य येति राज़ु क्वमॉर छे। तँम्य मोन तु तिम द्वश्य गँयि मृगनकवती नखु। अमे विजि गँयि तति अख चिख य्वसु बूजिथ श्रीदत्तस दिल कतरनु आव। हय हय, राज़ु क्वमारि दिच स्वरफन ट्वफ। यि बूजिथ गव बाहू शालिन अँकिस खॉन्यसामानस तु वोनस 'म्यॉनिस यारस छि अख वॉज य्वसु ज़हरुक असर खत्म कँरिथ बँलुरावान छि। खॉन्यसामान आव दोरान तु श्रीदत्तस ख्वरन तल प्यथ न्यून सु पानस सुत्य। तँम्य लॉज राज़ु क्वमारि अथस वॉज तु लोग मंथुर परनि। स्व वँछ थोद। सॉरी नोकर चाकर च्वंजु तु दायि गँयि ख्वश। तिम लँग्य श्रीदत्तुन्य ग्वन ग्यवनि। यीतिस कालस मंज वोत राज़ु बम्बुकी ति तोर। श्रीदत्त आव पनुनिस यारस सुत्य वॉज रटुनय वापस। राज़न सोज़ु तस वारयाह डालि, दौलथ तु स्वन ति। यि सोरुय द्युत तँम्य पनुनिस यारु सुंदिस मॉलिस मगर सु ओस मृगनकवती खॉतरु बेकरार, तु तँम्य सुंद सॉरी दोस अँस्य परेशान। अँथ्य मंज आव मृगनकवती हुंद अख राज़दार, तस निश वॉज वापस करनुकि हीतु, तु तँम्य



वोन तस 'मृगनकवती छु फाँसलु कोरमुत जि या तु बनख चु तस बाँच, नतु नेरि तँम्यसुंज पँट।' यी बूजिथ लँग्य तिम साँरी कलु रलाँविथ अथ सिलसिलस मुतलक साँचुनि तु कोरुख फाँसलु। 'राजु क्वमार निमोन अँस्य कांह तरकीब कँरिथ गुपिथ पाँढ्य मथरा।' सोरुय अँजुराँविथ द्राव मृगनकवती हुंद राजदार वापस। दोयिमि दूह द्राव बाहूशालिन पनुन्य त्रे यार ह्यथ मथरायि कुन। पडावु पतु पडावु थाँविन राजु क्वमॉर खाँतरु गुर्य। यपाँर्य अँन्य श्रीदत्तन अख ज़नानु तु तँम्यसुंज कूर शामस बाँग्य महलस निश। तिम चायि अंदर। मृगनकवती हुँघ राजदारन चाँव्य तिम शराबु तु पतु दितुन चाँग्य ज़ालनुकि हीतु महलु खानस नार। मृगनकवती द्रायि न्यबर येति श्रीदत्त प्रारान ओस तु तँम्य सूज स्व बाहूशालिनस निश पनुन्यन दून दोस्तन सुत्य। तिम माजि कोरि आसु शराबुकिस नशस मंजु शौगिथ तु यिथय पाँढ्य गँयख चुन्य। लुकव ज़ोन जि शहज़ादु तु तँम्य सुंज नोकुराँन्य छि दँजमुच। सुबहस वुछ श्रीदत्त तति सारिवुय तु तस प्यठ गव नु काँसि कांह शख। दोयिमि दूह शामस द्राव सु पनुन्य तलवार ह्यथ पनुनि मसवलि पतु पतु य्वसु अमि ब्रॉह द्रामुच आँस। रातस तीज़ी सान पँकिथ वोत सुबहस विंध्यावनस मंजु। अति आयि अँमिस बद-शगून तु अमि पतु वुछ अँम्य पनुन्य साँरी दोस रतु सँर्य गाँमुत्य। तमि वोन तस 'असि कोर अकि गलवान जमाँच हमलु तु सोरुय अथु मुहिथ निथ नियख राजु क्वमॉर ति गुरिस प्यठ। चु मु हे साँन्य फिकिर। चु नेर तु स्व बचावुन। वुनि आसन नु तिम ज़्यादु दूरेमुत्य।' तिहुँद गुप्तार बूजिथ द्राव श्रीदत्त मगर ज़ंगु आसस नु नेरान। तु पोत फिर्य फिर्य ओस नज़रु दिवान। कँह दूर पँकिथ वुछ तँम्य अख कारवान तु अथ मंजुस वुछुन अख क्षेतुर्य ज़ाँच, बहोदुर नफर, तु राजु क्वमॉर आँस अँमिसुय गुरिस प्यठ। सु वोत तस निश तु वोनूनस स्व यलु त्रावनु खाँतरु। मगर येलि सेजि आँगजि ग्यव खोत नु, श्रीदत्तन द्युत सु लति सुत्य गुरि प्यठ दाँरिथ तु छुनुन माँरिथ। बाक्य सवारव कोर तस हमलु मगर अँमिस क्षेतुर्य सुंदिस गुरिस खँसिथ माँर्य तँम्य तिमव मंजु वारयाह। बाक्य चँल्य। तँम्य तुज मृगनकवती पानस सुत्य गुरिस प्यठ तु लोग पनुन्यन यारन कुन पकनि। रछाह पँकिथ वँथ्य तिम गुरि प्यठु ब्वन तिक्याजि गुर ओस ज़खुमव सुत्य बँरिथ। अमि पतय द्युत गुर्य अमानथ। मृगनकवती आँस खूचमुच तु थँचमुच। अमि किन्य लँज तस सख त्रेश। तस तँतिथुय थँविथ गव सु ओरु योर त्रेश छांडनि। यीतिस कालस लूस सिरि। तँम्य लोब अँकिस जायि पोन्स मगर व्वन्य राँवस वथ। रातस रूद सु वनस वँन्य दिवान तु चकरावु किन्य मातम करान। सुबहस वोत सु तथ जायि येतिनस गुर्य सुंज लाश आँस, मगर शहज़ाँज हुँद ओस नु कांह पय। बदहाल सपदिथ थँव तँम्य पनुन्य तलवार पथर तु पानु खोत अँकिस कुल्य तँताँलिस प्यठ

दँछुन खोवुर नज़र दिनि। तमे विज़ि आव अख जंगल सरदार अपॉर्य कँह नफर ह्यथ तु तँम्य तुज कुलि तलु तलवार। तस वुछिथ वोथ श्रीदत्त ब्वन तु तस पृछुन, तँम्य मा ओस कांह हसीन ज़नानु वुछमुच़। जंगल सरदारन वोनुस 'चु गछ म्योन गाम। मे छु यकीन जि चॉन्य टॉठ आसि तूर्य वॉचमुच़। बु ति वातु वापस तु तँती दिमय यि तलवार।' लोल क्याह वुनु छुनु वालान। श्रीदत्त द्राव सरदारु सुंघन मोहनिव्यन सुतुय । गामस मंज़ वॉतिथ वोन तिमव तस 'चु छुख थोकमुत। तान्य शंग। 'सु ओस पँज्य पॉट्य सख थोकमुत। तमि किन्य पेयस जल नँदुर। येलि सु हुशार गव, तँम्य वुछ पनुन्यन खवरन हाँकलु कँरिथ। सु लोग पनुनि लोल आशानि खॉतरु वदुनि, येमि तस तकदीरुचि गतुरेनि हुंघ पॉट्य ब्रिज़िस खंडस गथ दिथ सरूर द्युतमुत ओस तु दोयिमि गतु तँम्य सुंज़न आशन हाशि करिमचु आसु।

### श्रीदत्त तु स्वंदरी :

कँह दूह गँछिथ आयि तस निश अख नोकरॉन्य तु वोनुनस 'चु छुख अँकिस चॉर्य सुंघ पॉट्य मोतुकिस ओसस मंज़। जंगल सरदार छु कथ ताम ज़रूरी कामि गोमुत। येलि सु तोरु यियि, सु दियि चंडी चॉन्य बली। तवय ओनुनख चु चाल कँरिथ योर तु येति थोवुनख हाँकलुन गँडिथ। च़े छी अवय दूहय जान पलाव तु अस्ल ख्यन दिवान, युथ चु बली खॉतरु जान जुवस ज्यतस मंज़ रोज़ख। व्वन्य गव, मे छु अख व्वपाय च़े बचावनुक, अगर चु मानख। सरदारस छे अख कूर यस स्वंदरी छु नाव। तमि वुछुख चु तु च़े वुछिथुय लँजिस दिलस थफ। अगर चु तस सुतुय खांदर करख, तेलि म्वकुलख चु।' श्रीदत्तन मॉन्य तसुंज़ कथ तिक्याज़ि सु ओस आज़ाद गछुन यछान। स्वंदरी सुतुय कोर तँम्य गंधर्व आयि खांदर। स्व ओस प्रथ रॉच तस हाँकलु मुच़रान तु सुबहस बेयि गंडान। केंचि कॉल्य रुज़ स्व बँरुच़ तु तँम्यसुंज़ि माजि नन्यव सोरुय। तस गन्यव ज़ामतुर्य सुंद लोल। स्व आयि तस निश तु वोनुनस 'स्वंदरी हुंद मोल श्रीचंड छु स्यठाह कूदी। गोबुराह, तस यी नु चोन आर। म्योन मान, चु चल। मगर युथ नु येति नीरिथ स्वंदरी मँशिथ गछी।' यि वँनिथ मुच़रावि हशि तस हाँकलु तु सु द्राव। नेरवुन वोनुन स्वंदरी जि तँम्यसुंज़ तलवार छे स्वंदरी हुंदिस मॉलिस अथि।

सु वोत बेयि तँथ्य वनस मंज़ मृगनकवती छंडनि यथ मंज़ सु अमि ब्रौह ति ह्यनु ओस आमुत। अमि दूह आव तस रुत शगून बुथि। सु वोत बेयि तँथ्य जायि येत्यथ गुर मूदमुत ओस तु येति तस ज़नानु रॉवमुच़ ओस। अत्यथ वुछ तँम्य पानस कुन अख शिकॉर्य यिवान। श्रीदत्तन प्रुछ तस पनुनि गज़ॉली चेश्म हूरि मुतलक।

शिकॉर्य पृष्ठुस 'चु छुखु श्रीदत्त।' तॅम्य वोनुस व्वश त्राँविथ 'बुय छुस सु बद-  
कुस्मथ। शिकॉर्य वोनुस 'बोज़, मे छुय च़े कैह वनुन। मे वुछ चॉन्य आशेन्य च़े  
वॅन्य दी दी वीलु ज़ॉरी करान। मे द्युत तस तसली तु नियम येमि जंगलु मंज़ु पनुन  
गरु कुन मगर गामस मंज़ ऑस्य वहशी च़ामुत्य। अमि किन्य खूचुस तु स्व  
वातुनॉवुम नागस्थला, युस मथरायि नखु अख गाम छु। तति थॅवुम स्व अँकिस बुडु  
ब्रह्मन विश्वदत्तस निश यज़तु सान। तॅम्य संघव वुठव बूजुम चोन नाव तु तोरय छुस  
पकान। च़े पज़ी वॅल्य वॅल्य नागस्थला तस समखुनि गछुन।

श्रीदत्त वोत स्यठाह तीज़ी सान नागस्थला तु विश्वदत्तुन गरु अँचिथ वोन तॅम्य तस  
'म्यॉन्य आशेन्य दिन मे वापस य्वसु अँक्य शिकॉर्य च़े निश अमानत थॉवमुच़ छय।  
'विश्वदत्तन द्युतुस जवाब 'मे छु मथरायि अख ब्रह्मन दोस, युस स्यठाह रुत,  
रुहॉनी बजर तु मशहूरी थवन वोल छु। सु छु राज़ु शिवरसेनस ग्वर तु वज़ीर।  
चॉन्य ज़नानु छे मे तस निश अमानथ थॉवमुच़ तिव्याज़ि यि छु अख दूर दराज़  
गाम येति तॅम्यसुंद रोजुन जॉयिज़ ओस नु। बु ह्यकुहा नु तस स्व ह्यफाज़थ वॅरिथ  
य्वसु तस शूबिहे। अज़ कर रातस येत्य आराम, पगाह गछ़ शहर।

विश्वदत्तुन्य कथ बूज़िथ रूद सु तति रातस। दोयिमि दूह तति नीरिथ वोत  
मथरा। ज़ेठि सफ़रु सुत्य ओस सु थोकमुत तु सॉरिसुय ओसुस गर्दि पोट  
खोतमुत। अमि किन्य कोर तॅम्य सरस मंज़ श्रान। अँथ्य मंज़ वुछ तॅम्य पॉनिस  
मंज़ अख पलव युस वॅम्य तान्य च़ूरन तति त्रोवमुत ओस। तॅम्य लोम तथ पलवस  
पानस कुन। अथ ओस अँकिस कूनस मंज़ गंड वॅरिथ अख हार। सु ओस बांबरि  
मंज़। हारस नु सँनिथ तुल तॅम्य यि पलव पानस सुत्य तु च़ाव शहरस अंदर। अति  
परज़नोव रॉछदरव यि पलव। अमि मंज़ु कोडुख हार तु श्रीदत्त च़ूर तस्सवुर वॅरिथ  
ओनुख अँकिस बँडिस न्याय करन वॉलिस ब्रॉहकुन। तॅम्य सूज़ सु राज़स निश तु  
राज़न द्युत तस मारनुक होकुम।

### श्रीदत्त तु तॅम्यसुंद पेत्र :

डोल वायान वायान ऑस्य श्रीदत्तस दारस कुन पकनावान। अँथ्य मंज़ पेयि तसुंज़ि  
आशेनि मृगनकवती तस कुन कति ताम दूरि प्यठु नज़र। स्व गँयि तु वोनुन  
वॅज़ीरस, येमि सुंदि गरि स्व रोज़ान ऑस 'म्योन बाँच़ छु दारस खारनु यिवान।' यि  
बूज़िथ द्राव वॅज़ीर तु मारु वातुलन वोनुन ठँहरनु खॉतरु। राज़स कोरुन तस मॉफी  
दिनु खॉतरु दरखास तु अमि पतु ओनुन पनून गरु। येलि श्रीदत्तन तस वॅज़ीरु सुंद

बुथ वुछ, तँम्य परज़ुनोव सु तु प्योस परन। 'चु छुख म्योन पेतुर विगतभय। चु द्राख वारयाह ब्रोंह गरि तु जान तकदीरु मूजुब छुख यथ ओहदस प्यठ।' पेत्रन ति परज़ुनोव सु हॉरान गॅछिथ। नालु मोत कॅरिथ प्रुछुनस सोरुय। श्रीदत्तन वॅनिस सॉरुय दॅलील। येलि तँम्य बाँय सुंदि मरनुक बूज, सु लोग वदनि तु पतु वोननु बाबथुरस 'चु मु गछ ना-व्वमेद। मे छे माँथुरि सुत्य अख यक्षिन्य कोबू कॅरमुच। तँम्य दित्य मे पांछ सास गुर्य तु सथ लछ स्वनु मोहर। सु सोरुय छु च़े क्युत तिव्याज़ि मे छुनु पानस कांह नैचुव।' यि वॅनिथ अँन्य पेत्रन तस मृगनकवती ब्रोंह कुन तु तिमव द्वश्रुय कोर खांदर। सु रुद तति मज़ु सान। तिम बाँच ज़ु आँस्य ज़न तु रातस सफेद पम्पोशन हुंघ पॉट्य फवलान। मगर जलदुय त्रॉव तँम्यसुंदिस लाल रोयस यारन हुंघ अमारन हाम। तिथु पॉट्य आयि तँम्यसुंदिस दिलस छायि वलनु यिथु पॉट्य पुनिम हुंज़ि ज़ूनि दाग छु आसान। अकि दूह वोन तस पेत्रन ल्वति पॉट्य 'गोबुरा, राजस छे अख कूर। तँम्यसुंदि होकमु छे स्व मे अवंती निन्य तु तति तस खांदर करुन। बु छुस यछान येति अमि बहानु कॅडिथ तस च़े सुत्य खांदर करुन। अमि सुत्य प्रावख चु कॉफी बल तु च़े मेली स्व राज़ुसी, येम्युक वरदान लक्ष्मी द्युतमुत छु।'

यि बोज़ु शोच कॅरिथ द्राय श्रीदत्त तु तँम्यसुंद पेतुर स्व राज़ु क्वमॉर ह्यथ। सुती ओसुख कॉफी लाव लशकर। येलि तिम विंध्यावनस मंज़ वॉत्य, बे-खबरी मंज़ सपुद तिमन प्यठ तीरव सुत्य ज़बरदस हमलु तु सोरुय गव छलि छांगरि। श्रीदत्तुन सोरुय ताकत खत्म कॅरिथ तु सॉरिसुय दौलतस प्यठ कबज़ु कॅरिथ कोर तिमव श्रीदत्तस रज़ि सुत्य गंड, तिव्याज़ि सु ओस ज़ख्मव सुत्य बेहेश सपदिथ पथर प्योमुत। तिमव न्युव सु दुर्गा मंदुरस मंज़ बली दिनु खॉतरु, तु गंटायि वॉय वॉय ज़न तु कालस आलव करनि। स्वंदरी पेयि तस कुन नज़र ख्वसु सरदारु संज़ कूर तु श्रीदत्तुन्य अख आशेन्य आँस। स्व आँस अमि विज़ि ओर पनुन नैचुव ह्यथ पूजा करनि आमच। तमि वोन कॅबीलु वाल्यन अँकिस कुन रोज़ुन तु सु न्यून पानस सुत्य। तस ओस मोल मूदमुत तु व्वन्य आँस स्व गामुच सरदार। यिथु पॉट्य रॅट श्रीदत्तन पनुन्य तलवार वापस। पतु कोर तँम्य शूरसेन संज़ि कोरि सुत्य खांदर। अति प्यठु सूज़ तँम्य पनुन्यन हेहरन शूरसेनस तु राज़ु बिंबुकीयस शोछ। तिमन द्वश्रुन्य आसु कोरि टाछि, तव मूजुब दिच़ तिमव तँम्यसुंदिस रिशतस प्रज़नथ। तिम ति आय तस निश। अमि पतु द्राव सु विक्रमशक्तियस सुत्य लडनि येम्य तँम्यसुंद मोल मोरमुत ओस। तँम्य कोर विक्रमशक्ति पनुनिस खश्मुकिस नारस मंज़ सूर्य। व्वन्य आँस तसुंज़ राज़ुसी समंदरस ताम काड कॅडिथ। व्वन्य ओस सु चक्रव्रथ

राजु तु मृगनकवती हुंद दूर्यर चम्याव हमेशि किस मिलिस मंज। राजु, आंकुल छु सोदुर अमे इरादु मेनान, तु पतु कुरबतुच ख्वश-हॉली हमेशि छावान।

संगातुकस निश यि दॅलील बूजिथ योदुवय राजु सहसरानुकस पनुनि मसवलि हुंदि मिलि खॉतरु शोक्र कल गॅनुरावान रुज, अमा पोज रछ खंड आस करार ति तु गुजॉरुन यि राथ। सुबुहस द्राव सु लाव लशकर ह्यथ पनुनि लोलुचि वति तु केंचव दूहव पतु वॉत्य तिम जमदागनी सुंदिस आश्रमस मंज, येति यूत स्कून ओस जि रूस्य कचि ति आसु खिंदु करुनस मंदुछान। तति वुछ राजन जमगादनी, येम्यसुंद दरशुन सॉरी पाप हरनु खॉतरु स्यठाह ओस। तॅम्य कोर राजस स्वागत तु मृगावती वॅरुनस नेचुव ह्यथ हवालु। तिम मील्य तिथय पाठ्य यिथु पॉठ्य आनंद तु तसकीन रलान छि। अख अँकिस वुछिथ प्यव तिमन अँछन अमृथ तु अति लोग ओश बॅनिथ छलकनि। राजन कोर नेचिविस नालु मोत। फिर्य फिर्य ओसुस वुछान तिक्व्याजि ग्वडनिचि लटि ओसुस डेशान। सु ओस नु तस वछु तलु त्रावानुय, तिक्व्याजि अमि खुशी हुंद एहसास ओसुस रुमन रुमन।

कॅह दूह गॅछिथ द्राव राजु सहसरानक पनुन्य रानी मृगावती तु नेचुव उदयन ह्यथ गरु कुन, जमदागनी रेशिस आशीर्वाद मंगनि। अँछन मंज ओश ह्यथ लजि रूस्य कचि तिमन पतु पतु आश्रमकिस बनस ताम पकनि तिक्व्याजि तिमन आँस्य तिम मॅसीबथ याद, यिम मृगावती तुलुन्य पेमुत्य आँस्य। अख अँकिस सुत्य कथ करान वॉत्य तिम क्वसम्बी, येति शॉदियानु करनु यिवान आँस्य। राजु चाव रॉनी तु नेचुव ह्यथ शहरस मंज तु लुकन हुंजु अँछ जन तु तिमन नॅगलुनि लजि, तिक्व्याजि सॉरी आँस्य टॉर्य वाहरॉविथ तिमन वुछान। राजन बनोव उदयन पनुन वली-अहद तिक्व्याजि सु ओस ग्वनुवान। तस बनाँव्य तॅम्य पनुन्यन वॅज्जीरन हुंद्य नेचिव्य वसंतक, रुमन दत्त तु योगेंद्रायन सलाहकार। अमि पतु सपुद आकाशि पोशि वरुनु तु अख आवाज आयि 'यिमन सलाहकारन हुंदि मशवरु सुत्य प्रावि शहजादु बुतरॉच हुंद राज। अमि पतु त्रोव राजन राजुसी हुंद सोरुय बार उदयनस तु पानु लोग मृगावती व्यूर तुलिथ लुत्फ तुलनि। अरज्जी लुत्फ तुलान सोर्याव यि लुत्फ तु कनस प्यठ सफेद मस वुछिथ चोल यि खश्मु होत, तु राजु शहसरांकन ठाकरॉव ख्वशहॉली लुकन खॉतरु, तु पनुन्य आशेनुय तु वॅज्जीर ह्यथ द्राव हिमालयस कुन, युथ पनुनि पॅत्यमि सफरु खॉतरु कांह तैयॉरी करि।

उद्दयन लोग वत्स सलतनें च प्यठ क्वसम्बी मंज जान पॉट्य हकूमत करनि ख्वसु तँम्य सुंद मॉल्य तसुंदि खॉतरु पथ कुन त्रॉवमुच ऑस। मगर केह काल गँछिथ लोग सु हनि हनि राजुंसी हुंदि इन्तिजामुक बार पनुन्यन वँजीरन तु खास वँरिथ योगेंद्रायस प्यठ त्रावनि। पानु गव सु ऑशन मोत। तस ओस शिकारुक शोक तु रातस दूहस ओस सु साज वायान युस तस वासकी सुंद ज़िदय बाँय द्युतमुत ओस। तँम्यसुंद साज बूजिथ ऑस्य मदु हँस्य राम सपदान तु कोबू वँरिथ ओस सु तिमन गरु अनान।

राजु वत्स ओस सु मस चवान यथ पदमान नाजुलन हुंद गुल रोय अक्स बँनिथ पॉरान ऑस्य, तु यि डीशिथ ओस तँम्यसुंदन वँजीरन रोयस रंग बदलान। राजस ऑस फकथ अख फिक्र। सु ओस सॉचान स्व क्वसु ज़नानु छि ख्वसु ज़ॉती वस्फव किन्य म्यॉन्य आशेन्य बँनिथ हेकि। दपान अख कूर छे वासूदत्ता, ख्वसु मे लायक छे। मगर स्व किथु वँन्य बनावन बु पनुन्य।

चंड महासीन ति ओस उजैनी मंज सॉचान। उद्दयनस रोस छुनु सॉरिसुय ज़गतस मंज म्यानि कोरि वासूदत्तायि लायक दोयुम कांह। मगर सु छु म्योन शेत्र। बु किथु पॉट्य बनावन सु पनुन ज़ामतुर तु ताबेदार मददगार ? यि करनु खॉतरु छे फकथ अख तरकीब। सु छु कुनुय ज़ोन वनन मंज हँस्य शिकार करनि फेरान, तिव्याजि तस छु शिकार करनुक ऑब। बु तुलु तँम्यसुंजि अमि कमजूरी हुंद फॉयदु तु कुनि वालु वाशि लॉगिथ अनन योर। सु छु संगीत ज़ानान, तु म्यॉन्य कूर बनि तँम्यसुंज च़ाठ, युथ उद्दयनुनि अँछ तस प्यठ मूहिथ सपदन। यिथु वँन्य बनि सु यकीनन म्योन ज़ामतुर तु मददगार। दोयिम कांह वथ छेनु, सु म्यानि मरज़ी हुंद ग्वलाम बनावनु खॉतरु।

यि सूचिथ गव सु दुर्गा मंदरस मंज, पनुनि कामियाँबी खॉतरु पूजा करनि। तति मोंग तँम्य दीवीयि पनुन मुराद। तस गँयि कनन आवाज़। 'राजु, चॉन्य यि खॉहिश सपदि कमय कॉल्य पूर।' सु आव तसली सान वापस तु पनुनिस वँजीर बुध-दत्तस सुत्य लोग अथ मामुलस प्यठ यि वँनिथ बोजु शोज़ करुनि 'उद्दयनस छे ख्वद-दॉरी। लालुच ति छुस नु कांह। सॉरी लुख छिस लोल बरान। सु छु कॉफी बलवान तु अमि मूजुब गछि नु सु तिमव च़ोरव व्पपायव मंजु कुनि सुत्य ति कोबू, यिमव मंजु कथ-बाथ ग्वडन्युक छु। मगर असि पज़ि ग्वडु कथ बाथुय अज़मावुन्य।' यि फॉसलु वँरिथ वोन राजन अँकिस कॉसिदस 'चु गछ, तु वत्स राजस वन म्यानि

तरफु जि म्याँन्य कूर छे तस निश संगीत हेछुन यछान। अगर तस यि मंजूर आसि,  
तेलि पजि तस योर यिथ स्व हेछिनावन्य।’

काँसिद द्राव राजु चंड महासेनुन पाँगाम ह्यथ तु वोत राजु वत्सस निश क्वसम्बी।  
राजु संज शोछ वँनिनस बिलकुल तमे आयि येमि आयि तँम्य वँन्यमुच आँसुस।  
काँसिदस निश यि गॉर शॉयिस्तु पाँगाम बूजिथ प्रुछ राजु वत्सन पनुनिस वँजीर  
योगेंद्रायस ‘राजन क्याजि सूज मे यि हतक आमेज पाँगाम? तस वँमीनस कुस  
गरज छु चकि पूर करुन।’

राजु सुंद सवाल बूजिथ वोन तँम्यसंघ चुक्यदर तु बदिमान वँजीर योगेंद्रायन ‘राजु,  
चान्यन आँबन हुंज शोहरत छे बुतराँच प्यठ छोह मारान, तु यि छु अमे आँबु  
कुल्युक फल। राजु चंड महासेन छु ज्ञानान जि च छुख पनुन्यन जजबातन हुंद  
ग्वलाम तु हसीन कोरि हुंदिस जालस लॉगिथ छुय सु चै काँद वँरिथ पनुन  
काठपोतुल बनावुन यछान। अव मूजुब पजुनय चै पनुन्य आँब त्रावन्य। तिक्याजि  
आँबदार छु दुशमनु संजि वालु वाशि तिथय पाँट्य लगान यिथु पाँट्य हँस्य खडन  
मंज फसान छि।’

पनुनिस आँकुल वँजीर संज यि कथ बूजिथ सूज राजु वत्सन पनुन काँसिद  
चंड महासेनस यि जवाब ह्यथ ‘अगर चानि कोरि मे निश संगीत हेछिनुक शोक छु,  
तेलि सोजुन स्व यूर्य।’ अमि पतु वोन तँम्य पनुनिस वँजीरस ‘छुना सलाह जि बु  
अनन चंड महासेन हाँकलु गँडिथ यूर्य?’ यि बूजिथ वोन बँड्य वँजीरन ‘ति शूबि  
नु, तु नु ह्यकख चु वँरिथ। चंड महासेन छु काँफी बलवान तु चु ह्यकुहन नु सु  
हारनाँविथ। अम्युक सबूथ छे स्व दँलील य्वसु बु चु बोजुनावथ।

### **राजु चंड महासेनुन्य दासतान :**

यथ बुतराँच प्यठ छु अख शहर यथ उजैनी नाव छु। अथ वनव बुतराँच हुंद र्वंग।  
अतिचि मंदोर छे अमरावती हुंजन सफेद मंदोरन जम करान। अँथ्य उजैनी मंज छु  
जिंदुगी हुंद हरतर शिव, महाकाल रूपस मंज रोजान, येलि ति ज़ांह सु कैलासु  
प्यठ ओरु योर नेरान छु। अँथ्य शहरस मंज ओस राजु महेंद्र वर्मन हकूमत करान।  
युस राजन मंज रुत ओस, तु तस ओस अक नेचुव यस जैसेन नाव ओस।  
अँमिस ति ज़ाव नेचुव यस महासेन नाव रूद, तु यि ओस त्यूत बलवान, जन तु

राज़न मंज़ मद्दु होस ओस। अकि दूह आव तस खयाल 'नु छे मे शूबिदार तलवार  
तु नु शूबिदार रँन्य।

यि सूंचिथ गव दुर्गा मंदुरस मंज़ तु केह ख्यनु रोस्तुय लोग दुर्गायि हुंज़ व्पासना  
करनि। अमि पतु लोग तँम्य हवन करुन, तु अँथ्य हवनस मंज़ लोगुन पनुन माज़  
हुमुन। दुर्गा सपुज़ ख्वश तु प्रुछुनस 'बु सपुज़स च़े प्यठ प्रसन्न। रठ यि बे-मिसाल  
शमशेर, अमिकि बलु रोज़ख च़ु सारिनुय शैत्रन मंज़ अजय। चॉन्य रँन्य बनि  
अंगारवती य्वसु असुर अंगारकु संज़ कूर छे, तु य्वसु त्रन बवुनन मंज़ सारिवुय  
खोतु स्वंदर तु शूबिदार छे। च़े कोरुथ कट्यन तप तु येति योर रोज़ी च़े  
चंड महासेन नाव।

यि वँनिथ तु तलवार दिथ सपुज़ दीवी अंतरध्यान तु राज़स गव रुम रुम ख्वश।  
व्वन्य ऑस्य तस ज़ु रतन। अख तलवार तु बेयि नडागरी नावुक होस यिहुंज़  
अहमियत तस खॉतरु स्वय ऑस य्वसु यँद्राज़स खॉतरु वजरस तु एरावतस छे।  
यिमन दूक्षुन्य प्यठ लोग राज़ु नाज़ करनि। अँथ्य मंज़ द्राव सु अकि दूह वनस कुन  
शिकारस। अति वुछ अँम्य अख बोड बारु वहशी सोर युस त्यूत हॉबतनाक  
ओस, ज़न तु रॉच़ हुंघ गटुकारन ओस दूहली आकार लोबमुत। राज़ु संघव तीरव  
कोर नु तस अलगुज़ार ति। तँम्य फुटुर राज़ु सुंद रथ तु वोथ अँकिस नारस मंज़।  
इन्तिकामु कि जज़बु लार्याव राज़ु तस फकथ तीर कमान ह्यथ पतय। राज़ु गव  
नारस मंज़ वसान। अँकिस जायि गव अख शूबिदार शहर वुछिथ हॉरान। अति  
वुछुन अख सर तु ब्यूठ थख कडनि अमिकिस बँठिस प्यठ। अति वुछ अँम्य अख  
स्वंदरमाल पनुन्यन अख हथ व्यसन सुत्य सरस बँट्य बँट्य फेरान। स्व ऑस  
तिमन मंज़ तिथय पॉट्य शूबान यिथु पॉट्य लोलु तीर सब्र तु परहेज़ु क्यन सारिनुय  
ठर्यन ज़ँघ कँरिथ थवान छि। स्व आयि ल्वति तस कुन तु लँज नज़रन हुंदि लोलु-  
अमृतु तस नावनि। तमि प्रुछुस 'तोह्य कम छिवु तु सोन गरु किथु कँन्य ऑवु?'  
राज़न वँनिस सॉरुय दलील, य्वसु बूज़िथ स्व हरनु चेश्मव ओश त्रावुनि लँज। दिल  
गोस बे-कोबू। राज़न प्रुछुस 'च़ु क्वसु छख तु म्यॉन्य कथ बूज़िथ क्याज़ि लँजिख  
च़ु वदनि?' स्व ऑस लोलु ज़ालु लँजमुच़ तु तवय वोनुनस 'सु सोर छु च़कि अख  
असुर यस अंगारकाना नाव छु। बु छस तँम्य संज़ कूर अंगरावती। तस छु बाडवु  
बोड शरीर। यिमु हथ ज़नि च़ु मे सुत्य वुछान छिहख, यिमु छे च़कि शहज़ॉज़ु यिम  
तँम्य पनुन्यव राज़ु मंदोरव मंज़ु कँडिथ म्यानि च्वंज़ु बनावि। यि महान असुर छु  
अकि शापु किन्य राक्षुस बन्योमुत। अज़ छु सु थकनु किन्य छेनिथ प्योमुत, तवय



छुख च्च वुनि जिंदु। वुन्यक्यस छु सु पनुनि असली शक्ति मंज आराम करान मगर  
येलि सु नैद्री व्वथि, सु वातुनावी च्चे ज़र्यर। मे छेनु तस निशि रुचरुच कांह आश,  
तवय छस ओश हारान। च्चकि छे म्यानि लोलुच तरावथ गमुकि नारु दिलस मंज  
ग्रेकिथ, अँछव ओश बँनिथ नेरान।

अंग्रावती हुंज कथ बूजिथ वोन राजन तस, 'अगर च्चे म्योन पोज लोल छुय, तेलि  
कर च्च म्यॉन्य अख कॉम। येलि चोन मोल हुशार गछि, च्चु लाग तस ब्रॉह कनि  
वदुन। सु प्रुछी अम्युक कारन। च्चु वनुस, 'अगर च्चे कांह मारी, मे क्या बनि? अवय  
छस वदान।' अगर च्चु यि करख, तेलि सपदन नु सान्यन आशन हाशि।'

तमि कोर राजस सुत्य यि करनुक वादु। बद-कुस्मती हुंद एहसास कँरिथ थोव  
तमि राजु खँटिथ, तु पानु गँयि मॉलिस निश। असुर गव हुशार तु स्व लँज ब्रछुनि।  
तँम्य प्रुछुस, 'कूरी, च्चु क्याजि यूत ओश हारान?' तमि लोग गमगीन आसनुक  
सख सांग तु वोनुनस, 'सॉचान छस, अगर बखॉलन च्चु काँसि मोरुख, मे क्या बनि  
पतु?' अंगारुकन त्रोव असन खंगालाह तु वोनुनस, 'मे कुस मारि? म्योन सोरुय  
बदन छु अमर। कुनि ति जायि पोयम नु कांह हँथियार। फकथ छे म्यॉनिस  
खोवरिस अथस मंज अख जाय, यथ मंज म्योन जुव छु। मगर अथ जायि छि  
कमान बुथि आसान।'

यिथु कँन्य द्युत तँम्य कोरि तसलाह। राजु ओस गुपिथ अँकिस जायि यि बोजान।  
अमि पतु वोथ सु दानव, श्रान कोरुन तु लोग शिवु संज त्वता करनि। अमे विजि  
गव राजु तस ब्रॉह कुन तु वोनुनस लडनु खॉतरु। अंगारका ओस पाठ करान तु  
अथ मंज ऑस नु कथ करुन्य जाँयिज। तँम्य तुल पनुन खोवुर अथ थोद, युस  
येमि कथि हुंद इशारु ओस जि तस पजि प्रारुन। राजु ओस यी काँछान। तँम्य लोय  
अमे विजि तस अँथ्य अथस तीर। तस लोग जुव नेरनि तु पथर प्यथ वोनुन, 'येम्य  
बु त्रेशि होत मोरुस, अगर सु म्यान्यन पेत्रन प्रेथ वँरीयि तरपन करि नु, तेलि गछन  
तँम्यसुंद्य पाँछ वँज़ीर फान।' सु मूद तु राजन तुज अंग्रावती पानस सुत्य तु द्राव  
उजैनी कुन। तति कोर तँम्य अँमिस असुर कोरि सुत्य खांदर। तस जायि जु  
नेचिव्य यिमन गौ पालक तु पालक नाव ओस। चंडु महासेनन कोर अथ ख्वशी मंज  
यँद्राजस साल। यँद्राजन द्युत तस अख कूर ज्यनुक वरदान। कैह समय  
सपदिथ जायि तस अख कूर, य्वसु जूनि खोतु शूबिदार तु प्रजलवन्य ऑस।  
तँम्यसुंदि थनु प्यनु विजि गँयि आकाश वॉनी 'अँमिस कोरि ज़ेवि अख बालुक, युस

कामु दीवुन औतार आसि, तु सु बनि विद्याधरन हुंद राज़।' कोरि थोवुख वासूदत्ता नाव तिक्याज़ि स्व आँस यँद्राज़ुन द्युत।

स्वय कूर वासूदत्ता छे वुनि पनुनिस महलु खानस मंज़ तिथय पॉट्य अनहँरिश यिथु पॉट्य सोदुर मंदनु ब्रॉह लक्ष्मी आँस। च़ु ह्यकख नु राज़ चंड महासेनस शिकस दिथ तिक्याज़ि अवलय छु सु बलवान, दोयिम छु तँम्यसुंदिस मुल्कस ताम वातुन मुश्किल। त्रेयुम यि जि सु छु वासूदत्तायि च़े सुत्य खांदर करुन यछान। मगर किबरी आसनु मूजुब छुस किमाम तु यछान छु पनुन्य टेंठ रँछिथ थवुन्य। मगर राज़, मे छु बासान च़े पज़ी वासूदत्तायि सुत्य खांदर करुन।

येलि राज़न यि बूज़, सु लोग दिलु मँज़ी वासूदत्तायि वँन्य दिनि।

अँथ्य दोरान वोत राज़ वत्सु सुंद काँसिद चंड महासेनस निश दरबारस मंज़ तु द्युतुनस पनुनिस राज़ सुंद पाँगाम। यि बूज़िथ लोग चंड महासेन सोँचुनि 'अथ मंज़ छुनु कांह शख जि सु अभिमॉनी राज़ यियि नु योर। बु ति सोज़न नु पनुन्य कूर तस निश तिक्याज़ि, स्व गँयि बेज़ुती। व्वन्य छे अकाँय वथ। मे पज़ि सु कुनि छलु काँद कँरिथ यूर्य अनुन।' यि सूँचिथ तु पनुनिस वँज़ीरस सुत्य मशवरु कँरिथ करनोव तँम्य अख बोड बारु नकली होस तैयार तु अथ मंज़ कँह जंगजू बँरिथ थावनोवुन यि विद्यावनस मंज़। अति वुछ यि राज़ वत्सुन्यव नफरव दूरि प्यठु। तिम गँयि वँल्य वँल्य राज़स निश तु वोनुहस, 'राज़, असि वुछ अख होस विद्यावनस मंज़ फेरान। सु छु यथ बुतरॉच प्यठ बे-मिसाल। आकाशस सुत्य छस थर लगान, ज़न तु विद्या कोहन हुंद सिलसिलु ओरु योर नचान छु।' राज़ गव यि बूज़िथ ख्वश। तिमन दिचन लछ मोहरु यनामु। सु लोग तथ रातस सोँचुनि 'अगर बु यि होस रटन, यि करि नडागिरीयस मुकाबलु तु अदु ह्यकन बु चंडमहासेन होरुनॉविथ। पतु दियि सु पनुन्य कूर वासूदत्ता मे पनुनि मरज़ी सुत्य।' सुबहय द्राव सु विद्यावनस कुन। होस रटनुच आँसुस तीच बांबुर जि वँज़ीरन हुंद सलाह ति कोरुन नज़र अंदाज़। तँम्य थोव नु जोतश्यन हुंदिस वनुनस कुन ति खयाल यिमव वोन जि तमि विज़ि आँस्य तिम ग्रुहदु यिहुंद फल यि ओस जि राज़ सपदि काँद तु पतु सपद्यस अख ज़ुवल माल ति हाँसिल।

वनस मंज़ वाँतिथ रुकाँव्य तँम्य पनुन्य सिपाह अँकिस जायि तिक्याज़ि सु ओस नु यछान हँसिस खबरदार करुन। पानु द्राव फकथ वतु हावुक ह्यथ। अथस मंज़

ओसुस सिर्फ सु साज़। जनूबी वुतरायि प्यठ वुछ राजन सु होस तु यि बास्योस स्यठाह शूबिदार। सु गव ल्वति ल्वति तस नख कुनुय ज़ोन साज़ वायान। तस ओस फकथ पनुनि लयि कुन खयाल। शामु छा़यन मांज़ तोग नु तस हँस्य सुंद नकली आसुन च़ितरुन। होस ति रूद साज़ बूज़िथ पनुन्य कन मुच़रावान तु वटान, ज़न तु ख्वश ओस। होस रूद ब्रॉह कुन पकान तु राज़ वोत वारयाह दूर। अँकिस जायि द्रायि हसि मंज़ु कैह जंगजू तु तिमव कोर तस गेरु। सु लोग पनुनि शिकॉर्य छुरि सुत्य तिमन सुत्य लडुनि मगर ब्रॉह कनि क्यन सुत्य लडान लडान कोर सु पतु कनि क्यव कोबू। तिमव वातुनोव सु चंडमहासेनस निश। चंडमहासेन द्राव तस बुधि स्वागत करनि तु दूश्वय चायि उजैनी मंज़। उजैनी हुंद लँग्य उदयनस ज़ूनि हुंद पाँठय वुछनि य्वसु अँछन वुछिन्य ख्वश छि करान, य्वदुवय अँमिस बेज़ती हुंद दाग ति आसान छु। वारयाहन गव शख ज़ि सु यियि मारनु तु तमि किन्य त्रॉव तिमव वतन प्यठ शंग, युस तिहुंद धरनु ओस। चंडमहासेन वोन तिमन ज़ि तस छुनु उदयनस ज़र्यर वातुनावनुक कांह खयाल, बँल्यकि छु सु तस पनुन बनावुन यछान। लुकन ब्रॉह कनि तँथ्य जायि कँर तँम्य तस पनुन्य कूर वासूदत्ता संगीत हेछिनावनु खॉतरु सुपुर्द तु वोनुनस, 'राज़, यि हेछिनावुन संगीत, अथ मेली च़े रुत फल। ना-व्वमेद मु गछ।' स्व स्वंदरमाल वुछिथुय गव राज़ वत्सस दिल शाद तु सोरुय गम ग्वसु गोस दूर। प्रेम सरस पँगलिस लोलुक्य पम्पोश। वासूदत्तायि हुंद दिल तु ज़ेहन ति ओस व्यूर तुलान योदुवय चेश्मु तस हया किन्य ब्वन आसु। अमि पतु रूद सु तस संगीत हेछिनावान मगर अँछ आसस ज़न तु तस प्यठ लँगिथ गछान। तस ओस साज़ अथन मंज़, राग हँटिस मंज़ तु लोलुच शादमाँनी दिलस मंज़। वासूदत्ता ति आँस तनु मनु तस वंदनु आमुच़। योदुवय सु तँम्यसुंद कूद्य ओस मगर स्व आँस लक्ष्मी बँनिथ तस पादि सीवा करान।

अँथ्य दोरान वॉत्य राज़ सुंद्य साँथी तु सिपाह क्वसम्बी वापस तु येलि तति राज़ सुंदि काँद सपदनुच खबर लुकव बूज़, तिम सपुद्य जोशु सुत्य पागल तु राज़ सुंदि लोलु आँस्य उजैनी प्यठ हमलु करुन यछान। मगर लुकन हुंद जोश कोर हुमनवतन कोबू तु तँम्य वोन तिमन ज़ि चंड महासेन हेकि नु बलु सुत्य कोबू करनु यिथ तु हमलु ओस नु अमि मूजुब ति जान तिक्क्याज़ि अमि सुत्य हेकिहे राज़ सुंजि ज़िंदुगीयि ज़र्यर वॉतिथ। तिमन पज़ि अक्लि सुत्य पनुन मकसद प्रावुन। खामोश मिज़ाज तु मुसम्मम इरादु वॉल्य योगेंद्रायन येलि यि च्यून ज़ि लुख आँस्य राज़स वफादार, तँम्य वोन तिमन, 'तोह्य साँरी रूज़िव येती स्यठाह हुशॉरी सान। सरहदन हुंज़ कँरिव रॉछ। येलि मुनाँसिब मोकु वाति, तमि विज़ि पज़ि त्वहि पनुन

जोश हावुन। व्वन्य गव बु नेरु वसंतक ह्यथ तु करु कुनि तदबीरु राजु म्वकुलावनुच कूशिश तु सु अनन योर। याद थॉविव, सुय इनसान छु प्वख्तु, येम्य संज अक्ल मुसीबतस मंज ज़ोतान रोज़ि, यिथु पॉट्य वुज़मलु कालु ओबुरस तु अछ्यन रुदस मंज ज़्यादु चमकान छे। बु ज़ानु तिम माँथरु यिमव किन्य बु देवारव मँज्य पकु, हाँकलु चटु तु वक्ते ज़रुरत यिमु नु काँसि बोज़नु ति।

यि वँनिथ कोर योगेंद्रायन राज़सी हुंद इन्तिज़ाम रुमनवतस हवालु तु पानु द्राव वसंतक ह्यथ उजैनी कुन। पकान पकान वॉत्य तिम विंद्यावनस मंज युस तिहुंजि अक्लि हुंद पॉट्य जिंदगी सुत्य बँरिथ ओस। अति गव सु पुलिंदु किस राज़स निश युस राज़ वत्सुन मददगार ओस। तँम्य द्युत तस पनुन फोज। ओरु यिथ गव सु महाकाल मंदरुकिस शमशानस प्यठ येति वारयाह व्यताल रोज़ान ऑस्य। रॉच खोतु ज़्यादु कृहन्य, आवरेन्यन हुंद दुह चेनु वॉल्य यिम व्यताल ऑस्य ओरु योर फेरान। अति समुख अँमिस अख ब्रह्म राक्षुस, यस योगेश्वर नाव ओस। यिम बनेयि दोस तु अमि लिहाज़ु हेछिनोव तँम्य योगेंद्रायन शक्ल बदलावनुच माँथरु। तँम्य बदलॉव पनुन्य शक्ल, सु बन्याव होल कोल तु कोब बुडु तु पागलु सुंद्य पॉट्य असन वोल। अमे माँथरि सुत्य बदलॉव तँम्य वसंतकस ति शक्ल। सु बनोव तँम्य बदसूरथ। यड न्यबर, दंदानु तु बुथ बद-शक्ल। अमि पतु सूज तँम्य सु राज़ दरबारुकिस दरवाज़स कुन। पानु चाव उजैनी मंज, तति लोग ग्यवुनि तु नचुनि। ब्रह्मन शुर्य लँग्य तस पतु पतु ग्यवुनि तु साँरी ऑस्य तस ताँजबु सान वुछान। राज़ु संजव रॉनियव ति वुछ सु, तु ऑखुर बूज वासूदत्तायि तस मुतलक। तमि सूज तस अख च्वंज तु अनुनोवुन तँथ्य कमरस मंज येति स्व संगीत हेछान ऑस, तिव्याज़ि, यावुन तु लुत्फ छु दुकि ज़ामुत्य। योगेंद्रायन येति अति पनुन राज़ु हाँकलु कँरिथ वुछ, तस वोथ ठँचि ओश। तँम्य कोर राज़स कुन इशारु युथ तँम्य सु परज़नोव। पनुनि यूग शक्ती किन्य बनोव योगेंद्रायन वासूदत्तायि हुंदि खॉतरु पनुन पान अद्रींट्य। व्वन्य ओस राज़य योत तस वुछान। बाकयव वोन, खबर यि मसखरु कोत च़ोल ? यि बूजिथ तोर राज़स सोरुय फिकरी। तँम्य वोन वासूदत्तायि 'चु गछ तु अन सरस्वती पूजायि खॉतरु सामानु।' स्व द्रायि। योगेंद्रायन गव तस नखु तु वँन्यनस हाँकलु फुटरावनुच माँथरु, तु वासूदत्तायि हुंद लोल ज़ेनुनुक विर्द ति। तँम्य वोन तस जि वसंतक ओस नेबरु कनि खाम मँरिथ तु तस पज़ि सु अंदर अनुनावुन। बेयि वोननस, 'येति वासूदत्तायि च़े प्यठ पछ बडि, पतु कँर्यजि ती यि बु वनय। मगर फिलहाल गँयि छ्वपु करुन्य।' यि वँनिथ द्राव योगेंद्रायन न्यबर। वासूदत्ता आयि पूजायि हुंद सामानु ह्यथ तु राज़न वोनस, 'दरवाज़स प्यठ छु अख

ब्रह्मन। सु अनुन सरस्वती हुंज पूजा करनि।' मगर राज बरकरार थवनु खॉतरु वोन तस राजन, 'ब्रह्मन, बु बदलावु चॉन्य बद-शक्ल ख्वसु च़े ब्यमारि किन्य गॉमुच छय। मु वद, व्वलु मे निश बेह।' यि बूज़िथ वोन वसंतकन, 'राज़, यि छे चॉन्य बड इनायत।' राज़ ओस गमगीन तिक्क्याज़ि तँम्य ओस य च्यूनमुत जि वसंतक क्य़ाज़ि ओस क्व-वरु शक्लि बन्योमुत। वसंतकस ति तोग बोज़ुन जि राज़ क्य़ाज़ि ओस दिल मलूल। अवु मूजुब लोग तँम्य असुन। असनु सुत्य गव तस बुथ वारय क्व-वरु तु यि वुछिथ त्रोव वासूदत्तायि ठाह ठाह करान असुन। पतु प्रुछ तमि वसंतकस, 'ब्रह्मन, च़ु कुस अँलिम छुख ज़ानान?' तँम्य वोनस, 'राज़ क्वमॉर्य, बु छुस दँलीलु वनुनस मंज़ ताक।' तमि वोनस, 'मे बोज़ुनाव कांह दँलील।' स्व ख्वश करनु खॉतरु वँन्य वसंतकन यि दिलचस्प मज़ाहियाह दँलील।

### रूपिनिकायि हुंज दास्तान :

यथ मुल्कस मंज़ छु अख शहर, यथ मथरा नाव छु। यि छि भगवान कृशुनु सुंज ज्यनु जाय। अति ऑस अख गतुरेन्य रोज़ान, यस रूपिनिका नाव ओस। स्व ऑस अँकिस बुजि कुटनि पनुन्य मॉज मानान यस मकरदंशटर नाव ओस। यि ऑस तिमन सारिनय जवानन ज़हर पूर्य बासान यिमन रूपंकायि हुंज कँशिश ऑस। अकि द्वह द्रायि रूपंका मंदुरस मंज़ पनुन फरुज़ पूर करनु खॉतरु। दूरे वुछुन अख नवजवान। सु वुछिथ लँज तस वॉजि थफ तु माजि हुंघ सॉरी ह्यदायथ गँयस मँशिथ। तमि वोन पनुनि नोकरानि, 'गछ, अँमिस जवानस वन अज़ म्योन गरु युन।' नोकरॉन्य गँयि तु वोनुन तस। तँम्य सूच रछाह तु वोनुनस, 'बु छुस ब्रह्मन, नाव छुम लोह जंघ। मे छनु दौलथ, अवु किन्य छनु रूपंकायि हुंदिस गरस मंज़ म्यॉन्य कांह ज़रूरत, तिक्क्याज़ि तँम्य सुंद बर छु फकथ द्यारु वाल्यन खॉतरु यलु।' नोकरानि वोनस, 'म्यानि मॉल्यकेनि छि नु च़े निश द्यार बकार।' यि बूज़िथ मोन लोह जंघन रूपंकायि हुंद गरु युन। स्व गँयि यि बूज़िथ ख्वश तु गरि लँजिस अँछ बरस कुन दरु, यपॉर्य तसुंद टोठ यिनु वोल ओस। सु आव तु येलि मकर दनिशटरस तस प्यठ नज़र पेयि, स्व गँयि हॉरान। रूपिनिकायि कोर तस वुछिथुय बुथि नीरिथ नालुमोत तु गरदनि नर्यन हुंद आरु कँरिथ च़ोनुन पनुनिस खास कुठिस मंज़। स्व गँयि लोह जंघ सुंजँन ह्वनुरन तु ग्वनन प्यठ फिदा, तु लँज दौयिम्यन मर्दन निश दूर रोज़ुनि, तु सु रूद मज़ु सान तँम्य सुंदि गरि।

रूपंकायि हुंज मॉज मकर दनिशटर, येमि वारयाहन कोर्यन नचनुच तु ग्यवनुच तरबियथ दिचमुच ऑस, गँयि यि वुछिथ नाराज़। तमि वोन तस, 'कूरी, च़ु क्य़ाज़ि

अँमिस शिकसलदस वंदनु यिवान। जान ज़ोकु चि गतुरेनि छे गँरीबस खोतु म्वरुदस नालुमोत करुन बेहतर ज्ञानान। च़े हिशि गतुरेनि कुस नार छु लोलस द्युन ? बोड असूल कवु मँशरोवुथ च़े ज़ि गतुरेनि तु लोलस छुनु कांह वाठ। नबु नार छुनु पोशिवुन तु अमिकी पॉदय छु तस गतुरेनि हुंद हशमत ति जल्द खत्म सपदान खसु लोलस मॉल बरान छे। अँकिस गतुरेनि पज़ि अँकिस सांगल ज़नानि हुंद्य पॉदय प्रथ काँसि मर्दस ब्रॉह कनि लोलुक पॉथुर करुन, मगर लोलु निशि दूर रूज़िथ फकथ द्यारन मॉल बरुन। यि शिकसलद मँशरावुन तु पनुन पान मु कर बरबाद।’ येलि रूपंकायि माजि हुंज़ु कथु बोज़ु, तस खोत शरारत तु वोनुनस, ‘यिम कथु मु कर। बु छस पनुनि पानु खोतु तस ज़्यादु मोहबत करान। मे छि काँफी द्यार। ज़्यादु दौलच़ क्याह छु मे करुन ? च़े पज़ी नु येति योर अथ मामुलस प्यठ मे सुत्य कथ करुन्य। यि बूज़िथ दँज़ मकर दनिश्टर अँदरी तु लँज पानस सुत्य लोह जंघुन न्याय म्वकुलावनु खॉतरु कांह वथ छांडनि। तमि वुछ ओरु अख राजपूत यिवान। यस सौरुय दौलथ म्वकुलेमुच़ ऑस तु यस कैह नफर तलवारु अथन मंज़ ह्यथ सुत्य ऑस्य। स्व गँयि अँमिस निश तु वोनुनस, ‘मे छु गरि अख मुफलिस आशक ठॉन्य लॉगिथ। सोन यिथ कर च़ु तस खतेरु, युथ सु दफा गछि तु म्यॉन्य कूर रोज़ी च़े पेशकश।’ राजपूतन मोन तु च़ाव तँम्य सुंद गरु। अमि विज़ि ऑस रूपंका मंदरस तु लोह जंघ ति ओस कोताम द्रामुत। येलि कमुय काँल्य सु वापस आव, राजपूत सुंद्य साँथी आयि तस कुन दोरान तु कोरुहस शलख, तु त्रौवुख अँकिस मँकरिस ह्यनुरस मंज़, येमि मंज़ु सु मुश्किलन वापस खोत। रूपंका आयि वापस तु येलि तमि सौरुय बूज़, स्व गँयि सख गमगीन। यि वुछिथ द्राव राजपूत वापस।

कुटनि दँस्य, यि दुर्दशा सपदिथ द्राव लोह जंघ तीर्थ यात्रायि, युथ तति पनुन शरीर त्रावि तिक्याज़ि व्वन्य ओस सु पनुनि मसवलि निश दूर। सु ओस वॉरानु मँज़्य पकान तु दिल ओसुस कुटनि हुंदिस वरतावस प्यठ दज़ान, तु च़म दज़ान तापु सुत्य। सु ओस कुनि कुल्य शेहजारस तल बिहुन यछान मगर अथ वॉरानस मंज़ ओस नु कुनि ति कांह कुल। तँम्य वुछ अख म्वर्दु होस, युस थँर तरफ़ु अँदरु सौरुय शालव ख्योमुत ओस। यि ओस अँदरु बिलकुल ख्वखुर फकथ ऑसुस ख्वपुर खडा। लोह जंघ ओस गर्मु सुत्य ज़्यादय थोकमुत। सु च़ाव अँमिसुय ख्वखुरिस हँस्तिस मंज़। अथ ओस ज़द्यव मँज़्य ठंडु हवा अच़ान। तस पेयि नँदर। अँथ्य मंज़ खोत ओबुर तु वुछान वुछानुय लाजन रूदु श्रानि। अमि रूदु सुत्य लँज हँस्य बस्तु च़मनि तु अथ रूद नु खास कांह ज़ोद यलु। अँथ्य मंज़ आयि अख बँड पां लहर तु अमि वोल हँस्य मुस्तु पानस सुत्य गंगायि मंज़। अति प्यठु वोत यि

सँदुरस मंज। अति आव गरुडस ह्यू अख जानवर। तस बास्योव मुस्तु म्वरदु होस,  
तु न्यून बेयिस तरफस कुन तुलिथ। तति चँट तँम्य पनुन्यव पंजव सुत्य यि चम तु  
अति इनसान वुछिथ चोल फ्रठ गँछिथ। व्वन्य ओस लोह जंघ दगि तु ज़ल लगनु  
सुत्य हुशार गोमुत। सु द्राव तमि ज़दि मँज्य न्यबर युस जानवरन पनुनि तौंति सुत्य  
ख्वपरिस कोरमुत ओस। पनुन पान सोदरु अपारि वुछिथ गव सु हॉरान। अमे विज़ि  
वुछ तँम्य ज़ राक्षस यिम तस वुछिथ खौफज़दु गौमुत्य ऑस्य। तिमन ओस याद  
ज़ि भगवान रामन किथु कँन्य ओस राक्षसन शिकस द्युतमुत। येलि तिमव यि वुछ  
ज़ि यि इनसान ति ओस समंदरस तोरमुत, तिमन ओस ज़्यादय फ्रठ गोमुत। तिमव  
कोर अख अँकिस सुत्य सलाह। तिमव मंजु गव अख तु वँनिन यि सौरुय दँलील  
विबीशनस। सु ति गव परेशान तु तँम्य वोन राक्षसस, 'चु गछ। तस मनुशस वन  
यूर्य यिनु खॉतरु, तु अनुन यज़तु सान। राक्षुस आव खोचान खोचान लोह जंघस  
निश तु वोननस यि राज़ विबीशनन वोनमुत ओसुस। लोह जंघन कोर यि साल  
खुशी सान मंजूर तु राक्षसस सुत्य चाव लंकायि मंज। ओर अँचिथ गव सु स्वनु  
मंदोरु वुछिथ हॉरान। राज़ महलस मंज अँचिथ वुछ तँम्य विबीशन। राज़न कोर  
ब्रह्मनस स्वागत। तँम्य कँरुस तोरु ऑही। विबीशनन पुछुस, 'ब्रह्मन, चु किथु  
पाँदय वोतुख यथ मुल्कस मंज? चालाक लोह जंघन वोन तस, 'राज़, बु छुस  
ब्रह्मन तु नाव छुम लोह जंघ। रोज़ान छुस मथरायि। गँरीबी निश तंग यिथ गोस  
भगवानु संदिस मंदुरस। तति कोरुम फाकु दँर्य दँर्य सख तप। पतु आव नारायन मे  
सोपुनस मंज तु वोननम, 'चु गछ विबीशनस निश तिक्याज़ि सु छु म्योन बक्त तु सु  
करी च़े अथु रोट।' मे वोनस, 'बु कति वातु विबीशनस निश?' तँम्य वोन, 'चु  
वुछहन अँज्य विबीशन।' बु गोस हुशार तु पनुन पान वुछुम येति। अमि ज़्यादु छुम  
नु कँह मोलूम।' यि सोरुय बूजिथ सूच विबीशनन, यकीनन छु यि ब्रह्मन यूगी।  
तँम्य वोन तस, 'चु ठहर तान्य। बु दिमय च़े स्यठाह दनु द्वार।' तँम्य कोर सु अकि  
अमानतु रँग्य राक्षसन हवालु तु कँह नफर सूज़िन अँकिस कोहस कुन यथ स्वरनु-  
मुल नाव ओस। यिमव ओन तोरु अख जानवर युस गरुड ज़ाँच ओस। तँम्य द्युत  
यि जानवर लोह जंघस, यस मथरायि गछनुक ज़्यूठ सफर बुथि ओस।

लोह जंघ लोग अँमिस जानवरस खँसिथ लंकायि चकराह करनि। सु रूद अति  
राज़ सुंद पोछ। अकि द्वह पुछ तँम्य राक्षसन, ज़ि लंकायि हुंज सौरुय ज़मीन  
क्याज़ि ऑस हचिव? येलि विबीशनन यि बूज, तँम्य वोन तस, 'ब्रह्मन, अगर च़े  
अथ मामुलस मंज दिलचस्पी छय, तेलि बोज़, बु वनय।'

वारयाह काल गव, कश्यपुन नेचुव ओस माजि नागन हुंजि ग्वलॉमी निश म्वकुलावुन यछान, य्वसु अकि शर्तु मूजुब तिहुंज दास बनेमुच ऑस। अथ सिलसिलस मंज ओस सु दिवताहन अमृथ ह्यथ माजि म्वकुलावनु खॉतरु बदलु द्युन यछान। दिवताहन निश वातनु ब्रॉह सूच तॅम्य जि सु खेयि कैह, युथ सकत मूजूद रोजि। सु गव पनुनिस मॉलिस निश। तॅम्य वोनुनस, 'गोबुराह, सोदुरस मंज छु अख बोड व्वदुर तु अख बोड होस। तिमन छु शाफ। गछ तिमव सुत्य चॅलुराव पनुन्य ब्वछि।' गरुड गव तु अँनिन तिम द्वश्वय ख्यनु खॉतरु अँकिस कल्पु वृक्षस लंजि प्यठ। स्व लँड फुट बारु सुत्य मगर गरुडन रँट यि तौंति मंज युथ नु ब्वनु कनि बालु खिल मरन, यिम कल्पु वृक्षस तलु कनि तप करान ऑस्य। गरुड लोग सॉचनि जि अगर सु यि लँड कुनि जायि त्रावि, खबर कृत्य लुख मरन अथ तल दँबिथ। मॉल्य सुंद सलाह बूजिथ त्राँव तॅम्य स्व लँड तथ जायि येति नु कांह जुव ज़ाथ रोज़ान ऑस। अँथ्य लंजि प्यठ आयि लंका बनावनु, तु अवय छे येति ज़मीन हचिव। यि दँलील बूजिथ गव लोह जंघस अथ सिलसिलस मंज तसली। कैह दूह पतु दित्य तस विबीशनन लाल जवॉहिर तु सु द्राव मथरायि कुन। नेरुवुन द्युत तस विबीशनन विश्नु सुंदि लोलु, युस मथरायि मंज रोज़ान छु, अख पम्पोश, अख गदा, अख शंख तु अख स्वनु चॅकर, तु वोनुनस यिम चीज़ कृशनु भगवानस अर्पन करुन्य। यिम चीज़ रँटिथ खोत सु तस जानवरस युस ब्रॉंतुय तस विबीशनन द्युतमुत ओस तु युस अख लछ बूजन वावस मंज वुडिथ ह्यकान ओस। सु तोर सोदुरस कुनि मुश्किलु रोस तु वोत मथरायि। अँकिस जायि थोव तॅम्य पनुन खज़ानु गुपिथ तु सु जानवर गँडिथ। बाज़र गँछिथ कुनुन अख लाल तु अँनिन पलव, अँत्र तु कैह ख्वराक। पानस ति ख्योन तु सु जानवर ति ख्योवुन। पतु बदलॉविन पलव, पनुन पान सजोवुन। येलि राथ वॉच, सु खोत तस जानवरस तु वोत रूपंकायि हुंदिस मकानस नखु। अथस मंज शंख, चॅकर, गदा तु पम्पोश ह्यथ येलि सु आकॉशी ओर च़ाव, रूपंकायि बास्यव सु नारायन। स्व पेयि तस परन तु तॅम्य वॅरुस ऑही। अमि पतु च़ाव सु पनुनि मसवलि हुंदिस खास कुठिस मंज। अति कमसुय कालस रूजिथ द्राव वापस तु गव आकॉशी।

दोयिमि दूह वॅरु नु रूपंकायि कथुय। स्व ऑस सॉचान, व्वन्य छस बु विश्नु सुंज आशेन्य तु व्वन्य पज़ि नु मे नाशवान मनुशस कुन वुछुन तु कथ करुन्य। तॅम्य सुंजि माजि मकर-दनिश्टरायि प्रुछ तस, 'कूर्य, च़ु क्याजि यिथय हिश?' येलि तमि कुहन्य कुहन्य वॅरुनस, अदु वोनुनस रूपंकायि ति, यि पँत्यमि रॉच सपद्योमुत ओस। तस गव यि बूजिथ शक येलि रात क्युत तमि पानु ति लोह जंघ आस्मॉनी



वसान वुछ। स्व आयि कोरि निश तु वोनुनस, 'कूरी, दयि सुंदि अनुग्रह किन्य बनेयख च्चु दीवी मगर बु छसय च्चे मॉज। म्योन हक नखु वालनु खॉतरु वन च्चु पनुनिस टॉठिस जि मे बुजि वातुनावि येमे पानु स्वर्गस। यि एहसान कर मे।'

रूपंकायि मोन तु लोह जंघस कोरुन अमि खॉतरु इल्तिमास, युस दूहदिशिक्य पॉट्य राथ कयुत विश्नु बॅनिथ आव। तॅम्य वोनुस तोरु, 'चॉन्य मॉज छे अख कॅमीनु ज्ञानानु, तु स्व नॅन्य पॉट्य स्वर्गस निन्य रोजि नु जान। मगर कौश दूह सुबहन छु स्वर्गुक बर यलु आसान तु वारयाह शिव बक्त गन छि सारिनुय ब्रौह ओर अज्ञान। यिमनुय मंज चानन बु चॉन्य मॉज ति, बशर्ते कि स्व करि तिहुंद पॉराव। च्चु कास तस खोरि सुत्य मस। फकथ थवुस पांछ छॉग्य। कलु ख्वपरि मालु लागुस नॉल्य। सॉरी पलव कॅडिथ मथुस अकि तरफु न्यस्फस हाय तु बेयि तरफु न्यस्फस सेंदुर। यिथु कॅन्य बासि स्व गन तु बु चानन स्व स्वर्गस।' यि वॅनिथ द्राव लोह जंघ कमय कॉल्य तु सुबहस थॉव रूपंकायि मॉज तैयार बिलकुल तमी आयि येमि आयि लोह जंघन वोनमुत ओसुस। स्व रूज स्वर्गुक्य सोपुन वुछान। राथ क्युत आव लोह जंघ, रूपंकायि कॅरुस मॉज हवालु। तॅम्य तुज स्व पानस सुत्य तु लोग वावु मंजु वुडनि। अॅथ्य मंज वुछ तॅम्य अॅकिस जायि अॅकिस मंदुरस ब्रौह कनि अख शूबिदार ज्यूठ कनि थम। अथ ऑस प्यठु कनि रछाह जाय। तॅम्य थॉव स्व अथ थफ करनॉविथ तु वोनुनस, 'चु रोज तान्य येत्य। बु यिमु बुतरॉच चकर कॅरिथ।' यि वॅनिथ गव सु गॉब। स्व रूज अवेज्ञान, तॅम्य सुंदि इन्तिकामुक जंडु बॅनिथ। ओरु ऑस्य कॅह लुख मंदुरस कुन पकान। लोह जंघन वोन तिमन, 'अज वाति त्वहि निश मजहर बुड। त्वहि पजि अज जान पॉट्य पूजा करुन्य।' मथरायि हुंघव वारयाहव लुकव बूज यि आवाज। तिम लॅग्य पाठ पूजा करनि। अमि पतु वोथ लोह जंघ ब्वन। पलव बदलॉविन तु ब्यूठ आम लुकन मंज मंदुरस नखु।

कुटिन्य लॅज सॉचनि 'भगवान आव नु वुनि ति, बु वॉचुस नु वुनि स्वर्गस। स्व थॅच प्रारान प्रारान। ऑखुरस येलि तति रोजुन तस ना-मुमकिन बास्यव, तमि दिच खूचिथ क्रख, लुकव बूज 'वाह्य, बु पेयस, बु पेयस'। यि बूजिथ सूच लुकव जि मजहर बुड छे वसान, यिथु पॉट्य आकाश वॉनी सपदेमुच ऑस। लुकन चायि खोफु सुत्य थरु थरु। ऑखुर येलि तिमन अॅमिस प्यठ नजर पेयि, स्व परजुनॉव लुकव तु राजन।

साँरी लॅग्य खोफ त्राँविथ असनि तु रूपंका ति वॉच ओर। अति गॅयि शरमंदु।  
केंचन लुकन हुंदि अथुवासु आयि स्व ब्वन वालनु। वारयाहव प्रुछ तस जि यि क्या  
दॅलील ऑस। तमि वोन तिमन सोरुय। साँरी लॅग्य असनि तु तस शख्सस दाद  
दिनि येम्य तस मक्कार ज़नानि यि नहेब कोरमुत ओस। येमि वारयाहन आशक  
मिज़ाज़न तारन गॅरी कॅरमुच ऑस। सारिनय हुंदि तरफु आव यि एलान करनु जि  
येम्य काँसि मकर दनिश्टरायि यि हालत कॅरमुच ऑस, तस यियि खलत दिनु। यि  
बूज़िथ आव लोह जंघ ब्रॉह कुन तु तॅम्य वॅन्य सारिनय ब्रॉहकनि साँरुय दॅलील।  
अमि पतु त्रोवुन शंख, चॅक्र तु गदा मंदुरस मंज़। सारिवय गौंड तस यज़तुक  
दस्तार तु रूपंकायि आयि राज़ सुंदि हुक्मु आज़ाद करनु। अमि योर कॅर लोह  
जंघन मज़ु सान पनुनि मसवलि सुत्य लॅस्ती बॅस्ती तिक्याज़ि लंकायि ओस तॅम्य  
लालन तु जवॉहिरन हुंद खज़ानु ओनमुत।

क्व-वरु वसंतकस निश यि दॅलील बूज़िथ सपुज़ वासूदत्ता स्यठाह ख्वश, य्वसु रज़  
गंड कॅरिथ वत्स राज़स नखु आरामु सान बिहिथ ऑस।

समय सोरुनस सुत्य बासेयि वासूदत्तायि राज़ वत्सुनिस दिलस मंज़ माय गनान।  
येलि लोलु मनकल पूर वुहनि लॅज, स्व सपुज़ मॉलिस बरखलाफ पनुनिस अज़लु  
लॉनिस अथुवास दिनस तैयार। अमि पतु आव योगेंद्रायन राज़ वत्सस बेयि  
अद्रींद्य पॉट्य समखुनि तु तॅम्य वोन तस फकथ वसंतकस ब्रॉहकनि, 'राज़, चु  
कोरुनख चंड महासेनन फकथ मकॉरी सुत्य काँद। सु छु फकथ पनुनि कोरि च़े  
सुत्य खांदर कॅरिथ च़े यज़तु सान आज़ाद करुन यछान, युथ तॅम्य सुंद अबिमान  
मूजूद रोज़ि। म्यानि खयालु पज़ि असि तॅम्य सुंज़ कूर ह्यथ च़लुन। यिथु पॉट्य  
दिमव अँस्य बदलु ह्यथ अँम्यसुंदिस किबुरस दब। अमि सुत्य यिमव नु अँस्य  
बहोदुरी तु बलवाँनी हुंदिस दुनियाहस मंज़ कमज़ोर माननु। राज़न छे वासूदत्तायि  
ति अख हँस्तिन्य भद्रवती दिचमुच। नडागरी हँसिस रोस पोशि नु तस दोरि कांह  
ति। येलि नडागरी भद्रवती वुछि, सु करि नु तस हमलु। नडागरी सुंद महावत  
अशाडक छु मे ब्रॉटुय कोछ दिथ पानस कुन कोरमुत। चु खस भद्रवती हँस्तिनि  
वासूदत्तायि सुत्य पूर अस्त्र शस्त्र लॉगिथ, तु राथ क्युत नीरिव तोह्य येति। व्वन्य गव  
शामस गछि हसत्यन हुंद निगरान शराब चाँविथ मदहोश बनावनु युन, युथ तस  
कैह बोजुन तगि नु। बु वनु पुलिंदक राज़स तथ वति रॉछ रावठ थवनु खॉतरु येमि  
पेदय च़े पकुन छुय।'

यि वॅनिथ द्राव योगेंद्रायन। राजन थॅव्य सॉरी ह्यदायत याद तु वासूदत्ता रंजुनॉविथ  
वोनून तस सोरुय। स्व ति गॅयि नेरुनस तैयार। तमि अनुनोव हॅस्य वोल अश्टाडक  
तु सु ति कोरुन अथुवासु खॉतरु तैयार। दिवताहन हुंजि पूजायि हुंद बहानु वॅरिथ  
चोव तमि हॅस्य नॉजिम तु तॅम्य सुंद्य सॉथी शराबु। शामस ओस ओबुर, गगरायि  
आसु गछान, तु अशाडकन वातुनॉव हॅस्तिन्य साज वॅरिथ। मगर साज करनु  
विजि दिच तमि खबर क्याजि चिख, य्वसु निगरानन बूज, युस हस्त्यन  
हुंज ज़बान ज़ानान ओस। तॅम्य वोन मदहोश आवाजि मंज 'हॅस्तिन्य छि वनान जि  
तस छु त्रुहॉठ यूजन अज पकुन मगर अथ ह्योक नु सु कांह माने चॉरिथ।' बाक्य  
महावतव बूज ति नु जि तॅम्य क्याह वोन। राजु वत्सन फुटरॉव माँथरि सुत्य तनाबु  
य्वसु योगेंद्रायन सु हेछिनोवमुत ओस। पनुन साज तुलुन तु वासूदत्तायि अँनिनस  
पॉन्य पानय हॅथ्यार। सु खोत पनुन दोस वसंतक ह्यथ हॅस्तिनि। वासूदत्ता ति खॅच  
अँमिसुय हॅस्तिनि पनुन्य राजदार कंचन माला ह्यथ। अमि पतु द्राय तिम महावत  
ह्यथ कुल पांछ नफर उजैनी मंजु। अथ वति मंजु अँस्य ज़ु राजपूत पहरुदर यिमन  
वीर बाहू तु तालु भत नाव ओस। राजन मॉर्य तिम तु लोग ब्रॉह पकुनि। अँथ्य मंजु  
वुछ उजैनी हुंद्यव रोंदु वाल्यव ज़ु पहरुदार मॉरिथ। राथ क्युतुय वातुनॉवुख  
चंड महासेनस यि शेछ। राजु युथुय अथ मामुलस सन्याव, तस नन्याव सोरुय।  
वुछान वुछान गॅयि सॉरिसुय शहरस तुरय। राजु सुंद नेचुव पालक द्राव नडागरी  
हँसिस प्यठ वत्स राजस पतय। येलि तस नखु वोत, राजु वत्सन चलोव्य तस  
कान तु नडागिरियन कोर नु भद्रवती परजुनॉविथ हमलु। पालकस ओस बोय गौ-  
पालक ति सुत्य। तॅम्य वोन तस जि पतु लारनुक ओस नु व्वन्य कांह मतलब।

राजु वत्स रूद मंजु सान वति पकान। हनि हनि आयि राथ ति सोरुनस। दुपहरस  
वोत सु विंद्यावनस मंजु तु हँस्तिन्य अँस त्रुहॉठ यूजन पकुनु किन्य त्रेशि हँच। सु  
वोथ वासूदत्ता ह्यथ ब्वन। हँस्तिनि चैयि त्रेश तु स्व पेयि पथर तु गॅयि वुछान  
वुछानुय मँरिथ। तिम गॅयि ना-व्वमेद। अँथ्य मंजु बूज तिमव वावु मंजु आवाज  
'राजु, बु छस अख ज़नानु। मे छु मायावती नाव तु अकि शापु किन्य अँसुस बु  
हँस्तिन्य बनेमुच। राजु, अज आयिसय बु चै बकार। चॉनिस नेचिविस ति यिमु बु  
बकार। चॉन्य रॉन्य वासूदत्ता छे नु अख आम ज़नानु बँल्यकि अख विगिन्य, येमि  
अकि खास मक्सदु खॉतरु बुतरॉच प्यठ ज़नम छु ह्योतमुत' यि बूजिथ म्यूल राजस  
बेयि होसलु तु तॅम्य सूज वसंतक वुडुर अपोर पुलिंदुकस शेछ ह्यथ। अँथ्य मंजु  
आयि ओरु अख वहशी लूटर जमाथ तु त्रोवुख यिमन गेरु। राजन मॉर्य यिमव मंजु  
अख हथ तु पांछ नफर फकथ पनुन्यव कानव सुत्य। यीतिस कालस आव ओरु

भील सरदार योगेंद्रायनस सुत्य। तँम्य करनॉव लडॉय बंद। राजस प्यव ख्वरन तल तु सु न्यून आशेन्य ह्यथ आदरु सान पनुन गाम।

तमि रॉच रूद राजु तँती, तिक्व्याज़ि वासूदत्तायि ओस जंगली गासु तुजि सुत्य ख्वरस खश वोथमुत। दोयिमि दूह वोत सुबहय रुमन दत्त ओर यस योगेंद्रायन शेछ सूजमुच ऑस। तस सुत्य ऑस सॉरुय लशकर तु सोरुय वन आव यि दँप्यज़ि ति चँसिथ। राजु चाव पनुनि लशकरि मंज़ तु लोग उजैनी हुंज़ि शेछि प्रारुनि। अँथ्य मंज़ आव तोरु अख सोदागर युस योगेंद्रायनस यार ओस। तँम्य वँन्य ततिक्व्य यिम हालात 'राजु चंड महासेन छु त्वहि ज़ामतुर बनोंविथ ख्वश तु तँम्य सूज त्वहि अख कॉसिद, युस पकान छु तु बु आस तस ब्रोंतुय त्वहि शेछ वननु खॉतरु।'

यि बूज़िथ गव राजु वत्स ख्वश तु वासूदत्तायि वोनून सोरुय । स्व गँयि स्यठाह ज़्यादय ख्वश। तमि ओस पनुन खूनी रिशुतु त्रोवमुत। स्व ऑस लँगु खॉतरु बे-करार, मगर हया ति ओसुस ठरि। तमि किन्य वोन तमि पनुन दिल ओरु-योर लागनु खॉतरु वसंतकस, 'मे बोज़ुनाव कांह दलील।' यि बूज़िथ वँन्य मुद्दबिर वसंतकन तस आरुवल चेशिमि यि दलील, युथ तसंज़ु लोलु मनकलि वारु ग्रख लागि।

### देवस मितायि हुंज़ दलील :

सॉरिसुय आलुमस मंज़ छु अख मशहूर शहर यथ ताम्रलिप्त नाव छु। अति ओस अख सोदागर रोज़ान, यस धनदत नाव ओस। तस ओस नु शुर तु अमि मूजुब अँन्य तँम्य वारयाह ब्रह्मन। तिमन वोनून स्यठाह हचरु सान 'कांह व्वपाय कँरिव युथ मे शुर बनि।' ब्रह्मनव वोनूस, 'यि क्वसु कथ छे ? क्रियावान ब्रह्मन ह्यकन वेदी मुताँबिक क्रियायि हुंदि ज़ोरु कँह ति अँज़ुरॉविथ। अँस्य दिमोय च़े अख मिसाल। प्रानि ज़मानु ओस नु अँकिस राजस कांह नेचुव। तस आसु अख हथ तु पांछ ज़नानु। अख यज़ आव करनु तु तस ज़ाव अख नेचुव, यस जंतु नाव ओस। सु ओस तँम्यसंज़न सारिनुय आशुन्यन अँछन हुंद चँद्रम। अकि दूह येलि सु ख्वखुज करान ओस, तस दिच अँक्य केम्य ट्वफ। दगि सुत्य दिचु तँम्य वदन क्रक। यि बूज़िथ लजि सारेय ज़नि व्यदाख दिनि। राजु गव हयबुंगु। कँम्य ताम तुल क्योम थोद तु बचस आव आराम। व्वन्य गव राजस ब्याख एहसास, ज़ि तस छु कुनुय नेचुव, तु अवय गँयि तिम सॉरी बे-करार। तँम्य वोन ब्रह्मनन ज़ि तस गछन वारयाह नेचिव्य बनून्य। तिमव वोनूस, 'अमि खॉतरु छे अख वथ। च़े छुय यि नेचुव

मारुन तु अँम्यसुंद सोरुय शरीर हवनस मंज हुमुन। येलि चान्यन आशेन्यन निश यि मुश्क वाति, तिमन ति ज्यन नेचिव्य।' यि बूजिथ करुनोव राजन अमि कुस्मुक हवन। तस ज़ायि तीत्य शुर्य यीचु तस ज़नानु आसु। यिथय पॉट्य ह्यकव अँस्य ति हवनु सुत्य चोन मकसद पूर वँरिथ।'

यि बूजिथ करुनोव धनदतन हवनुक एहतिमाम तु कँह कॉल्य पतु ज़ाव तस लँडक यस गौहासेन नाव रूद। येलि सु बोड गव, मोल लोग तस खांदर छांडुनि। सु गव नेचुव ह्यथ बेयिस जायि कारुबार करनुकि हीतु न्वश छाडुनि। अति गव सु अँकिस रुतिस सोदागरस कोरि मांगुयि, यस धर्मगुप्त नाव ओस। अँमिस ओस कोरि दीवसमिता नाव। मगर तस ऑस कूर सख टॉठ तु तँम्य कोरुस इनकार, तिव्याज़ि ताम्रलिप्त ओस अति प्यठु स्यठाह दूर। व्वन्य गव दीवसमिता ऑस गौहासैन वुछिथ तु तँम्य सुंघ सिफत डीशित तस गिरवेदु सपदिथ पनुन मोल त्रावुनस तैयार। तमि सूज तस अँकिस राजदार वैसि अथि शेछ तु राथक्युत द्रायि स्व तिमन मॉल्य-पुत्रन सुत्य। ताम्रलिप्त वॉतिथ गव तिमन लँगुन तु अँथ्य सुत्य गव तिमन दूश्चुन्य हुंदि शरीरुक संगम तु ज़ेहनन हुंद म्युल। अमि पतु मूद गौहासेनस मोल। तस वोन सारिवुय रिशतुदारव माल ह्यथ कटाहा गछुन, मगर तसुंजि आशनि दीवसमितायि मोन नु यि। तस ओस यि खोफ जि गौहासेन मा वाटि तोरय बेयि काँसि ज़नानि सुत्य। सु आव अँकिस अजीब खुरिस मंज ह्यनु तिव्याज़ि सॉरी ऑशुनाव ऑसिस कारुबार करनु खॉतरु गछुन वनान मगर आशेन्य ऑसुस नु मानान। सु गव मंदुरस तु लोग तति फाकु दँर्य दँर्य साधना करनि, युथ दय तस पानय रुत मशवरु दियि। अमि पतु आव शिव ख्वश सपदिथ तिमन सोपुनस मंज। जु व्वजुल्य पम्पोश दितिनख तु वोनुनख, 'तोह्य दूश्चय रँटिव अख अख पम्पोश। अगर त्वहि दूश्चुन्य मंजु कांह ति अख बेयिस सुत्य बे-वफॉयी करि, दोयिम सुंद पम्पोश गछि तमे विजि बरु।' यि बूजिथ गँय दूश्चय हुशार तु दूश्चुयव वुछ अख अँक्य सुंदिस अथस मंज अख ताजु व्वजुल पम्पोश। व्वन्य ऑस्य तिम अख अँक्यसुंदि दिलुच कथ ज़ानान। अमि पतु द्राव गौहासेन सफुरस तु देवसमिता रूज गरि पम्पोशस नज़र थँविथ। गौहासेन वोत कटाहा मुल्कस मंज तु तति लोग जवॉहिरातन हुंद कारुबार करनि। तति वुछ चोरव सोदागरव अँमिस अख ताजु पम्पोश अथस मंज। तिम गँयि हॉरान। यि राज ज़ाननु खॉतरु न्युव तिमव सु चाल वँरिथ पनुन गरु। तति चोवुख यड बँरिथ शराबु तु पतु प्रुछहोस पम्पोशुक राज। नशस मंज आसनु मूजुब वँन्य तँम्य तिमन सॉरुय दलील। तिमन ओस मोलूम जि गौहासेनस कोताह वक्त लागि तति। ज़लील आसनु मूजुब वँर

तिमव देवसमितायि वरगुलावनुच साँज़िश तु यि बामल अननु खॉतरु द्रायि तिम ताम्रलिप्त कुन।

ओत वॉतिथ लॅग्य तिम कांह वसीलु छांडनि। ऑखुर समुख्य अँकिस बुद्ध विहारस मंज़ अँकिस भिक्षूबायि, यस योग-क्रंडिका नाव ओस। । तिमव वोन तस बिलकुल पानुन्यारु सान, 'अगर सोन मक्सद चानि अथुवासु असि हॉसिल सपदि, अँस्य करोथ च्छु द्यारु-सॅर्य। योग-क्रंडिकायि वोनुख, 'मे छु बासान, त्वहि जवानन छु कस ताम ज़नानि प्यठ टोर। मे वॅनिव पूर दलील। बु करु त्वहि मदद। व्वन्य गव, मे छुनु द्यारन कांह मॉल, तिव्याज़ि मे छे अख शेश्य यस सिधिकरी नाव छु। तँम्यसुंज़ि मेहरबॉनी तु काँबलियतु किन्य छि मे स्यठाह द्यार।' तिमव सोदागर ज़ादव प्रुछुस, 'तँम्य सुंदि अथु वासु किथु पाँट्य बनेयी च्छे यीच़ दौलथ'? तमि वोनुख तोरु जवाब, 'अगर त्वहि यि ज़ानुनुक शोक छु, बूजिव, बु वनु त्वहि साँरुय दलील।'

### मक्कार सिधिकरी :

वारयाह वक गव, शुमालु तरफ़ आव अख सोदागर। येलि सु येति रोज़ान ओस, म्यॉन्य यि मक्कार मुरीद गॅयि बद-नेतु तँम्य सुंद गरु दाय बॅनिथ, बुथिस खाम मॅरिथ। येलि तमि तँम्य सुंज़ पछ प्रॉव, तमि वॅट अकि दूह नेह-गटि तँम्य सुंज़ साँरुय दौलथ तु द्रायि तति। येलि स्व शहरु मंज़ु द्रायि, अँकिस डूम्बस पेयि तस कुन नज़र, यस अख डोल नाँल्य ओस। सु लोग तस फरनुकि नेतु पतु पतु पक़ुनि। पकान पकान वॉच़ स्व अँकिस बॅडिस तु गॅनिस कुलिस तल। अति ठहरेयि तु आरु बॅरच़ि आवाज़ि मंज़ वोनुन डूम्बस, 'मे गॅयि रुनिस सुत्य हर तु बु द्रायस नेह-गटि गरि मरनु खॉतरु। च्छु कर तु मे अख मेहरबॉनी। म्यानि मरनु खॉतरु बनाव तु अख हँट्य गंड यथ कुलिस सुत्य।' डूम्बन सूच तु त्रोवुन अख हँट्य गंड कुलिस अलूंद। मक्कार सिधकरी लोग ज़्यादय माँसुम तु वोनुनस, 'व्वन्य कर तु ब्याख मेहरबॉनी। मे हावतु यि गंड किथुवँकन्य छि गर्दनि त्रावान। डूम्बन थोव डोल तलु कनि ख्वरन तल तु त्रोवुन यि गंड पनुनि गर्दनि मंज़, तु वोनुनस, 'यिथु पाँट्य छि अँस्य यि गंड गर्दनि छुनान। सिधकरी दिच़ डोलस लथ, डूम्ब गव अलूंद तु मूद। अमे विज़ि वोत सोदागर ति तु तँम्य वुछ दूरि सिधकरी कुल्य ग्वडस निश, येमि तस सोरुय न्युमत ओस। तमि ति वुछ सु, तु खँच़ कुलिस। तति रूज़ लंजन तु पनु वॅथुरन मंज़ गुपिथ। येलि सोदागर अथ जायि पनुन्य नोकर ह्यथ वोत, तँम्य वुछ डूम्ब अलूंद मगर सिधकरी आँस नु कुनी। तँम्य

सुंद्य नोकुरन वोन, 'मे छु बासान स्व छे कुलिस खँचमुच।' सु लोग कुलिस खसनि। तस बुछिथ वोन सिधकरी, 'बोज, मे छु चोन मोहबत, चानि लोलु गँयस अँमिस सोदागरस टहुल्य करनि। यि सोरुय माल ओन मे सिर्फ चानि खॉतरु चूरि। व्वलु रठ मे चीरु नालुमति।' तमि कोर सोदागरु सुंदिस नोकुरस नालुमोत, तु लँजिस म्वनि तु मीढ्य करनि। ज्यव ऑसस मंजु रँटिथ कोरुनस अथ कृप। सु प्यव खून हारान कुलि प्यठु वँस्य। ऑसु मंजु ओसुस खून फंवारु नेरान। यि बुछिथ त्रँहयाव सोदागर। तस बास्यव जि तँम्य सुंद नोकर ओस वँम्य ताम राक्षसन रोटमुत। सु चोल बाक्यु नोकर ह्यथ। स्व भिक्षूबाय सिधकरी ऑस सोरुय बुछान। स्व ति ऑस खोफजदु। स्व वँछ कुलि प्यठु तु वॉच गरु सॉरुय दौलथ ह्यथ। स्वय सिधकरी, य्वसु पनुनि कॉबलियतु खॉतरु बे-मिसाल छे, छि म्यॉन्य शेश तु तँम्यसंजि दयायि छे मे कॉफी दौलथ सोम्बुरॉवमुच।

### देवस्मितायि हुंज दलील :

यि वँनिथ हॉव तमि तिमन सोदागर ज़ादन सिधकरी य्वसु तमि विजि तोर आयि तु तमि वोन तिमन, 'गोबुरव! व्वन्य वँनिव मे तोह्य दलील क्याह छे? क्वसु ज़नानु छे त्वहि बकार? बु अनुनावन स्व तुहुंदि खॉतरु।' यि बूजिथ वोनसु तिमव, 'असि समखावुन च़ु सोदागर गौहासेनी सुंज आशेन्य देवस्मिता।' यि बूजिथ वोन तमि तिमन जि स्व करि यि कॉम। तिम बेहनाँविन पनुनि गरि। ग्वडु वँरुन गौहासेनुन्यन नोकुरन सुत्य कथ तु ज़ान। तिमन दिचुन मिठॉय तु रंगु रंगु चीज़। पतु च़ायि पनुन्य मुरीद कूर ह्यथ देवस्मितायि हुंद गरु। तति ऑस अख हून्य गँडिथ। तमि द्युतुनस नु अंदर अचनु। देवस्मितायि सूज अख च्वंज तु च़ानुनॉवुन अंदर। पतु लँज सॉचनि 'यि ज़नानु क्याजि आयि योर? अंदर अँचिथ वँर तमि मक्कार ज़नानि देवस्मितायि ऑही, तु वोनसु, 'मे ओस च़े बुछनुक सख शोक। अज वुछमख सोपनु मँज्य तु अवु किन्य आयस ज़्यादय बे-करार सपदिथ योर। मगर च़ु कुन्य ज़ँन्य, बॉचस रोस बुछिथ गॉम वॉजि पारु पारु, तिक्क्याजि यावुन तु हुस्न छु पनुनिस बॉचस रोस लछि गछान।' अमि कुस्मुक कलामु वँरिथ करि तमि तस नेक तु पाक ज़नि हुंद वैश्वास प्रावनुच कूशिश, तु अमी दूह द्रायि वापस।

दोयिमि दूह ओन तमि दँग्यमुत्य मरचुवांगन त्रॉविथ अख सिन्य फोल पानस सुत्य तु च़ायि देवस्मितायि हुंद गरु। तति त्रुवुन सु सिन्य फोल होनि ब्रॉह कनि। होनि छुन यि ऑसस बँरिथ न्यंगुलिथ। मरचुवांगुनव सुत्य वोथ तस ठँचि ओश तु नस लँजिस पशपुनि। स्व मक्कार च़ायि देवस्मितायि निश तु लँज वदन क्रेकु दिनि।

देवस्मितायि प्रुछनस जि स्व क्याजि आँस वदान ? तमि वोनस, 'म्यॉन्य वेस्य! वुछ येमिस होनि कुन, खसु चॉनिस बरस प्यठ वदान छे। अमि परजुनॉवस बु तिव्याजि बु आँसुस अँकिस ब्रूह्यमिस जन्मस मंज अँमिस साँथी, तु अवय लँज यि वदनि। अँमिस प्यठ दया यिथ छस बु ति वदान।

देवस्मितायि येलि यि बूज, तु हून्य वुछिन पँज्य पॉट्य वदान, स्व लँज सोंचनि 'अम्युक मतलब क्याह हेकि आँसिथ?' भिक्षूबायि वोनस, 'कूरी, प्रानि जन्मु आसु अँस्य जु, बु तु यि हून्य अँकिसुय ब्रह्मनस जु आशेनि, तु सोन बाँच ओस राजु सुंदि होकमु मुखलिफ जायन गछान। येलि सु ओर आसान ओस, बु आँसुस वपर मर्दन सुत्य लुत्फ तुलिथ जिंदुगी रथ खारान, तिव्याजि यिथु वँन्य आँसुस नु बु प्रकरँच सुत्य दोखु करान, तु पनुन्यम हवासन आँसुस तरावथ दिवान तिव्याजि योहय छु सोन ग्वडन्युक फरुज। अवय जायस बु यथ जन्मस मंज प्रोन जन्मु-वोतुर च्यतस थँविथ। मगर यि आँस ला-अँलिम तु जाँहिल, तवय रूज महज पनुनिस रुनिस आयितन। अवय आयि होनि जन्मस मगर प्रोन जन्म छुस याद।

आँकुल देवस्मितायि सूच पानस सुत्य 'यि छे फरजुच वेखुच वखनय। मे छु बासान, यि ज्ञानु छि मे कथ ताम वालु वाशि लागुन्य यछान।' यि सूचिथ वोन तमि तस, 'अज ताम आँसुस बु ला-अलिम तु जाँहिल। अवय ओसुम नु अमि फरजुक एहसासुय। चु छख रुच, तु तवय द्युतुथम यि ग्यान। वन्य समखावतन मे कांह शकील मर्द'। यि बूजिथ वोनस भिक्षू-बायि, 'येति छि कैह सोदागर जादु, यिम वपर जायि हुंछ छि। बु अनख तिम चै निश।' यि वँनिथ द्रायि स्व ख्वश पॉट्य गरु कुन। देवस्मितायि वोन पनुन्यन च्वंजन, 'मे छु बासान जि यिमव बदमाश सोदागर जादव छु म्यॉनिस बाँचस निश सु हर हमेशि ताजु रोजन वोल पम्पोश वुछमुत, तु कुनि नतु कुनि विजि छुख सु शराबु चॉविथ अमिच दँलील वनुनोवमुत। वन्य छि तमि जायि प्यठु योर मे वरगुलावुनि आमृत्य, तु मँकुर सादु-बाय छे तिहुंज दलाल। तोह्य अँनिव शराबु, दतुर रलॉविथ, तु बेयि बनावनाँविव शेस्तुरुव अख होनि पंजु।'।

दायव कोर तँम्य सुंदिस होकुमस पूर ताँमील। अकि दायि कोर देवस्मितायि हुंदिस वनुनस प्यठ तँम्यसुंद रखत। भिक्षू-बायि चोर, चोरव सोदागर जादव मंजु अख नफर, खदुवय प्रथ कांह ओस देवस्मितायि निश गछनुच वुतावली करान। तमि



ओन सु नफर पानस सुत्य सिधिकरी बनाँविथ तु पानु द्रायि वापस। तमि दायि, य्वसु देवस्मिता बनेमुच्च ऑस, वोन सोदागर-ज़ादस स्यठाह शॉयिस्तगी सान, सु शराबु चेनु खॉतरु, यथ दतुर रलाँविथ ओस। तँम्य शराबन डॉल्य तसुंद्य कौड्य तु नोकुरान्यव कौड्य तस साँरी पलव, तु होनि पंजु लगोवहस तँचुराँविथ ड्यकस। राथ क्युतुय तुलुख तु त्रोवुख अँकिस मँकुरिस ह्यनुरस मंज। सुबहन बाँग्य आव तस होश, तु पनुन पान वुछुन ह्यनुरस मंज ज़न तु सु पनुन्यव पापव पाकु नरकस मंज वातुनोवमुत ओस। सु वोथ थोद, श्रान कोरुन, तु वोत अलिफ नंगु भिक्षू-बायि निश। ड्यकुक दाग थोवुन खँटिथ। तोत वाँतिथ वोन तँम्य पनुन्यन सुत्य-बाजन ज़ि तस फँर्य वति चूर, तिक्क्याज़ि सु ओस यछान ज़ि तँम्य सुंद्यन यारन ति गछि सुय हाल सपदुन, युथ तिम तस पामु दिन नु। ड्यकस गँडुन दँज तु वोनुन ज़ि तस ओस कलु दोद तिक्क्याज़ि राँत्य रातस ओस सु लुत्फ तुलान हुशार रूदमुत। योहय हाल सपुद दोयिमि राँच बेयिस सोदागर-ज़ादस तु येलि सु नंगय वापस वोत, तँम्य वोन ज़ि सु ति ओस चूरव रोटमुत तु सुबहस गँड तँम्य ति कलस दँज।

यिहोय हाल सपुद च्वश्वुन्य मगर सारिवुय थोव पनुन हशर अख अँकिस निश खँटिथ, तु आँखुरस द्राय तिम तमि जायि, मगर भिक्षू-बायि ति वोनुख नु ज़ि तिमन क्याह ओस गुदर्योमुत, तिक्क्याज़ि तिम आँस्य साँचान ज़ि तस ति गछि स्वय वनन गछुन्य।

दोयिमि दूह गँयि भिक्षू-बाय सिधकरी ह्यथ देवस्मितायि निश। स्व आँस अथ कथि प्यठ ख्वश ज़ि तमि आँस देवस्मिता रंजुनाँवमुच्च। देवस्मितायि चावि तिमु दूश्वय दतुर रलाँविथ शराबु। येलि तिमन दूश्वुन्य स्वथ पेयि, तमि चँट्य तिमन कन तु नस, तु त्रावुनाव्यन तँथ्य ह्यनुरस मंज। मगर व्वन्य आव तस ब्याख खयाल। मुमकिन ओस ज़ि तिम सोदागर ज़ादु वातुनावहन तँम्य सुंदिस बाँचस व्वन्य कांह ज़र्यर, अमि किन्य वँन्य तमि साँरुय दँलील हशि। तमि वोनुस, 'टाँट्य, च़े यि कोरुथ, ति ओस रुत, मगर यि छु मुमकिन ज़ि चानि क्रेयि वाति मे नेचिविस कांह ददारु।' देवस्मितायि वोनुस, 'बु बचावन सु तिथय पाँट्य यिथु पाँट्य प्रानि ज़मानु शक्ति-मती पनुन बाँच म्वकुलोव।' तँम्य सुंजि हशि प्रुछ तस, 'शक्ति-मती किथु कँन्य म्वकुलोव पनुन बाँच ?' देवस्मितायि वँनिस यि दलील।

**शक्ति-मती तु तँम्य सुंद रून :**

सॉनिस मुल्कस मंज छु अँकिस जायि अँकिस बलवान यछ सुंद मंदर यथ मनिभद्र नाव छु। मंदर छु सान्यव बुजर्गव बनोवमुत। मुख्तलिफ हाजुतव खॉतर छि अति लुख मुख्तलिफ नियाज करान। अथ शहरस मंज अगर राथ क्युत कांह मर्द काँसि बेयिस मर्दु संजि आशनि सुत्य वुछनु यियिहे, तिम दूश्वय ऑस्य अँथ्य मंदरस मंज रातस बंद करनु यिवान। सुबहस ऑस्य दूश्वय राजस निश वातुनावनु यिवान, तु खजालथ सपदिथ ओस तिमन सजा दिनु यिवान। यि ओस अमि शहरुक रेवाज। अकि दूह सपुज दँलील, जि अख कारुबॉरी समूदर-दत रोट रेंदु वाल्यव कस ताम वपर जनानि सुत्य राथ क्युत, तु कोरुख अँथ्य मंदरस मंज बंद। अमे विजि बूज यि कथ अमिस मरदु संजि रुचि आशनि, यस शक्ति-मती नाव ओस। स्व गँयि रोयस खाम मँरिथ ल्वति पाँदय मंदरस नखु पनुनि अँकिस वेसि सुत्य ह्यथ, जन तु तस तति नियाज त्रावुन ओस। तस वुछिथ मुचरोव गोरन बर तु दक्षनायि हुंदि लालचु चॉन्य तँम्य स्व मंदरस मंज तु अमि खॉतर ह्योतुन अति हॉकिमस इजाजथ ति। अँदर वुछ तमि पनुन बाँच लेदुर्योमुत तु फ्रेट्य गोमुत। तमि नियि स्व जनानु अँकिस कुन तु लॉगिनस पनुन्य पलव, तु पनुन खाम बुथिस मँरिथ वोनुनस तति नेरनु खॉतर। यिथु पाँदय द्रायि स्व जँन्य न्यबर तु शक्ति-मती रुज अंदरुय। सुबहस येलि राजु संघ कारंदु तहकीकात करनि आयि, तिमव वुछ जि तिम ऑस्य बाँच जु। राजन त्रावनोव सु कारुबॉरी माँफी मँगिथ यलु तु तस बास्यव पनुन पान मोतुकि ऑसु मंजु नेरान। रेंदु वाल्यन तु अदलु हॉकिमन आव सजा दिनु। यिथु पाँदय शक्ति-मती पनुनि अक्लि सुत्य पनुन बाँच म्वकुलोव, तिथय पाँदय रछन बु ति पनुन अजलु लोन।

### देवस्मितायि हुंज दँलील :

हशि यि दलील बोजुनाँविथ कोर देवस्मितायि मरदानु रखत तु सोदागर बँनिथ द्रायि पनुनि च्वंजु तु माल ह्यथ अँकिस जहाजस मंज तथ मुल्कस कुन येति तँम्यसुंद बाँच ओस। तति वुछ तमि गौहासेन सोदागर जमाँच मंज। येलि गौहासेनन स्व वुछ, तँम्य सूच, यि कुस सोदागर छु यस म्यानि आशनि सुत्य शक्ल रलान छि। मगर तस वोन नु देवस्मितायि किहिन्य। स्व गँयि तति राजस निश तु सोम्बुराँविन लूख राजस ब्रॉह कनि। अदु वोन देवस्मितायि जि तस क्याह ओस दरखास। देवस्मितायि वोनुस, 'यथ लुकु हजूमस मंज छि म्यॉन्य चोर चँल्यमुत्य ग्वलाम।' राजन वोनुस, 'साँरी लूख छि येती। चु निख पनुन्य चोर ग्वलाम परजुनाँविथ पानस सुत्य।' तमि चॉर्य तिमय चोर सोदागर यिमन तमि अमि ब्रॉह नहेबु कोरमुत ओस। तिमन आसु वुनि ड्यकन दजि गँडिथुय। मगर तमि जायि हुंघ सोदागर गँयि

नारोनार तु वोनुख, 'यिम बापौर्य ज़ादु छि बड्यन बड्यन बापार्यन हुंघ नैचिव्य। यिम किथु पाँट्य ह्यकन ग्वलाम आँसिथ?' यि बूज़िथ वोनुख देवस्मितायि, 'अगर त्वहि म्याँनिस वननस पछ छेनु, तोह्य वुछिव यिहुंघ ड्यकु, यिमन प्यठ मे यिमन हून्य पंजुक ग्वलाम दाग दोगमुत छु।' तिमव मोन तु दजि मुचरिथ वुछुख तिहुंघन ड्यकन प्यठ सुय दाग। साँरी सोदागर गँयि शरमंदु। राजस गव इशित्याक तु तँम्य प्रुछ देवस्मितायि साँरुय दलील, खसु बूज़िथ साँरी लूख असनि लँग्य। राजन वोन तस, 'यिम छि बे-शक चाँन्य ग्वलाम।' सोदागरव दिच तस काँफी दौलथ डॉल्य, युथ स्व तिमन सोदागर-ज़ादन आज़ाद करि। राजस आव जुरमानु बरनु। देवस्मितायि रँट स्व दौलथ तु पनुन ड्यकु-टिकु ह्यथ आयि रुत्य पाँट्य ताम्रलिप्त वापस, येति पतु तिम ज़ांह अख अँकिस निश जुदा गँयि नु।

'राज़ु राँन्य', वसंतकन वोन, 'रुत्यन गरन हुंज़ु ज़नानु छे पनुन्यन बाँचन वफादार आसान, तु काँसि व्वपरस मुतलक छेनु साँचान तिक्याज़ि श्रूचन तु पाक ज़नानन खाँतरु छु तिहुंद बाँचुय बगवान आसान।'

सफरस दोरान वसंतकस निश यि रुच दलील बूज़िथ चँज वसूदत्तायि माँल्य सुंद गरु त्रावनुच शर्म तु पनुन सौरुय कैह बास्यव तस फकथ पनुन मदनवार तु तँम्य संज़ सीवा।

राज़ु वत्स ओस विद्यावनस मंज़ तु अँथ्य मंज़ वोत ओर राज़ु चंड महासेनुन अख काँसिद, तु तँम्य वोन राजस नमस्कार कँरिथ राज़ु महासेनुन पाँगाम। 'त्वहि कोरवु वासूदत्ता पानस सुत्य निथ स्यठाह रुत। मे आँसिमवु तोह्य अवय पनुनिस दरबारस मंज़ अँन्यमुत्य। मे क्याज़ि कँर नु स्व त्वहि तति पानय पेश? मे ओस बासान ज़ि अमि सुत्य बासि त्वहि स्व पुशरॉवमुच, तु मे मुतलक रोज़ि नु त्वहि रुत खयाल। व्वन्य पज़ि त्वहि रछाह ठहरुन, युथ त्वहि द्वशुनी हुंद म्युल मँर्यादायि सान लँगुन कँरिथ सपदि। म्योन नेचुव गौ-पालक वाति तुहुंदिस दरबारस मंज़, तु तति करि सु बेनि हुंद लँगुन जान पाँट्य।' राजस यि पाँगाम दिथ कँर काँसिदन वासूदत्तायि सुत्य ति कथ बाथ।

राज़ु तु राँन्य द्वशुय आँस्य ख्वश। व्वन्य ओस राज़ु क्वसम्बी कुन नेरुन यछान। तँम्य वोन चंड महासेनुनिस काँसिदस तु पनुनिस बाज-गुज़ार पुलिंदुकस तँती रूज़िथ गौ पालुकस प्रारुन, तु पतु तस सुत्य क्वसम्बी युन। वासूदत्ता ह्यथ द्राव सु

मेहमान दोयिमि दूह सुबहॉय। पतु पतु ऑस्य तस हँस्य पकान ज़न तु विंद्या  
सिलसिलुक्य थँग्य ऑस्य तस अलविदाह करान। येलि तँम्य सुंदि फोजुच तु गुर्यन  
हुंदि पकनुच आवाज़ गछान ऑस, बासान ओस बुतराथ छे ग्यवान तु अमि सुत्य  
युस गरदे-गुबार नबस खसान ओस, तमि सुत्य गव यँद्राज़स यि खोफ जि कोह छु  
पर लॉगिथ ह्योर खसान।

दोयि त्रेयि दोह्य वोत राज़ पनुन मुल्क तु अँकिस रॉच कोरुन रुमन वटु निस  
महलस मंज़ ठहराव। पनुन्य लोलु थँर ह्यथ ओसुस क्वसम्बी वातनुक सख चाव,  
येतिक्यन लुकन तस वुछनु खॉतरु अँछ्य पुतुन्य गँमचु आसु। शहर आव महरेनि  
हुंद्य पॉदय पॉरावनु। येम्य सुंद बरथा वारयाहि कॉल्य वापस यिवान छु, तु खसु  
च्वंजन अथि संज़ तु साबन मथुनॉविथ पनुन्य तन नावान छे। लुख गँयि राज़ तु  
रॉनी वुछिथ ख्वश। शहरुचि हसीन ज़नानु आसु तस दार्यव तु पशव पेदय वुछान।  
तिमन वुछिथ ओस बासान जि गंगायि मंज़ छि बे-शुमार पम्पोश फोत्यमुत्य। अमि  
पतु चाव राज़ पनुनि मसवलि सुत्य राज़ महलस।

वासूदत्ता ऑस दोयिम लक्ष्मी बासान, तु राज़ दरबार, येति ब्रॉंतुय तस वारयाह  
बाजगुज़ार राजि-दरशनस प्रारवुन्य ऑस्य, ओस ज़न तु गंधर्वन हुंद्यव नगमव सुत्य  
बेदार सपुदमुत। अमि पतु कमय कॉल्य आव वासूदत्तायि हुंद बोय गौपालक, तु तस  
सुत्य आयि तिम ति, यिम तस प्रारवुन्य ऑस्य। राज़ गव तस बुथि तु वासूदत्तायि  
ति कोरुनस खुशी हुंद ओश यिथ तमि आयि इस्तेकबाल, ज़न तु सु तस नँव  
ज़िंदगी दिनि आमुत ओस। गरु त्रावनुचि शरमि हुंदि एहसासु वोथ तस अँछव मंज़  
अख अँश्य कतरु। बाँय दितुस मॉल्य संज़ शैछ वँनिथ होसलु तु तमि सूच जि  
पनुन खूनी रिशुतु बेयि लँबिथ गव तस ज़िंदगी हुंद सोरुय मक्सद हॉसिल।

दोयिमि दूह कोर तस गौ-पालकन स्यटाह शादमॉनी सान थेकिथ राज़ वत्सस  
सुत्य मँर्यादायि मुताँबिक लँगुन। राज़ वत्सन रोट तँम्य सुंद अथु ज़न तु अँकिस  
लोलु लंजि स्वंदर टूर फोटमुत ओस। तु पनुनिस यावन रायस सुत्य अथु लँगिथ  
गँयि स्व गुमु सँर्य, बदनस कँरुनस थरु थरु, तु बासान ओसुस जि कामु दीवुन्यव  
कानव छुहस पुचु पर्युन कोरमुत। येलि तमि अँग्नस दँछिनि तरफु प्रेदिकन द्युत,  
तँम्य संज़ अँछ गँयि दुहु सुत्य व्वज़ुजि, ज़न तु तमि माँछल शराबु चोमुत ओस।  
गौ-पालकन कँर्य तिमन लाल जवॉहिर पेश, तु बाक्य राजव वारियाह डालि, तु  
राज़ बास्यव पँज्य पॉदय चक्रव्रत राज़।

लगनु पतु गॅयि तिम दूश्वय बाँच आम लुकन निश तु पतु चायि पनुनिस कुठिस मंज। अमे दूह वॅर राजु वत्सन गौ-पालकस तु पुलंदुकस यजथ अफजॉयी खॉतरु दसतार-बंदी। तॅम्य वोन योगेंद्रायस तु रुमन वटस तिमन राजन तु शहरियन खताब तु यजथ दिनु खॉतरु, यिम तोर आमृत्य ऑस्य। अमि पतु वोन योगेंद्रायन रुमन वटस, 'राजन लॉग्य अॅस्य वुलटु कामि तिक्याज़ि काँसि हुंघन जज़बन हुंद पय लगुन छु मुश्किल। अख शुर ति अगर ख्वश रोज़ि नु, सु ति हेकि कैह नाकारुगी वॅरिथ। बोज़, बु बोज़नावथ अँकिस शुर्य सुंज दॅलील, यस विनशटक नाव ओस।

### ऑकल हॅलिस वॅलिस शुर्य सुंज दलील :

दपान पथ कालि ओस अख ब्रह्मन यस रुद्रशर्मन नाव ओस। तस आसु जु ज़नानु। अँकिस ज़नानि ज़ाव अख नेचुव तु म्वयि। ब्रह्मनन कोर सु बचु वोरु माजि हवालु तु येलि सु बचु हना बोड गव, तमि द्युत तस खराब ख्यन। अमि सुतुय गव सु बचु ज़र्द तु यॅड खोतुस पचख। यि वुछिथ वोन रुद्रशर्मनन ज़नानि, 'चै क्याज़ि थोवुथ नु येमिस म्यॉनिस माजि रॅसिस शुर्य सुंद कांह खयाल।' तमि वोनस तोरु, 'बु छेसन यि कमि लोलु रछान! मगर यि छु खबर क्याह विहाथ। व्वन्य क्या करस बु?' यि बूज़िथ सूंच ब्रह्मनन, यकीनन छु अँमिस यि पनुनुय कर्म खुर।' ज़नानि हुंज़ि तथ मँखरि कुस छु च़ेनान य्वसु मक्कार सादुगी मंज गुपिथ छे आसान। सु शुर लोग बाल विनशटक याने होल कोल शुर, नावु सुतुय गरस मंज प्रथनि। अकि दूह सूंच तॅम्य पानस सुतुय 'म्यॉन्य यि वोरु माँज छि मे सुतुय हमेशि ना-रवा सलूक करान। मे पज़ि कुनि तरीकु अँमिस अम्युक बदलु ह्योन।' सु ओस फकथ पांचु वुहुर मगर दाना ओस स्यठाह। येलि तॅम्य सुंद मोल राजु दरबारस मंज वापस आव, तॅम्य वोन तस अड-कजि ज़बाँन्य लोत पाँदय, 'बबा, मे छि जु माँल्य।' अमि पतु रुद सु तस दूहय यि कथ वनान। अकि दूह सूंच रुद्रशर्मनन ज़ि शायद छु तॅम्यसुंजि ज़नानि कुस ताम यार तु येति योर लागि नु सु तस अथु ति। यपॉर्य लॅज तॅम्य सुंज ज़नानु सौंचनि ज़ि मे छुनु फिकरी तरान ज़ि म्योन बाँच क्याज़ि छु मे नाराज। खबर बालु विनशटकन मा छुस कैह वोनमुत? अमि दूह कोर तमि तस रुतुय पाँदय श्रान, जान ख्यन चन द्युतुनस, तु ख्वनि मंज रॅटिथ प्रुछुनस, 'गोबुराह, चै क्याज़ि बॅरिथ माँलिस मे खलाफ कन?' यि बूज़िथ वोनस तॅम्य, 'अगर चु मे सुतुय रुत वरताव करख नु, तेलि वातुनावय बु चै ज़्यादु ज़र्यर। चु छिहख पनुन्य शुर्य ज़्यादु जान पाँदय रछान, मगर मे छख हमेशि तंग करान।' येलि तमि यि बूज, तमि मँज तस माँफी, तु कसम हाँविथ वोननुनस, 'व्वन्य करु नु बु यि ज़ांह, मगर चु

मनुनावुन मोल।' शुर्य वोनस, 'येलि म्योन मोल गरु यियि, च्च वन काँसि नोकरानि तस आँनु हावुन। बाक्य त्राव मे प्यठ।'

येलि रुद्रश्रमन गरु आव, अकि नोकरानि होव तस आँनु। विनश्टकन कोर आँनुकिस अकसस कुन इशारु तु वोनस, 'हो क्या छु मे दोयुम मोल।' यि बूजिथ चोल रुद्रश्रमनस सोरुय शख। ज़नानि सुत्य गोस सलाह, य्वसु तँम्य बँल्य कसूरवार मॉन्यमुच्र आँस।

'यिथु पाँट्य हेकि शुर ति नाराज़ गँछिथ कांह शरारत वँरिथ। अउ मूजुब पज़ि असि सारिनय सुत्य एहतियात वरतावुन।' यि वँनिथ वँर योगेंद्रायन रुमन वटुनि अथुवासु तिमन सारिनय हुंज ह्यमथ अफज़ाँयी, यिम राज़ वत्सुनि शादमाँनी मंज शरीक सपदुनि आमत्य आँस्य। तिमव द्युत प्रथ काँसि राजस त्यूत ज़ि प्रथ काँसि सूंच, ज़ि तिमन दूधुन्य आँस फकथ तँम्यसुंज फिकिर। राज़न कोर पनुनि अथु तिमन दून तु वसंतकस खलथ अता, यथ लाल तु जवाँहिर मँरिथ आँस्य। खांदरुक जशन सपदिथ बास्यव राज़स ज़ि तँम्यसुंघ साँरी मुराद आयि बामल, तिक्याज़ि व्वन्य ओस तस वासूदत्तायि सुत्य म्युल गोमुत। कूतिस कालस प्राँरिथ आँस तिहँदिस लोलस सोंतु फुलय लँजमुच्र तु अथ फुलयि आँस जज़ुबन हुंज स्वंजल गछ करान। दूह पतु दूह बास्यव तिमन लोल हुरान। अमि पतु द्राव गौपालक गरु कुन वापस तिक्याज़ि तस ओस पानस ति व्वन्य नेथुर, तु राज़ वत्सन वोनस जलदुय वापस यिनु खॉतर।

कँह काल गँछिथ न्युव राज़स हरमुचि अकि च्वंजि दिल, यस विराचित नाव ओस। सु लोग बे-वफा बँनिथ तस चूरि चूरि लोल बरनि तु तस सुत्य आँस तस वासूदत्तायि ब्रोंतुय क्याहताम दँलील। अकि दूह वँर तँम्य गलती तु वासूदत्तायि वोनस तसुंद नाव। स्व लँज त्यूत वदनि ज़ि राज़स ज़न तु तसुंदि अँश वानि श्रान गव। सु प्यव तस ख्वरन तल। तँम्य कोर बंधूमती सुत्य ति खांदर य्वसु गोपालुकन पनुनि ब्वज बलु सुत्य ज़ीनिथ, बेनि डॉल्य सूजमुच्र आँस। तमि थॉव स्व खँटिथ तु नाव थोवुनस मंजूलिका। स्व आँस लक्ष्मी हिश हसीन। स्व वुछ अकि दूह राज़न तु नियन पानस सुत्य अँकिस ठंडु मंदोरि मंज तु कोरुन तस सुत्य गंधर्व आयि खांदर। अथ प्यठ गँयि वासूदत्ता नाराज़ तु कोरुन वसंतक काँद, युस राज़स हमराज़ ओस। वासूदत्तायि आँस माल्यनि प्यठ अख रेश्य बाय सुत्य, यस संक्रित्याननी नाव ओस तु येम्य सुंद स्व मानान आँस। राज़ गव अँमिसुय रेश्य

बायि निश तु तमि होमुरोव वासूदत्तायि हुंद शरारत तिथु पॉट्य जि तमि वॉर बंधूमती पानय राजस पेश तिक्याजि रुचन ज़नानन हुंद दिल छु स्यठाह नोजुक तु ऑरी आसान। रानि त्रोव वसंतक कॉदु मंज़। सु आव तस ब्रॉहकुन तु अँसिथ वोननस 'बंधूमती वातुनोवनय च़े ज़र्यर। मगर मे क्या कोरुय च़े ? च़ु छुख ज़हरीलु स्वरफन नाराज़ मगर पां स्वरफ छुहख मारान।' रानी प्रुछुस जि अमि अस्ति-आरुक माने क्या छु ? वसंतकन वँनिस यि दलील।

### रुरुव संज़ दँलील :

अकि दूह ओस अँकिस रेश्य सुंद नेचुव रुरुव ओरु योर चकर करान। अँथ्य मंज़ वुछ तँम्य अख अनहँरिश कूर, य्वसु स्वरगुचि अचु रचु मेनकायि अँकिस विद्याधरस निशि ह्यनु आमुच ऑस। स्व ऑस अँक्य रेश्य यस स्थूलकेश नाव ओस, पनुनिस आश्रमस मंज़ रँछमुच। तस कोरि ओस प्रीशड्वरा नाव। तमि न्युव रुरुव सुंद दिल अके ग्रायि मुहिथ। सु गव रेशिस तँम्यसुंद अथु मंगुनि। स्थूलकेशन मोन मगर येलि लँगनुच तैयॉरी सपुज़, अख पोहर आव तु दिचुन परीशडोरायि ट्वफ। रुरुव सुंदिस दिलस गँयि टुकरु टुकरु मगर तँम्य बूज यि आकाशवॉनी 'ब्रह्मन, पनुन्य न्यसुफ वॉस दिथ करुन च़ु यि जिंदु तिक्याजि अँमिस छु अम्बरस सोर्योमुत।' यि बूजिथ दिच तँम्य तस पनुन्य न्यसुफ जिंदुगी। स्व गँयि जिंदु तु तिमन सपुद खांदर। अमि पतु गँयि तस ब्रह्मन ज़ादस सारिनुय स्वरफन हुंज दुय। येलि ति ज़ांह कांह स्वरुफ वुछुन, सु छुनुन मॉरिथ यि सूचिथ जि अमी आसि म्यानि ज़नानि ट्वफ दिचमुच। अकि दूह लोग सु अँकिस पां स्वरफस मारनि। तँम्य वोनस इनसानु आवाजि मंज़, 'च़े वातुनोवुय ज़हरीलु स्वरफन ददारु मगर च़ु क्याजि छिहख पां स्वरफ मारान ? च़ानि ज़नानि दिच अँक्य पुहुर्य ट्वफ तु पुहुर्य छि पां स्वरफव निशि अख अलग ज़हरीलु ज़ाथ।' यि बूजिथ वोन तँम्य तस, च़ु कुस छुख ? पां स्वरफन वोनस, 'ब्रह्मन, बु छुस अख र्योश, युस अकि शापु किन्य पां स्वरुफ बन्योमुत छु। च़े सुत्य कथ वँरिथ म्वकुल्यव मे शाफ।' यि वँनिथ गव सु गॉब। अमि पतु मॉर्य नु रुरुवन ज़ांह पां स्वरफ।

'अवय वँन्य मे यि तमसील', वसंतकन वोन असवुनि ह्वंजि 'जि च़ु छुख ज़हरीलु स्वरफन नाराज़ मगर पां स्वरफ छिहख मारान।' वासूदता, य्वसु पनुनिस बॉचस निश बिहिथ ऑस, सपुज़ ख्वश। यिछु मोदरि दँलीलु यिमव सुत्य वसंतक, येलि ति सु राजस निश बिहिथ आसान ओस, तु यिमन मंज़ सु पनुन्य ज़ीरुकी व्यछुनावान ओस, आसि राजस पनुनि नाराज़ आशनि रंज़नावनस मंज़ अथु रोट करान। तस

आनंद मग्न राजुं सुंजुं ज्यव अँस मसुक मजु वुछान, कन मोदुर साजुं बोजान तु  
अँछ पनुनि मसवलि लालु रोयस व्यूर तुलान ।

That ends the Translation by Dr. Amar Malmohi,  
corresponding to Volume One, Book Two, Chapter  
Fourteen of C.H.Tawney's Katha Sarit Sagar.



Katha Sarit Sagar ~ Devanagari-Kashmiri Version : M.K.Raina  
~ Completed May 2020.

